

(КОМИ)
Т 61

Иван
Торопов

АРСЯ
СЫЛАНКЫВ





1.9.7.6





Иван Торопов

АРСЯ
СЫЛАНКЫВ

ВӖР-ВА ЙЫЛЫСЬ
ГИЖӖДЪЯС

Коми книжнӧй издательство
Сыктывкар 1976

С(коми)

Т61

Художник Добряков С. А.

Т $\frac{0733-014}{M128(03)-76}$ 26—76 м

© Коми книжное издательство 1976

Арся сьыланкыв

ПОВЕСТЬ



Тулысыс нюжаліс...

Водза-водз өдөба гызьмуніс ытва, ойдөдіс гөгөр, а сэсся ыркнитіс, пондіс зэрыштавны, да төлысь чөж та-дзи бужгыласис поводдяыс. И ытваыс та вөсна некыдз эз вермы ямны. Весигтө кор нин сэсся ёна шондөдіс да му веркөсысь гажтөмчөм шонді кутіс яра ыпъявны сөдз-мөм енэжсянь, — весигтө сэки на ваыс эз мөд чинны. Сы вөсна, мый вөлисти вөрзисны сывны кыз йиа нюръяс да сөнікасыөм лымъя йөнөдъяс...

И өд дивө босьтө: гожөм шөрлань нин матыстчө кад-дыс, видзьяслөн рөчьяс небыда вежөдоны выль турунөн, льөм сяввидзө-дзордзалө ловтө мавтыштысь көрнас — а со век на гөгөр ойдөма. Йөз купайтчөны видзьяс вылын лоөм куръяясын, ваыс ёна нин шоналөма сэні, выль ту-рун дукөн өвтыштө...

Оти татшөм лунө Питиримөс нуөдісны Льөмью дача дорө чери кыйны. Паныдасис ёртыс, Степан Фёдорович, кодкөд коркө Льөмью гажа берег дорын жө и төдмась-лісны, да и шуө:

— Тывшойыд менам эз на дзикөдз ротйысь — кайлам,

гоз-мёдысь кёвтыштам купайтчигмоз. Гашкё, и юква вы-
лө шедыштас... кельчи да ёкыш. Шондіа лунад найё, бу-
ракё, кайисны куръя йывъясё. Сэссия, морё, и сөстөм сы-
нөднас лолыштам. Нинёмла кык шойччан лун карын сідз
лотны.

Питирим радпырысь мөдөдчис. Сы вөсна, мый сійё
век ёна гажтөмчис вөр-ваысь, сылы кажитчыліс, мый оз
кө петав вөрө либө ва вылө, дзикөдз пөдас тшына-буса
да шума карас. Сійё весиг вежон шөрас, удж помалөм
бөрын, кежавлывліс матысса вөрө. То зарава вийөдыштас
да юас — тулысын кө; гождөмын кө — тшак жаритмөн во-
тас, то сідз пукалыштас нитшсялөм мыр вылын, мый йы-
лысь кө мөвпалігтыр кывзыштас вөрыслысь пыдіа шув-
гөмсө либө гөгөрвотөма чөв олөмсө. И быттьө бурмылө
сьөлөмыс, быттьө выль вынъяс кыскө чукөрмөны водзө
овны...

Уна йөза, сьёкыдысла морөсөдзыс вөйөм теплоход
вель дыр вермасис-катіс визула шывгысь Эжва паныд.
Степан Фёдорович, быдөн дінө сибалысь мортыд, гажаа
шмонитіс кутшөмкө төдсаяскөд — а сылы, буракё, кар-
сьыс став йөзыс төдсаөсь вөліны, — бура шуөм кывйысь
ачыс медводзөн чарснитліс-серөктыліс...

Луныс шоныд, пыдөстөм енэжсянь яра ыпъялө шонді.
Пом ни дор лөзалө Эжва, став дйяссө и лыа көсаяссө
ылькнитөма. Ловзьөм берегъяс сөстөма веждөны небы-
дик турунөн да томиник коръясөн. Ыркйөдлө дзордза-
лысь льөм пу көрөн йиджтысьөм төвру...

Вермас-ө мыйкө лоны таысь мичаджыкыс да дона-
джыкыс?!

Питирим нөрөвтчөма шыльыд тасөн дорөсалөм борт
вылө да азыма видзөдө, видзөдө... Сылөн лөньөма лолыс...
Став чирыш мөвпъяссьыс и дойясысь... Шыльыд ва вер-
көсыс моз жө лөньөма. Сөстөма веждөдысь том турун ко-
дыс жө небыдөн лоөма...

Мунны и мунны эськө тадзи! Да любөпырысь кывны,
кызди тэнад быдлаті нимкодьясь-шойччө.

Баситом чача кодь лосьыдник пристань дорын Степан Фёдоровичлөн вөлі ичотик пыж, жоч пыдөса да паськыд коз пөв набоя. Сөлісны сэтчө да и модісны катны ыло видзьяс ыло паськалом курьяод.

— Та ыжда васьыд, дерт эськө, бурджык вөлі кузь тывйон гумлавы курья йывьяссө, — отарө-мөдарө дзорнясис Степан Фёдорович. — Но менам сійөс сиктө лэччөдөма... Да, морө, и он лысьт сійон тани...

Питирим любөпырысь сыніс пелькиник кык лопта пельсөн, пыжныс өдөба шуньгис-исковтіс лонь ва веркөсөд, и сэтшөм лосьыд вөлі Питиримлы лов тырнас кывны и шоналом васө, и вежон ловзьысь берегьяссө, мый весиг эз вөв окота ни думайтны, ни сёрнитны...

— Но нинөм, Питя, абу на став черыис профессор, — варовитіс сэк кості Степан Фёдорович. — Ми кодь йөйясыс ваад эмөсь жө, пырасны и тывшоюд...

Пөрччысисны плавки кежөдзныс. Черыис пө көть и оз шед, гожьялөмыс век нин сюрө. Од тывтө кыскалігөн, быд ног вөригөн, лосьыдджыка на позьө гожиөдчыны лыа ылын кер моз куйлігөн дорсьыд.

Кыкнанныс найө сөнөдөсь, лишной гос ыланыс абу чөжсьөма. Көть эськө, шуам, Степан Фёдоровичыс ветымын арөсысь важонкодь нин йөткыштчөма. Гашкө, сы вөсна оз тшөг, мый дядьөыс сійө вывтіджык тэрыб да өдийө пузьысь? А сэсся, пузырьөм бөрас, ышмывлө син ни пель. Дерт, сэсся морттө томон-кадөн войнаыд тшөтш небзьөдыштөма. Мышкас со, сурса лы дінас, вомөна гуран, ловья пу ылын бурдөм тшупөд моз, эшвидзө. Да и кынөм ылас корсюрө норасьывлө, торйон нин вина юыштөмьяс бөрын. Фронт ылас жө пө торксьылөма кынөмыс...

Сы йылысь, мый Степан Фёдоровичлы уна нин дөнзылөма олөмас, позьө казавны и чужөмыс серти: ёнакодь чукурөсь сійө, көть эськө абу висьысьяслөн моз виж, крут кымөса юрыс джынвийө кушмөма да дзормөма. Сөмын, гашкө, руд синьясыс важ моз томон кольбө

маоьс. Да нөшта серамыс. Да вөрасъясыс. Да сылы кола-
натор вөчөмө том зон моз уськөдчөмыс...

Питирим ёна томджык Степан Фёдорович серти, ко-
мын сайо сылы, и мыгөрнас төдчымөн ичөтджык. Кор
сийо паскөма, видзөднысө быттө зэв вийөреникөн ка-
житчө. Но өні, пөрччысьөм бөрас, абу сьөкыд казявны,
мый ёна сөнөд мортыс, нюдз бадь кодь. Төдчө, мый не
этша винёвлун да вын эм сылөн, көть эськө ни морөсыс
абу лыбөма, ни йөг кодь мускуляс оз быглясьны.

Кык пасьтөмыд вылө видзөдигөн бура казялан, ку-
тшөм разной йөз найо. Питирим зэв еджыд кучика-яя,
сы диньн ыджыдджык ёртыс, муговджык да, позьө шуны,
негр кодьөн кажитчө... Сөмын чужөмыс да голяыс Поти-
римлөн, ывла вылад уджалигөн, ёнакодь гожьялөмаоьс
да тшупөдөн торьялөны тушасьыс, быттө мөд морт-
лөнөсь найо...

Русыд юрсисө Питирим дженьыда шырөма да гөгрө-
сіника шыльөдөма кымөс вылас. А кымөсыс да нырыс сы-
лөн өти визь серти мунөны, ныр тшупөдыс пөшти сөвсем
абу; таdzi лөсийөм чужөмаясыд войвылад быттө шоч-
дыка паныдасьлөны...

А шуны кө мыйкө Питиримлөн этш йылысь, то позьө
төдчөдны, мый сийө абуджык сёрниа морт да озджык си-
бав йөз динө. Позьө шуны, мый унджык сёрнисө сийө нуө-
дө ас кежас, мөвпнасджык быдторсө видлалө да кусньөдлө.

— Но, раб божий Степан, вай жө бара пыртчылам
таво кежлө! — гажаа шуис ыджыдджык чери кыйысь да
тыв бедь кватитөмөн бузгысис ваө.

Кузякодь мунисны да лэптисны өти кельчи. Но мича
кельчи, пань кузя!

— Ур-ра, юквалөн витөд пайыс эм! — радліс Степан
Фёдорович.

Сэссия лэптисны куш сөмын... васө, весиг лёк нятшая
эз шедны, абу на удитөмаоьс быдмыны.

Видзөдоны — водзын, веж турунөн дорөсалөм векны-
дик курья йылын, сөдз да дэбыдмөм ваас, чөла куйлөны

кык нывбаба, нывъяс ли. Абу на жö удитöмаoсь гождьявны таво кeжлö, и быттö еджыд сьoма нельмаяс кыпöдчöмаoсь жуивидзыштны шондi водзас.

— Ак тi, лешачикаяс, став черисö тай тi миянлысь повзöдлiд! Сы пыдди öнi асьнытö кöвтыштам! — лэчыда шыасис Степан Фёдорович, ачыс зэв азыма видзöдö ляпкыд ва пырыс бура тыдалысь нывъяслөн еджыд мыгөръяс вылö.

— Кöвтыштöй! — вильыша шыасис öти нылыс, сьöд юраыс. — Отчыд кöть видлам чери туяс олыштны.

— А сэссия öд верман и рачö веськавны, — нывъяслань тывсö водзö кыскигмоз гөлчитис Степан Фёдорович. — Ми öд та ыласö эг шутитны локтöй, а юква сёйны кöсьям... — Сэссия Степан Фёдорович, буракö, тöдiс нывъясöс: — А-а, со тай кодьяс вöлöмаoсь! Радочка да Розочка!.. Видзöдлам, мыйта чери вöтчис тiян бöрся, ставыс пышйис ли..

Нывъяс сувтисны куйланiнысь — купальникъяс кежысь жö сöмын — да кутисны резсьыны ляпкыдик курья йылас, воча повзöдлöны черисö.

Лэптисны тыв, а сэнi кык ёкыш, пурт кузяöсь, тшöгöсь, скöрысь шпорöдчöны чорыд щöтъянаныс, да весьтмöда сирпи дышиникпырысь чеччалö-вeглясьö.

— Аддзанныд, Степан Фёдорович, кутшöм ми шудаöсь! — радлiс сьöд юраыс, нöйтчысь сирпиöс киас мый вынсьыс кутiг. — Öнi миянöс тшöтш ковмас чукöстны юкватö панаявны.

— А мый нö, чукöстам, чери новлöдлысь пыдди кö уджыштад.

Нывъяс радпырысь кöсйысисны татшöмтортö вöчны. Визувджык Роза босьтiс киас вöсни сутугаысь кыöм садöк, вугйöдыс кутöмөн лэдзис ваö да сiдзи кыскö — мед пö оз кувны чериясыс. Ыджыдджык чойыс — шоча паныдасьлысь коми нима еджгов Райда, сийö абуджык Роза моз варов да чиктылысь — пуксис пыжö да сэтшöм жö нимкодпырысь кутiс сынны кöвтысьяс бöрся.

И чери кыйöмыс лон ёна гажаджыкөн, көть эськө и омöля шедіс, көть эськө унджыкысысьсö кушөн лэптылісны көвтымсö.

Пöжö лун шөр кадся шонді, меліа шонтö кыйсьысыяс-лысь кузь төв бöрын нярмөм кучикъяснысö. Кор вывтіджык нин кутас жайгыны, найö пыдöджык пыравлöны турун көра ваö, тюльскысьлöны-суныштлöны тывсö кыс-кигмоз, варчылöны векныдык курьяяс вомөн. Истреби-тельяс моз дзизъялöны-гöгралöны лөдзьяс, корсьöны йöз вылысь сэтшöмин, кыті эськө чöскыдджык налы вöлі, да мед эськө морт эз судз найöс дзобнитны сэтысь. Вазни-тасны-курчасны, виччысьтöмысла морт ойöктö да бара дзумгысьлö ваö — мед сідзи мынтöдчыны көин горшысь... Номъяс оз на тыдавны, найö, дерт, дзевсясьöны шоналөм ваын йöймытöдз пуритысь веж бадьяс пövстын. Номъ-ясыд полöны жарсьыд, полöны, мед госныс оз сыв. Либö чöжöны выннысö рыт кежлö, мед сэки сынисады уськөд-чыны став ловья вылас.

Кор көвтысыяс ёнакодь нин ылыстчисны дача дорсянь, налы паныд уськөдчисны кузь ныра да йыла бордыяса кык тевтя. Быттö еджыда-руда ньövъяс мөвкъялöны. Скöрысь чишнитласны дзик юр весьтöдныс — а тевтяс-ыд тай лэбалöны кызкө быттö öдöбтчылöмөн, — здук кежлö пуксьыласны матысса джуджыд коз йылö, сэсса бөр тювкнитасны сэтысянь. И сэтшöма видчöны. Сэтшö-ма видчöны!..

«Тев-тев-тев-тев! Тев-тев-тев-тев!»

— Но ладнö, ладнö, лөнбöй, ог сэсса мунöй водзö-сö, — шуис ярмөм тевтяяслы Степан Фёдорович. — Юк-ва вылö лонис миянлы, бур юква вылö... Асьныд ті шыд вылö онö жö туйöй, ружийö миян абу ни...

— Тыдалö, позтысьомаось кытчöкө матіö, — сьölөм сетіс Райда. — Быдөн öд полö позтö рөзöритöмысь...

— Быттö горзöмыс налөн отсалас! — шуис татчö Роза. — Горзöмнад найö сöмын явитöны гусяторсö.

Питиримлы тевтяслөн вийсьомыс оттор-мөдтор уськө-
діс төд вылас, и сійо шуис лабутнөя:

— Буракө, быд мам... и бать тшөтш... чайтө асьсө ас-
лас ниян дінын ставсясысь вынаөн да немторысь оз пов...

— А тиян нө та кузя эм нин опыт? — пырысь-пыр
жө дөжныштіс вильыш Роза. — Быттө зэв на томөсь
видзөднысө да...

— Хы!.. — сөмын и вочавидзис Питирим.

II

Терем-теремок кодь пелькиник да мичаник, йыла юра
кык судта дача горулө, курья дорө, пестісны гажа бипур
да отувья вынъясөн заводітисны пуны юква да чай. Став
вөлөганысө, коدلөн мый вөлі, ректісны тані жө сулалысь,
кыз пөвьясысь тувьялөм пызан вылө... Сэссия коді чери
керө, коді картупель весалө, коді кос увьяс ваялө...

Лун вочасөн кусө... Пашкыр веретяясөн вомөнавлөм
Эжва сайса видзьяс вылө, лунтыр бура уджалөм бөрын,
тэрмасьтөг лэччө ыдждөм, пөсь вынсө лунтыр койөмысла
көдзалыштөм шонді. Гөгөр лөньома дзикөдз. Паськыд
курьялөн веркөсыс шыльыдсыс-шыльыд, югыдсыс-югыд,
черияс долыдырысь гыбалөны сәні. Тывйө эз пырны и
өні со, видзөд, дэльөдчөны. Радөсь.

Сьөлөмсянныс трещкөдчө бипур. Чөскыдысь-чөскыд
юква дук кылө. И азыма зыньгөны номьяс. Зэв уна ном!

Райда да Роза сулалөны би дорын да мый вынсыс
өвтчөны ловпу корөсыясөн, шлөйөдлөны наөн куш кок-
чөрьясаныс. Найө абу узьөмөн воөмаөсь, рытнас бөр
көсийөмаөсь лэччыны карө да содтөд көлуйсө абу бөсьт-
лөмаөсь сьөрсыныс... А өні со юква дінад ылалісны: вай
пө инө тшөтш узьөдчам, а аски водза-водзсянь, өти са-
йын, бара на гожийөдчыштам. Роза ветліс телефон діно
да звөнитліс гортас.

Степан Фёдорович өшлө тшапөдьяс вылө көвтымсө,
Питирим пусьө. Сійө яндысьыштө нывьясысь. Сійө век

яндысьыштö нывъяссыд. А тайöяс со абу нин ёна томöсь вöлöмаöсь. Лэчyd кывъя Роза пö вит во нин верöс сайын, лётчик сайын, нель арöса пи пö нин быдмö налөн. Ыджыдджыкыслы, Райдалы, кызь көкъямыс арöс нин пö. Но абу на петавлöма верöс сайö, Степан Фёдорович öнтай ставсö та йылысь висьталіс... Питиримöс не этша чуймöдіс тайö юöрыс, Райдалөн верöс сайö петавтöмыс. Сы вöсна, мый сійö кажитчис шаньджыкөн ичөтджык чойыс серти, сьөлөмаджыкөн да, буракö, төлкаджыкөн. Степан Фёдорович висьталіс сідз жö, мый Розаыс — сьылысь, а Райда — учительница. А батыныскöд пö ми важөн нин öтлаын уджалам, ыджыд морт пö сійö, төлка морт.

— Роза, талун тэнö летуныд дзикöдз вылö нин воштас, — гажаа шуис Степан Фёдорович би дорö тшöтш матыстчиг.

— Нинöm, — пырысь-пыр жö воча шыасис лэчyd кывъя Роза, — ачыс тай нö век лэбалö, гортö лючки оз и волы, да ме ог вошты сійöс.

— Гажыс бырас да, вермас на и татчöдз лэбны, — водзö шмонитіс Степан Фёдорович.

— Оз лысьт, ме тшöкті сылы кага видзны, — воча сераліс Роза.

— Кыдзи нö сійö лысьтіс лэдзны тэнö öтнадтö? Астöгыс?

— Ичөт на сійö менö кутысьыд!

— Ки йылас пö новлөдлө да?

— А мужикыс нö абу öмöй сы вылö — мед аканьöс моз новлөдлыны ми вокöс? Оз кө öд кут новлөдлыны, позьö на и вежны сэтшөмтö.

— Розка, мый сöран нинöm абусö! Йöзыс мый думыштасны! — Райда чуймыштöма чойыслөн татшөм сёрниысь.

Розакöд водзö на гөлчитіг Степан Фёдорович шөрыштіс сьöd нянь чөлпанысь чорыд коркасö, кыза ниртіс сійöс чеснөкөн да, паньнас кутөмөн, здук кежлө лэдзліс пуысь юкваö. Тадзи пö юкवास нөшта на нöгыляджык лөö...

И збыльысь өд!.. Кор пуксисны газетон вольсыштөм пызан сайо, юыштисны еджыд вина — нывъяс тшөтш ичотикаон видлисны — да паньыштисны свежой пуоматорсо, ставон нимкодпырысь пондисны акйодлыны. Одийо ызъысь Роза медводзон висьталис сьолөм кылөмъяссө:

— Ме некор на эг сэйлы татшөм чөскыдсө!

— Тшын көр вöснаыс али мый татшөм чөскыднас лоөма? — шензис и азыма панясысь Райда, сылон лөзов синьясыс небыда югьялисны.

— А, ныланой, тани, буракө, ставыс нин сорласьөма, — кыпыда шуис Степан Фёдорович, том йоз динад сийо вөлі быттьо тшөтш ышмыштөма. — Сорласьөма муртса на кыйөм черилон свежой сөкыс и тшын дук, ловзьөм ывлалон унавевся корыс и виналон сотыштөмыс... Да-й, буракө, тшөтш и шондилон пөжөмыс, и асланым мудзыштөмым...

Но эз дыр вөв тайо нимкодьясьөмыс чери кыйысьяслон, сы вöсна мый на выло уськөдчисны номъяс. И пондисны дзейодлыны кузь нырьяснаныс быд восьсаино. Ти пө чөсмасынныд, а миянлы өд колө жө — ми пө абу пайтөм Макарьяс, а ловья ловьяс жө...

— Вайо каямой татысь дачао, кытчөдз дзыкөдз эз на вильодны! — медводзон дөзмис номъяс выло Роза.

Но чойыс, Райда, нюмьялигтыр кутис пыксыны:

— Этатшөм лөсьыдинсьыс огө на жө пырой... Керка стеньяс вылад гортад на эштылан пөттөдзыд дзоргыны.

Сэки Питирим тэрыба чеччис да пөв помон вайис бийсь жарсө дзык пызан дорө, нетшкис кольөм вося кос турун да вевттис сийон огырьяссө, и пырысь-пыр жө юква сэйысьяс еджыд тшын пиынөсь лоисны, а шойөвошөм номъяс дзизьялисны гөгөр, но эз нин лысьтны матыстыны. Буракө, тшыныд миянсьыным на ёнджыка сёйө номьясыдлысь горш синьяссө.

— Мойдын быттьо! — кыпыда шуис Райда. — Кыалон зарныс со чусмө. Пуяс вылын дзользьоны медбөрья сьылысьяс... Коньөр номъяс вермасьоны тшынкөд...

— Тә, нылө, этшаджык кыа ылад видзөд, а то виньдан лыось ёкышнад, — өлөдiс Степан Фёдорович.

— Эта пасьта ю, а лючки чери абу... Тыпу! — шыасис татчө Питирим. — Вот миян Пещораын!..

— А мый тiян Пещораын? — дэльөдөмөн юалис Роза.

— Татшөм черитө миян оз и лыддыны чериөн. Жар чериөн шуоны...

— Мыйла нө буретш жар чериөн? — тшөтш пырис сёрниө Райда.

— А жар дырйи шедө да, йөй моз кайө быдлаө да... Татшөм черитө миян оз и сёйны.

— А мый нө тiян сёйоны? — водзө юасис Роза.

— Миян? Сьөмга, пелядь, кебөс, нельма... Сюян вомад солалөм тшытш, и сiдзи и сылө сәни. Вый быттьө... И немся лы абу... — Питиримлөн гожьялөм чужөмыс быдсөн югдылө тайө казьтылөмсьыс. — А кутшөм пөтөс: асывнас сёйыштан черисө няньторйөн, и лунтыр кынөмыд оз и вөрзъыв...

— Мыйкө тай нө ачыд чөскыд чери ылад абу жө ёнасө быдмөмыд, — виччысьтөг шуис Роза. — Кыдз шуласны, чер пу судта и эм...

Ставөн серөктiсны. Ачыс Питирим тшөтш гыгъялис и. Сәссия шуис шутитiгмоз:

— Мадаөй, сәни көдзыдыс лөка личкө. Шоныдыс этша... А шондiтөгыд тай немтор бурасө оз ләптысь — ни быдмөг, ни морт...

— А кытысьджыкөсь нө тi эськө? — юалис Райда. — Печораыд өд кузь...

— Горувсьыс, — варовмис винаөн гажмыштөм Питирим. — А чужлысьөма менам, стөчджыка кө нин шуны, көр дорын, тундраын... Бать-мамөй менам нәм чөжыс көръяскөд ветлөддiсны. Чумысь кындзи налөн некутшөм керка эз и вөвлы... Ме ачым дзоля дырйи керкатө эг төдлы ни...

— Да? — зөв ёна чуймис Роза. — Збыль али мый?

— Збыль, — вашъяліс Питирим. — Водзті прамой кяр видзсысьд век семьяыскөд отлаын кочуйтіс. Мед отса-сьысыяс вөліны. И мед челядьсө ичөтысянь велөдны көръя-яс дінө. Тшөтш и ывла вылын сьөкыд олөм дінө...

— Оти кывйөн кө, мед мортыслы кага дырсяныыс йи-джисны вирас природалөн чорыд законъясыс... — мөвпа-лігтырйи шыасис Райда.

— Сідзи, буракө... — ныв вылө синсө чөвтліг, шуис Питирим.

А Степан Фёдорович, коді ёртыслысь өнөдз эз на кывлы татшөмторсө, сөмын и нурбыльтіс: «Н-да...»

Питиримлы друг сәсся эз ло лөсьыд, мый водзвыв думышттөг паніс татшөм сёрнисө, кодысь быттьөкө дзу-гильмыштісны ёртъясыс, да шуис кыпыда:

— Сы пыдди ми вокуыс кынь кодь винелөсь быдмим... Ывла вылад век олігөн... Чужөмсяныыд ывла вылын нок-сиг-гудйысигөн.

Но со көнкө мөдлапөвса раскын виччысьтөг шыасис көк: «Кук-ку, кук-ку...» И пырысь-пыр жө мыла гөлө-сыс кузяла и пасьтала разаліс лөньөм вөр-ва весьтөд эзысь шыясөн, югыд да сөстөм горөн.

— Ок өд, матушкалөн гөлөсыс! — сьөлөм сетіс Сте-пан Фёдорович. Чеччис пызан сайысь да пондіс лөдсав-ны-пестыны бипур. — А мый, нывъяс, тшөтш эськө сьы-лыштінныд көкыс моз? Важөн нин эг кывлы тіянысь сьылөмтө... Керкаө тай оз на жө пырсы-а... Час, гажа би вөчам!

— Радуль, вай сьылыштам и эм, — пырысь-пыр и өд-дзис Роза.

— Позьө, — тшөтш нимкодъмис мөдыс. — А мый нө эськө сьыламсө?

— А вай көк йывсьыс и горөдлам!

Кык чөй пуксисны орччөн лөнь сынөдын гажаа ыр-гысь би дорө, рөч дорышө лөсьөдөм пөв вылө, пельпомъ-яснас да юръяяснас топөдчыштісны өта-мөдныс дінө: өти-ыс еджгов, мөдыс мугыд, быттьө отлаын быдмысь томи-

ник кыз пу да коз, и Роза заводитіс нюркйӧдлыны кӧк-
лӧн кодъ жӧ сӧдз да мыла гӧлӧсӧн:

Кӧкӧй, кӧкӧй, мый тӧ кӧкан
паськыд Эжва сайын?
Висьтав меным, кӧкӧй,
муса другӧйкӧд кор ме
аддзысла?
Кук-ку, кук-ку, кук-ку.

Степан Фёдорович да Пителирм нёрвчӧмаӧсь би мӧ-
дарса эжа вылӧ, кывзӧны, шоныда видзӧдӧны сбылысь
чойяс вылӧ, а чужӧмъясас и синъясас пӧртмасьӧ-тӧдчӧ
шызьӧдӧм ловъясныслӧн ворсӧмыс.

Кӧкӧй, кӧкӧй, мый тӧ кӧкан
тшӧкыд рас шӧрын?
Висьтав меным, кӧкӧй,
менӧ важ моз-ӧ радейтӧ?
Кук-ку, кук-ку, кук-ку...

Пителирм кывзӧ и быттӧ став вир-сӧннас кылӧ, кыззи
сылӧн лов пытшкын садьмӧ-чужӧ ӧнӧдз кывлытӧм на
музыка, шензьӧдана лӧсьыд музыка... Юргӧ со, юргӧ... Сі-
йӧ быттӧ лоӧма мирыслӧн медся лӧсьыд шыяссьыс... Сӧ-
тшӧм шыяссьыс, кодъясӧс сійӧ сы дыра нин корсис, но
ӧнӧдз на эз вермы аддзыны...

Сылы сӧтшӧм нимкодъ тайӧ шыяссьыс, но тшӧтш и
шог... Шог, мый сӧлӧмас шоча садьмывлӧ, шоча юргывлӧ
татшӧм сямайс... Мый сылӧн медся югыд кӧсийӧмъясис,
ыджыд мечтайс лӧбалӧны кытӧкӧ зӧв выліті, и некыз
он вермы судзӧдны найӧс... А олӧмыс кольӧ... И пыр
ичӧтджык надея лоӧ найӧс судзӧдны.

Кӧкӧй, кӧкӧй, мый тӧ кӧкан
кыа кусӧгӧн?
Висьтав меным, кӧкӧй,
муса гӧтырӧн шуны кутас-ӧ?
Кук-ку, кук-ку, кук-ку...

— Ок и гөлөсьяс сетләма тиянлы енмыс! — пөся шуис Степан Фёдорович, кор нывъяс небыда кусөдөмөн мед-бөръяысь шуисны «Кук-ку...» — Кывзан, и ставыс вун-лө... Быттьö кутшөмкө югыд праздник лолö. Дивöнад он тырмы!

— Менам некор жö оз вун тайö рытыс... — ыджыд-джык ёртыс бөрся пөся шуис и Питирим. Синъясыс сы-лөн вöлины вазьöмаöсь, и кызкө дзикöдз пыркмунöма чужöмыс.

Узьны водтöдз Степан Фёдорович петкöдлiс Питирим-лы дача пытшкөссö, налөн учреждениелөн пö тайö шойч-чан керкаыс. Жыръясыс вöлины джуджыдöсь, паськыд öшиньясаöсь и зэв сөстөмөсь, бур пызанъясаöсь да выль диванъясаöсь, и Питирим казялiс, мый сылы, электро-сварщик мортыдлы, яндзим кольччыны татчö узьнысö, торйөн нин татшөм нывъяс дырйи.

Керкаыс и пытшкөссияныыс тшöтш вöли терем-теремок кодбөн; тöдчис, мый сийöс думыштлөма абу ныж вежөра морт, а писькөс мөвпъяса морт, кодi унатор водзвыв ар-тыштöма, мед эськө ёнджыка бурмөдны шойччысьяслысь ловнысö.

Питиримöс не этша шензьöдiс вылi судтаö катöдысь поскыс. Сийö вöли векныдык да кыпöдчис вывлань на-паръя этшөн, и сэтшөм любö вöли тувчавны көмтөм кокъяснад неважөн краситөм, пөлөс тшупöдъясöд.

Нывъяс узьмөдчисны вылi судтаса ичөтик жырйö, кытчö абу на вермөмаöсь пырны быдлаö сибалысь номъяс. Мужичöйяс меститчисны улiö, зэв ыджыд жырйын да вер-рандаын наысь кындзи некод жö эз вöv.

Степан Фёдорович, мыйөн сөмын инмөдчис юрлөс дi-нö, пырысь-пыр и унмовсис. Весиг папироссö эз удит по-мөдз куритны, кустöгыс и уси кисыс джоджö. Мортыд сэтшөм чөскыда пондiс коркйöдлыны... Дерт, мудзöмыс сюрыштiс тывтö кыскалiгөн.

Пондiсны зыньгыны номъяс. Первойсö найö быттьö эз кывны, а öнi со кыськө унакодь петiены, сьöрсөн-бөр-

186961

ДЕТСАЯ БИБЛИОТЕКА

17

сьон сідзи и вооны рөмыдсьыс. Небось тай аддзёны, коть и посни синмабсь.

Питиримлөн чөсөдыштө вывтіджык гождьялөм кучикыс, чорыдджыка лои босьтөма талун шондисө да. Жар быдсөн. Оз вермы унмовсьынысө, коть и ёна окоата, быдлаті мудзөма... И номьясыс со, лёк горшъяс, дөзмөдчёны. Сөмын на заводитласны чөскыда клеитчыны син лысьясыс, кыдзи — дзинь! — пуксьө выль пират... Питирим весиг кучикнас кылыштө сылысь пуксян шытөвсө... Пуксяс, и пырысь-пыр жө дзенгө лэчыд нырнас. Быть лоө шковгыны ки пыдөснад, и сәки бөр жбыркнитө-лэбө муртсаник лепитчышtlөм узян унмыс...

А Степан Фёдорович со йиркөдө-шкоргө, пельтө косялө. Оз ли мый нө мөрччысылөн пөрысь кучикө номьясылөн дзенйөдлөмыс?

Дыркодь песьсьөм бөрын Питирим кватитіс мездорас вольпасьсө да гусьоникөн петіс веранда вылө. Сәні вөлі ыркыдджык и лунын кодь югыд, сы вөсна мый гөгөр стеклө, а ывла вылын лювьялө июнь төлысса югыд вой. Ошинь сайын төвру муртса вөрөдыштө еджыд гырка кызьяслысь том корьяссө, кузь лыска пожом увьяс любөпырысь өвтчыштёны... Восьтыны эськө өшиньсө да унджык лэдзны войся ыркыдсө, сәки, гашкө, и унмовссиджык. Но лысьтан өмөй? Оти здукөн эськө шөтас-пырас номйыс. Со тай мыйта лэбалө өшинь сайын, корсьө пьськөдчан розь. Мутивөйясыд, буракө, кутшөмкө ногөн кылөны мортлысь ловъя дуксө. Небось тай кылөны, коть и сэтшөм вөсни нырабсь.

Вочасөн сәссия и думьясыс кватитёны вийсьысь-бергалысь Питиримөс да дзикөдз нин вөтлөны унсө. Налөн выныс, буракө, ёна унджык номьясыдлөн дорысь, шашаритчасны кө, некыдзи он мын.

Питиримлы бара лоө зөв гажтөм, бөръя каднас пыр частөджык и частөджык овлөсылөн татшөмыс. И кызкө зөв өткөнөн пондө асьсө кывны. Сэтшөм өткөнөн!.. Олөмсьыс код төдас кытчөдз ылаләмаён да торьяләма-

өн... Оз-ө сійө енежын отка кодзув моз гограв йоз пытш-кас? Некод дорө бура сибодчывтөг?.. И сьолөмсьыс со важ дойясыс быттьө выльысь вощьоны да заводитоны сөдзтысьны сьод вирөн... И некытчө он пышйы наысь, он небзьод, он кусод найос ни графинын сулалысь кодзыд ваон, ни лыс көра вөр сынөднас...

Быттьө тай нө сэтшөм лөсьыд луныс вөлі, мыйла нө эськө өні ставыс мөдар путкыль бергөдчис?

Юасьө асьыс тадзи Питирим и регыд гөгөрвоө, мый нывьясыс шызьөдісны сылысь лөнълөм нин ловсө. Вувзьысисны сэтчө кутны вермытөм төв ныр моз да и чущаш вөчисны ставсө...

Бара на бабйөсянь дой! Куш сөмын дой найө вайөны... Питирим некор нин, ньотчыд эз көсйив сибодчывны на дінө, а со тай, туркнитісны кыськө вөрсяясыс... Васаясыс ли...

Да мый нө сійө, Питирим, вийсьө та понда? Аддзөма тай мыйысь шогавны! Эз на өд сійөс некод дінө домавны, енежөд шывкъялысь варыш кодь на сійө: кытчө колө — сэтчө и лэбас, мый колө — сійөс и вөчас. Тырмас, отчыд шедліс нин бабйөдлөн йөй гыжйө...

Такөдө асьсө тадзи Питирим, а вежөрнас бара нин выльысь аддзө шоныд ваын куйлысь нывьяслысь еджыд мыгөрьяссө. Аддзө и — пөсявлө... Аддзө, кызди нывьяс, том нывбабаяс ли, пукалоны орччөн, өта-мөдныс дінө нөрөвтчөмөн, би югөрьяс пөртмасьоны сөстөм чужөмьяс выланыс, пукалоны найө и дзольгөны-сьылөны, сэтшөм лөсьыда сьылөны...

Сылөн гөтырыс, кодкөд Питирим торйөдчис дас во сайын, сьывліс жө... Сөмын эз гортас... Гортас сійө бөрья-помыс мөд ногджык сьывлывліс Питиримлы...

Тайөяс гортаныс гашкө и мөд ногөн жө сьылөны?..

Но и мед, сылы нө кутшөм делө! Мед, коді кызди ку-жө, сідзи и йөйталө!..

Вөтлө татшөм думьяссө Питирим, но найө нин кру-кыштөны выльясөс, нөшта сатөкджыкьясөс — найө не-

тшыштöны юксьöм гöтыр дiнас кольöм пи йывсьыс леж-
нöг кодь сатöк думъяс...

Аслас сьöлöмысь ловъя ёкмьль колис Питирим сийö
нывбаба дiнас... Тайö мырдысьөн нетшыштöм ёкмьль
вöснаыс лючкисö оз и бурдлы сьöлöмсьыс ранаыс. И кы-
мын водзöджык олö, кымын чукöрмöныджык воясыс, сы-
мын ёнджыка доймö сийö ранаыс...

Од сийö, Питирим, кöсйылис пöльыштны пиыслы став
ловсö асьыс, кöсйылис сетны став сямсö, кöсйылис ёнджы-
касö куш сöмын сы ради и овны. Мед эськö пиыс, сьөн
чужтöмаыс, ичöтысянь бура ёнмис-сöвмис да тшötш и сы
пыдди, Питирим пыдди, пырис водзö олöмас, мед эськö
могмöдис тшötш и сылысь, Питиримлысь, ыджыд кöс-
йöмьяссö, кодьясöс ачыс сийö, буракö, оз нин вермы вöч-
ны. Од асьсö сийöс некод тадзисö эз велöдлы, некод эз ну-
öd медся колана да кажитчана ордымöдыс... Сылы аслыс
олiгчöжыс ковмис кызисюрö борсьыны-кавшасьны, сьö-
дас каттысьны, мый вöсна сийö зев этша удитiс вöчны,
кötъ эськö комын витöд арöс нин тыртö...

Но эз тай сiдзи ло...

Сылөн кагаыс мöд мортöс батьөн шуö... Мöд бать бу-
рöдö сийöс доймылiгьясö... Юрсиöдыс кватитöмөн зульöдö
ли... Ньöрийөн вачкалö ли... Йöзыдлөн öд, көнкö, абу
жаль...

Ок, олём, олём!..

Мед джагалöны му вывсьыс став бабийöыс! И немтор
на йылысь думайтны... Сийö сэсса нэм чöжыс некодöс, не-
кутшöм вожа бöжаöс матö оз сибöд ас дiнас! Некор! Мед
ötнас кö...

Вөр-ва сылы медся дона. Природа... Сылөн мелi сывъ-
ясö вöйтчöмөн, шензьöмөн и нимкодъпырысь кылан му
выв олöмыслысь öтырышъя туёмсö, помасьлытöг водзö
мунёмсö. И быттö бырлöны став дойясыд... И тайö бур-
сьыс некутшöм водзöс оз ков сетны...

Онiя уджыс бурмöдлö сьöлöмсö и... Кор тэ ставсяыс
медвылын, кар весьтын, дзужйöдлан-сваритан электродөн,

йитан сьöкыд каркасьяс, и вочасөн артмö ыджыд завод либö джуджыд труба... Мукöдыслөн юрныс бергöдчö та вылнаас, а сьлөн, Питиримлөн, оз...

Да нöшта музыкаысь оз кут кöдзöдчыны сийö!.. Öд музыкаыс ичöтысянныс олö Питиримлөн лов пытшкын. Гашкö и тундра эрдьясын Войпель шутьялёмкöд пырöма. И кор тэ кылан сийöс сьölёмсьыд, быттьö мортöнджык ачыд аслыд кажитчан...

Ок эськö, аслыс кö тэчны кутшöмкö лöсьыд сьыланкыв! Медся лöсьыдсö!.. Мед эськö ылöдз-ылöдз лэбис сийö...

Со тай кутшöм лöсьыдöс тöрыт сьылісны нывъясыс... Сийöс öд йöз жö лöсьöдлісны...

Но бара на нывъяс казтыштсисны! Да морыс мед лыйö найöс! Мый сийö пондiс тадзи думайтны войбыд?! Пез номъяс ставсьыс мыжаöсь, узьны оз лэдзны...

«Колö ветлыны гортö, Печора вылö... Гажöй ёна нин бырöма... Мамöяслы турун пуктыштны... Чери кыйыштны... Миянладорын кö вöлім, позис на сьöмга пызан вылö лэптыны... Кыдз эськö сэки пондiсны сёрнитны тайö артисткаясыс-а?..»— татшöм думъясөн кутiс жö сэссия унмовсьны Питирим, вежöрсö укшальмытöдз песöм бöрын. Ывла вылын сьылісны нин водз садьмысь кайяс. «Гашкö, Степан Фёдоровичсö тшöтш нуöдлыны Печора вылас? Мед чöсмасьыштö бур черинас... А гашкö, и нывъяс-сö тшöтш нуöдлыны?— виччысьтöг дзенöбтö мөвп, бөр вöтлö унсö.— Сидзсö тай быттьö шаньöсь найö... Оз вылö пуксьыны ни... Позьö петкöдлыны налы миянлысь места-ясöс... Öд Коми му жö... Мед видзöдлöны, мый пасьта сийö... Да кутшöм уна бана... Отпускалігад мый и не ветлыны... Лэдзасны кö быттьö гортсаясыс...»

Ачыс оз гөгөрво öні Питирим, мыйла сылы друг тшöтш окота лои нуöдлыны и нывъяссö — öд сидзсö быттьöкö оз кöсий сийö сибöдчыны некутшöм бабийö дiнö. Но и кыдзкö кылыштö Питирим, мый сылы эськö любö вöлі тшöтш нуöдлыны тайö нывъяссö гортланьыс, паськыд Пе-

чора кузя накөд өтлаын кывтны, озыр вөр-ва петкөдлыны...

Со өд кызди вөрзёдіс морттө позтөм көклөн эзысь горөн көкөмыс.

III

Август помланьё куимөн лөсьөдчисны мунны Печора вылө — Степан Фёдорович, Райда да Питирим. Печора карөдз лэбисны самолётөн. Сэтысянь колө кывтны теплоходөн суткиысь дырджык. Райда сөмын нимкодясис таысь — өд сійё первойысь на веськаліс Печора вылө, и сэтшөм окота сылы быдтор аддзывны ас синъясөн.

Дыр сулалісны пристаньдорса джуджыдсьыс-джуджыд керөс йылын да видзөдісны Вой саридзлань паськыда шывгысь ю вылө, сылөн помтөм-дортөма лөзалысь ковтыс вылө. Ок и ловтө босьтысь серпас!..

А орчөн, изйысь лөсийөм да вылө кыпөдөм ёсь ныра пыжын, сулаліс татчөс озыр муяссө пөсь сьөлөма төдмалысь учёнй Русанов да, шапкасө юрсьыс пөрчөмөн, тшөттш видзөдіс, видзөдіс Войвывлань, быттьө көсийс өд-йөджык казавны, мый дзєбсясьө сәні, кутшөм озырлуньяс нәмьяс чөжыс видзө йөзлы тайө көдзыд и мича муыс.

А со мөдлапөлын вөр весьтө юрсө вылө лэптөма нефтянөй вышка. Райда төдө: матысь и ылысьджык, Печораө усысь Уса вылысь, аддзөмаөсь уна нефть. Печора боксянь жө, Вуктылсянь, «Вой кыалөн» кыз трубаясөд ыргө-мунө газ. А көнкө на водзын эм Воркута, из шом тыра аслас гөбөчъясөн, лыдтөм-тшөттөм сьөд зарниөн...

Вермис кө эськө кывны-төдны ставсө тайөс изйысь вөчөм Русановыс! Көнкө эськө ёна и радліс...

Райда лэччыліс берег дорө мыссьыны, и сійөс ёна чуймөдіс Печоралөн ваыс — синва кодь сөдз, пыдөссьыс став изйыс и визула тювкъялысь посныдик черияс бура тыдалісны. Көть эськө ва веркөсас берег дорөдыс тшөкыда кодь жө нин гөвкъялісны лөза-гөрда мазут кеньяс.

Луныс вöлі шондіа, но Сыктывкарын серти тані ёна ыркыдджык. Пöльтіс чизыр вой тöv, мыйысь йöжгылясьысь Райдалöн кыдзкö тöдлытöг вежöртсис: «Шльвгö Печора, и лов шыыс чорыд...»—и аслыс кажитчис тадзсö вежöртöмыс.

Сэссия, сулалігкостыс, друг кысыкö петіс зэв уна геб, и кутшöмкö зэв гырысь геб, паськыд бордъя. Райда некор на татшöмсö эз аддзыв, кöть эсыкö вöрад да ва вылад ёна жö ветавліс батыскöд и челядькöд. Сідзкö, ылын тай вöлöма Печораöдзыд, гебйыд кö нин мöд кодь тан!..

— Миян, кöрдорсаяс, гебсö нимтöны ташкаөн,— висьталіс Райдалы Питирим.— Мукöд дырйиыс син ни пель петас ташкаыд, ёна дöсадитчылö...

Теплоходвывса команда дзоньнас сёрнитіс изьваса нөгөн. Зэв сьölөмсянь, тешкодя нюркйöдлөмөн.

— Нясти кокнас кыччö каан?— горзіс кодкö вылö контролер.— Ин пыр тадзи, лешакö-мортö...

— Рöбетаыс, мадаö, öні менам сэчөм и лои,— орччөн варовитіс маличаö пасьтасьөм тьötка.— Ныла-пия ордö гөсти ветла, куччöдз лооя на..

Каютаын нельöд мортыс изьватас жö веськаліс. Отпускавны пö лэчча гортö, сиктö.

— И, дерт, чери кыйыштны?— наяна юаліс Степан Фёдорович.

Мöдыс чöскыда серöктіс:— А кучөм нö отпуск черитöгыс!

Вöлі сійö ар комын вита, шөркодь тушаа, зумыд и рыжой. Кос лыс рöма сук синкымьяс увсяньыс мудера видзöдісны негырысь лөз синьяс. Восьса морөсыс и тыр вира кыз голяыс висьталісны сы йылысь, мый тайö дядыс ёна нин öжигайтчöма паськыд Печора вылын.

— Велöдін кöть öти сьöмга кыйны?— водзö варовитіс сыкөд Степан Фёдорович.

— Оз позы!— гажаа сераліс мöдыс.— Кутасны!

— Бытьö тэ ачыд он и кыйлыв сьöмгасö?

— Ме? Шедө кө, мыйла ог! — гажьяліс изьватас. —
Ог бара бөр лэдз... Айё кыйліс... Айёлөн айыс кыйліс. И
ме кыя... Асланым ю дорысь да мед не кыйны, мамтö
шогөдісь!

— Вот и велөдін эськө тшөтш...

— А некучем велөдөм оз коо! Кулөмтö лөсьөд ун-
джык: кыксё-куимсё метр. Сэссия Печора вомöныс чөвт —
өтарас пыж и мөдарас тшөтш пыж. И кылөдчы. Сэссия
өти пыжа вывланын, верст куим-ө-нөль сайын, ракетнича
сылөн выим. Мөд пыжа — тадзи жö — увланын, бара
жö ракетнича выим... Казялө кө рыбинспекторөс — выв-
ланы лыйö ракетничаысь, мед өлөдны кыйысьсö...

— Да өд тадзнад быдса флотилия колö сьөмгатö кый-
ны! — чуймис Степан Фёдорович.

— А кудз жö мөдарнисö! — сералис изьватас. — И
быдлөн «вихрь» мотор пыжасныс...

— И тиянөс ньөтчюд на эз кутлыны? — шемöса юалис
и Райда.

— Кыйсигам — из... Отчюд Печора карö петигөн нин
кучисны. Кодкө явитöма. Чемоданын вит чери вöлі, ставсö
мырддисныс. Да нөшта кыксё чөлкөвей штрап вочкис-
ныс...

— Та бöрын, дерт, сэссия эн нин петавлы сьөмга вы-
лад? — юалис Степан Фёдорович.

Изьватас мудера читкыртлис кос лыс рöма синкым
увсьыс шуйга синсö:

— Жар чериыд юөс лыа да... Абу чөскыд сыа...

Степан Фёдорович да изьватас дзикөдз варовмисны,
а Райда да Питирим петісны вылыс палуба вылө, көні вö-
лі шондіа и жвучкис уль руа ыркыд төв.

Паськыд ота Печора то шывгис дзик веськыда джу-
джыдсьыс-джуджыд вöра-сорса щельяяс костөд; то ляп-
кыд эрдьяс вылын заводитліс быттьö пöдны кузяла и
пасьтала тэчөм лыаысь, өдва и чукльөдліс-писькөдчис
лыаысь тэчөм толаяс пырыс.

Судно бõрся вõtчõны каляяс, гõгралõны мудз тõдтõг, дзик динтис чишнитлõны. Ошинь пыр шыбитас кодкõ нянь тор, и пуля моз тювкнитасны веськыда да стõча сы вылõ, õта-мõднысõ пановтõмõн, быттõõ снайпер лыйõ... И бара вõtчõны, пемдõ нин, а век вõtчõны. Велалõмаõсь... Йõз динад кокныдджыка сёяныд сюрõ...

А со немын ызгысис ыджыд чери, быттõõ еджыд торпеда качлис ва пыдõссыс.

— Сьõмга... — шуис Питирим. — Пуд кыка, гашкõ...

— Сы гырся сьõмгаяс эмõсь? — чуймис Райда.

— Эмõсь... Моресянь дыртõ катигõн быдсяма гагыс пõ сибдõ сы динõ. Вот и ызъялõ, весалõ тадзи асьсõ...

— Кытчõдз оз тшапнитны сийõс мян виль тõдсаыд кодь дядьбõяс.

— Да... Сьõмгатõ ёна кыйõдõны... Быд ногыс... Коди кызди вермõ... Печора кузяла... Оз позь, а всõ равно кыйõны... Кõть ловнысõ пуктасны сы понда... Сы вõсна, мый сыысь чõскыдыс, буракõ, немтор сесся абу свет вылас...

— Чужлас жõ этатшõм чери! — Райда ёна шызьõма. — И Печора йылõдз пõ катõ кульмыны. Моресянь...

— Да... сэтчõдз тшõtш катõ. Печораõ усьысь мукõд ю йывьясõ и...

— Дивõ!..

— Сёйтõг пõ катõ уна лун и вой. Лэдзõ пõк да нек, а сесся кызвыннас кулõ...

— Мыйся дивõис сõмын абу паськыд мирас! — пõся шуис Райда. — И видлы вот ставсõ тайõс гõгõрвоны...

А нõшта Райдалы кутшõмкõ ногõн вõли нимкодь; сыысь, мый тайõ быдõнлы сэтшõма колан дона чериыс бõрйõма аслыс олõм-кульмõм вылõ буретш Коми муысь сõдз ваа Печораõс; нимкодь, кõть эськõ, шуам, ачыс сийõ, Райда, зев на этшавысь чõсмасьлывлис тайõ черинас...

Рытывбыд пõtтõдз картасьõм да войсõ бура узьõм бõрын, аскинас шензигтыр видзõдисны, кызди ёна нин отасьõм Печораõ ыльгысьõ Усва ю. Пõшти Печора пасьтаыс жõ! Верст пасьта кõдзыд да сõстõм ва чепõсийõ вой-

вывсянь да аслас ыджыд вынён чегё Печорасё шуйгавыз, и лоё быттьо выль ю, море пасьта ю.

— Сы мында ва! — Райда шемёса чатрасьё гөгөр. — И ставыс синва кодь сөстөм ва!.. Но и дивө!.. И век на Коми му!.. Менам сэтшөм чувство, мый быттьо ми тулыс-сяньыс на ойдөм Эжва вывсянь век на кывтам-мунам Коми мулөн оръявлытөм юод, и некыз оз помась сийо...

— И став тайо юяс пөлөныс коркё со удитлөмаось овмөдчыны коми войтыр, — мый йылыськё мөвпалгтыр шуис Степан Фёдорович.

— Да... — сьөлөм сетис и Питирим. — Усва кузя найо пырөмаось Колвао, Вөркутао, а сәсса вуджөмаось Урал Из да и сэтчө овмөдчөмаось. Водзти пö тай öнiя Салехардыд Обдорскөн шусьылөма... Сыысь öтар, öнi на пö эм некымын коми сикт Обь пөлөныс...

— И дерт, сәкса дядьбясыс пырисны эз миян кодь теплоходөн, — шуис Райда.

— Төдөмысь... — серөктис Питирим.

— Регыд тані зэв гажа лоё! — шуис Степан Фёдорович, сийо тыр синмөн видзөдис Уса катчөс. — Сымда нефть аддзөмаось... Матысь... Колва усянінө быдса кар быдмас, Усинск...

— Сәки Усаыд тшөтш вермас гудырмыны, Изьва моз. — Питиримлөн кыза гожъялөм чужөмыс лои төжды-сянаөн. — Сәні пö тай лючки черыс оз нин ов-а...

— Гашкө, öнiя техниканад, öнiя позянлунъяс дырйид оз нин лэдзны татшөмтортө вöчны! — пöся шуис Райда. — Оз нин ёна пазöдны енмыслөн сетлөм мича да сөстөм вөр-васө.

Водзын, зэв джуджыд рөч йылын, уна керкаясөн сяр-видзис Усва-вом сикт. Ва дорсянь сылань катөдис лыдтөм-тшөттөм тшупөдъяса векныдык пос — кыз-мый и каян, ыджыд ноийөн кө!.. Усаөн ёна паськөдөм Печора вылын мураліс вой төв, сьөкыда ызгисны еджыд сорса гыяс.

Райда сулаліс төв паныд, төлыс вынысь нетшкис сте-

житом пытшкөсә болонь плащ пөлаяссө, зилис нөбөдны веж юрси вылас зэвтөм лөз беретсө.

Помтөм паськыд ва, лэчыд төлыс, ызгысь-швачкысь гыяс, войвыв мулөн өтарө вежласысь, төдтөм серпасьясыс — ставыс тайө кызкө ёна шызьөдис Райдаөс, и сылы окота лои мыйкө сьывны; но быттьөкө и некутшөм төдса мотив эз лөсяв өнйя ногөн лов кылөмыслы; и сәки дум вылас усины төрыт берег дорын чужөм кывьяс: «Шлывгө Печора, а лов шыыс чорыд...», и сийө кутис сьылөмөн моз гораа шуавны тайө кывьяссө. Сәк жө мөвпнас ёна выныштчис, мед эськө кызкө лададжыка тэчны найөс. Сәсся сийө шыясис Питирим дорө:

— Гижин эськө сьыланкыв аслад Печора йылысь... Муса Печора йывсьыд... А, Питирим Серафимович? Музыка радейтысьөн жө тай шусян?

Мөдыслөн курыда нюмыртчылис чужөмыс:

— Сямөй менам та вылө озджык на судзсьы... Да и мукөдыслөн гижөма нин...

— А тэныдсө өд тшөтш, көнкө, окота?

— Мый эськө абу окота да... Сәсся өд и бурджык кывьяс на колөны та могысь... Найөс лөсьөдлыны ме ньөти нин ог куж...

— А ладмасны-ө тэныд, шуам, со тайө кывьясыс:

Шлывгө паськыда Печора
Коми муөд уна нэм.
Мед көть лов шыыс и чорыд —
Мам кодь муса сийө мем.

— Тайө зэв лөсьыд кывьяс! — ырсмунис Питирим, көть эськө ачыс и лөнь сяма морт. — Тэ найөс ачыд думыштін? Оні?

— Мыйла нө дзик өні? Төрытсьянь нин Печорайд шензьөдө менө да...

— Райда — Райдочка! — пөсьджыка на шуис Питирим. — Вай тэ нөшта на думайтышт! Татшөм жө ладөн... Шуам, со эстшөм щелья вылын гортөй... Нияяс пөвстын...

Көнкө ылын дзор Урал пөртмасьö... Паськыд ота Печора сетö вын и смеллун... И мед эськө век лоö ставыс тайö...

— А мый, видла, видла!.. — тшөтш ыззис Питиримлөн виччысьтөм пöсьлунысь Райда. — Сöмын та ылын ёна ковмас юртö жуглыны...

— Райда, ме уна во чöж нин кыла сьöлөмын татшөм-сö... Татшөм шыяссö да ладсö... — И Питирим, югъялысь синъяса, кыпыда сьыліс Райдаөн сöмын на чужтөм кывъ-яссö...

Ставыс тайö ёна вөрзбөдіс и Степан Фёдоровичös, коді медводдзаысь на жö тадзисö кывтіс Печора кузя.

— Олөмыс... и мирыс збыльысь тай вөлөмаось интереснөйöсь... — ышловзбөмөн вомгорулас шуис сійö, война ылын чашнитөм мышка пöрысь салдат.

А рытъядорыс, теплоход ылысь чеччигкежлö, Райдалөн кывбур дась вöлі дзоньнас:

Шлывгö паськыда Печора
Коми муöd уна нэм.
Мед көть лов шыыс и чорыд —
Мам кодь муса сійö мем.

Гажа яг нöрысын гортöй,
Кöні ниа пожöм сор,
Кöні парма сайын ворсö
Дзор Ураллөн эзысь сорс.

Вöрын, ваын зіля кыйсиг
Чöжсис менам сям и вын.
Олөм шуд вöсна тшөтш вийсьö
Менам сьöлөм — абу кын.

Кыла лолөн, тані оліг,
Кутшөм мича чужан му.
Тайö мичыс мед век лоö,
Медым некодыр оз кус.

Шлывгö паськыда Печора
Коми муöd уна нэм.
Мед көть лов шыыс и чорыд,
Мам кодь муса сійö мем.

Тайос кывзигон Питиримлон дзикодз нимкодъмис лолыс. Сэтшөма нимкодъмис!.. Сийо быттё бөр аддзис зэв донатор... Кодос коркө, важон нин, воштылис... Сы дыра нин вийсис-корсис сийо... И сьолөмыс век эз вөв асинас... И со — сюрис... Тайо еджгов нылыс отсалис аддзынысö сылы... Эстшөм төлка ныв!.. Онi сийо, Питирим, дерт жө, коряс сьыланыслы — быть коряс! — сэтшөм шыяс, мед эськө сийо, сьыланкылыс, пондис ворсны-пөртмасьны стаз рөмъяснас, мед эськө сийос кывзигон век аддзин и кылин асьсö Печора-матушкасö.

Сөмын тай найос ставнысö та бөрын шогөдыштіс сөсся шуштөм серпас. Печора дорса джуджыд бадь бурысьысь, йивланьсьыс моз, найо казялісны паськыд лента, бадь бурысь вылас кузяла ляскысьөм лента.

— Мый нө тайо татшөмыс? — юалис Райда мужичөй-яслысь.

— Тайо, мадао, нефть перйысьяс мичмөдісныс Пещоранымөс, — зэлыда шуис медводзөн тані жө сулалысь изьватас. — Тулыснас авария вөлөма... Ю пасьталаыс кывтіс нефть. Со и колысныс вөнъ...

— Сымда нефть! — чуймис тшөтш и Степан Фёдорович.

— Тырмө тай сыа мяян му пытшкөсам, — шуис изьватас. — Оти лов сьөмга кыян, дак тэнө судитны вермасыс... А мыйта лов пропадитө тадзи Пещорасö пежосьтөмысь, мамтö шогөдісь...

— Да-а... — сөмын и ышловзис Питирим сьыланкывйысь кодзавтөм на лов тырнас.

IV

Крута шыбитөм векныдык трап кузя петісны няйт берегө. Вөлі пемыд, төла и кодзыд, буситіс зэр. Навысь кындзи некод сөсся эз чеччы татчө, и йөжгылясьысь Райдалы кызкө весиг шог лоліс, кор сийо медбөрьяысь чөвтліс синьяссö югыд биясөн ылыстчысь теплоход вылө: ка-

житчис, мый мирсьыс став шоныдсö сійö нуис сьöрсьыс...

— А кöнi оркестр? Мыйла музыкаöн абу петöмаöсь мянлы паныд? — зiлис шмонитны Степан Фёдорович.

— Он öмöй кыв, тöлыс кыдзи жвучкö быд пöлöс шынас, — тшöтш збодералис Райда, йирмөгсö венны зiлиг. — Музыка кодь жö.

Питирим чöла восьлалис пемыдас тракторьясöн ныръялöм туй пöлөн; кокъясыс сьлөн, ыли туй бöрын гортлань матыстчысь вöвлөн моз, тшöктытөг тэрмасисны.

Сьöд стын кодьöн сулалысь вөр ди вуджём бöрын, водзын, сук пемыдас, дзулкнитисны шочиник бияс.

— Со и воим мян Буткан карö, — шоныда шуис Питирим да водзлань нюжöдлис кисö.

Сэссия и медводдза пон — коми сиктлөн ун тöдтём видзысьыс — сетис гора гөлөссö, сылы шыасис мöд, коймöд...

Видза олан, Буткан!

Питирим вайöдис неыджыд пöлыньтчём керка дiнö, кодлөн öшиньясыс вöлины биаöсь. Гольöдчём вылö пырысь-пыр жö петис кодкö, восьтис öдзөссö.

— Мам, ме тайö, — шуис Питирим. — Абу öтнам ме...

Воысьяс водзын вöли кышöдтём, вушйём гöна маличаö пасьтасьём пöч, сьлөн радысла югзис чукурöсь чужöмыс, сiйö мелiалис писö, мукöдьяс вылö нимкодьпырысь видзöдис — мортыд эз и куж, мый вöчны.

Керка пытшкöсын вöли нöшта мöд нывбаба, важ модаа кузь сарапана, томджык маличаасьыс. Сiйö нимкодьпырысь и шöйöвшöмөн видзаасис жö воысьяскöд, сэссия уськöдчис самöвар дiнö: рытнас нин пö эськö пуктылим, но, гашкö, кодзалис...

— Кульсьö, мадаяс, кульсьö... Да кычö инö öбес дорас нопсö чöлан? Со тычö пукты, лавич вылас!.. — кыпыда сёрнитис маличаа пöч; сiйö некыз оз вермы палявны ыджыд радлунсьыс, ноксьö-педзö да медьёна видзöдлывлö яндысигтыр пöрччысьысь Райда вылö: код нö пö эськö лöö тайö матушкаыс? — Меся жö сьöлöмыс öтöрыш вочкö... Воас Питько — и толькö! Мальчаöс иг на кульлы

выламысь, рытыбыд... Тöрыт и... Куимысь нин войöдлi
улич помöдзис... Письмöад тай кöсийлин воны да. Колiс
инö, дитя, телеграм вочкины...

— А ми, Палаш тьöt, телеграмсö пановтiм самолётнад
лэбигөн! — гажаа шыасис Степан Фёдорович; кыкнан
нывбабайсылы кажитчис тадзсö шуöмыс, найö серöктыштiс-
ны да мелiальштiсны синнаныс — эстшöм пö варов гöсть,
весиг пö öд нимтö нин тшöтш тöдмалöма и...

— Турунтö нö бура пуктiнныд? — юалис Питирим пы-
зан вылö гöснечьяс лэпталiг.

— Ин тöждысь, бура пуктiм, — вочавидзис мамыс. —
Чойеыд ёна отсалис. Нарьян-Марсьыд волiс да мисеч
олис тани. Зонкаыскöд... Поводдяыс шань вöли и. Бур ту-
рун выим тööбыд кежлö.

Сэссия сийö шлaпкöбтiс кияснас малича кузяыс, ёна ян-
дысьöмөн шуис:

— Ой, мый инö ме полöкалö моз танъяла, киссьöм
мальчанас! Чое, лöсьöд пызансö, а ме, иныв, вежся...

Сийö тюрöбтiс-пырис мöд жырийö, а кор недыр мысти
бör петiс сатысь, Райда, да и Степан Фёдорович тшöтш,
шензвöмөн паськöдiсны вомнысö. Быттö мöд морт петiс
жырсьыс!

Вöляникысь вурöм шоньд маличанас кö бабöыс пер-
войысьсö кажитчис Райдалы кык кок йылын тапикасьыс
энь ош кодьөн, то öнi сы водзын сулалiс... пöрысь мадон-
на. Сэтшöм мича да аслыспөлöс паськöма öнi вöли бабу-
шыс! Сэтшöм лöсьыда да пелька пукалiс тайö паськöмыс
сылөн косньöд лысьöм вылын. И öд быгалöм сямöд кодь,
пöрысьысла ёна нин чукырасьöм, веськыд ныра векни чу-
жöмыс тшöтш быттö вежсьыштöма — гöстьяс воöмысь
югыд радлуныскöд тшöтш öнi быттö и тöдчö асьсö ёна
на морттуйö пуктöм, колана мортөн на асьсö кылöм.

— Бабе, но морö, тэ тай нö невеста кодь на! — шуис
Степан Фёдорович. — Кöть öнi жö тэкöд венеч улö сувт!

— А мый инö, вай суутам, — эз шöйöвош мöдыс.

— Бабуш, да тöданныд-ö кодь кодь тэ öнi? — син тыр-

нас пöчöс меліаліг шуис Райда. — Тэ öні Печораса Мадонна кодь!

— А коді инö сійö сэчöмыс?

— Мадоннаыс? — Райдалөн кыпьяліс лолыс. — Сійö — мада жö, сöмын муыввса йöзыс важысянь нин тöдöны сійöс. Зэв важысянь!.. И ёна пыдди пуктöны... Но вайлы кöть бурджыка видзöдла ме тэ вылö! — и ныв пондiс гöгравны бабö дiнын, юр вывсянныс да кок улöдзыс видзöдны да весиг малавны шöйöвошöм мадоннаöс.

Бабöлысь кымöссö джынвийöдзыс веськыд визьөн тшапа вевттис лöзоват кокошник, а сы весьтын юр вылас павкнитöма да зэлыд гөрöдөн гөрddзалöма кузь сыръя кашемир чышъян, кодлөн сьöd от вылын яра öзйисны лежнöг кодь алöй дзоридзяс. А кок под улöдзыс сарапаныс вöлі кык пöвста — вылісянныс гөрдоват сатинысь, а улісянныс гажа сера ситечысь. Татшöм жö кык пöвста вöлі и бабөлөн водз дöраыс, бансянныс сійöс эжöма кисьмöм мырпом рöма сатинөн. И кöть тайö вöччан паськöмыс эз нин вöв выль, дырөн новлöмысь чусалыштöма и мукöдлатыс вушйышталöма нин вöлі, — но сійöс пасьталöм баб Райдалы кажитчис некор аддзывлытöм дивö кодьөн.

— Чышъянасинсö инö мыйла? — нюмъялігтыр шыасис бабö дiнö чойыс. — Шоныд тай керкаыс...

— Но-о, кыз инö сытöг! — тöдчöданаа вочавидзис мöдыс. — Этатчöм гөсьяслы ог жö кут мыччöдлыны асюм пача юрöс...

Кöзьякаяс регыдөн быдторсö ваялісны пызан вылö: еджыда сярвидзысь рысьтö и тарытъя йöвтö, свежöй нөктö и косьтöм көр яйтö. Но век жö воысьяслөн, Райдалөн тшöтш и, медьёна югнитлісны синъясыс сэк, кор пызан вылын тыдовтчис ыджыд тасьтi тыр свежöя солалöм чери; чериясыс вöліны гырысьöсь, тшөгöсь, вундавтöмөсь, сьöкыда личкисны öта-мöднысö. Питирим путкыльтіс чунь помнас öтиöс, исыштiс да шуис:

— Пелядь тай, коді нö кыйыс?

— Ачум, — дөвөля нюмдіс мамыс. — Ачум на кыйыштыла, Кузь тысьыд... Лёк пыжыд сэн на оло... Куломъ-ясыд и... Лёка эськө шедө да... Куим-нэль чериён... Но ылөсө мунны ог нин лысыт, выныс вошөма...

— А усянныд кө ваас? Төв путкыльтас пыжнытө ли? — дзескалом лов шы сорыс юалис Райда.

— Пыжсьыд ме ог усь, мадаө. Ооны на көсья... А төла пөраө ог и пет ва ылө...

— Ме кымынысь сыла шуа: ин нин мун, чойө, ин мун... — ышловзис мөд нывбабаыс, Питирим ылө синбөжнас кыйкнитліг. — Он вермы кутны, бара и войөдас...

— Чөскыд черитөг ме ог вермы ооны, абу велалөма... Йөлыд мелы выим көть абу...

Юыштісны карса вина. Райдалы мыччисны медкыз чериыслысь шөр тшытшсө, сійө вөлі ыркыд, улиса да гөрдовата югъяліс би улын. Райда вөлі ёнакодъ нин тшыгъя-лөма, азыма курччис небыд тшөгсө, и шензьөдана черилөн ыркыд да быттё выя чигйыс курччавтөг пондіс сывны вомас... Торт моз жө кутіс сывны, сөмын тай эз вөв юмов, а буретша сола, мыйысь торйөн нин ёна бурмөдіс сьөлөмтө.

— Ой, чөскы-ыд! — нимкодъмөм лов тырнас шуис Райда.

— Сөй, мадаө, ёна сөй! — тшөктө пөрысь нывбаба, Питиримлөн мамыс, кодлы сэтшөм любө видзөдны гөстьяслөн том чужөмъяс ылө... — Омольтчөмыд со ёна, син гуранъясыд аминь ёна вөйөмаөсь... Карад оз ли мый вердлыны?

— Вөснныдыслы өд кокныдджык му ылөдыс тіркъявны, — сералис Райда.

— Сідзи эськө и эм да, мадаө! — варовитіс пөчө. — Ме ачум некор иг вөөлы кызнад. Кынь кодъ гостөмөн да пелькөн век вөөлі.

Век на чушкө пызан ылын самөвар, быттё тшөтш ышмөма век лөньөн овлысь керкаын талунъя гажсьыс. Райдалөн дзикөдз шоналөма лолыс. И быдлаті шоналө-

ма! Кокъясыс весиг пöжсьöны небыд көр ку тяпиясын, кодьясöс мырдысьөн тшöктис көмавны баб... Со кутшöм пельöсöдз шыбелитис сийöс, Райдаöс! Ёнакодъ полис вонысö, а зэв шаньöсь вöлöмаöсь пöчö-чойясыс, көть эськö и, видзöднысö, сэтшöм разнöйöсь. Аслыснога сёрниыс ёна кажитчö Райдалы и. Куш сöмын «мадаö» кывйыс мый дон сулалö! Мелiалö, и тшöтш быттö ыдждöдлö...

Мужичöйяс, дерт, унджыкысьөн тыртлисны румканысö. Гажмыштисны. Сёрнияс лонны варовджыкöсь.

Степан Фёдорович нöшта на тырталис стопкаяс, но Питирим эз кут сэсся юны, мöс вöра йöлөн тыр кружка босьтис киас.

— Но, морö, винаыс эм на да, йöв он жö ю, мужик морт!— шензьыштис Степан Фёдорович; аслыс сылы эз на вöв окота дугöдчыны курыдторсö дзикöдз помавтöдз.

А Палаш пöчлы нöшта на любö лои; сыысь, мый ылi муясын олиг-ветлигөн пыслөн со абу на вежсьöма модаыс.

— Таа миян дзoлясяньыс йöлтö радейтö, аминь ёна... Куим гöд сылы вöли да ёна висьмылис чумын. Немтор оз сёй... Ёна и поозылы, меся, кулас дитяыд... Сэки важенкатö кучи воткöдны да йöонас юктавны дитяöс... Вочасөн бурдис эсся — көр йöлыд отсалис, ёна сук да пötöс сыа... Эсся век йöötö пондис корны... Та понда дашкö и кокыс тэрыб лои, көрлөн кодъ. Да и чужöмыс йöв кодъ еджыд...

Питирим шудаа серöктис. Сэсся сийö друг кыпыда юалис:

— Мам, а менам нö таллянкаыд ловъя на? Шыръяс эз на сёйны?

— Ин баит ковтöмсö!— быдсөн дözмыштис мамыс.— Ми сыöс синöс моз чередитам... Чоеыдлөн зонкаыс, Оле, век вöли корö: вайлы да вайлы... Ог, меся, сет, ин кор!

Баб пыралис мöд жырйö да петкöдис важиник, ёна нин парсасьöм да чукрасьöм таллянка. Шочиник ворсан клавишъясыс да кизьясыс джынвийö потласьöмаöсь да чирссьöмаöсь, та понда нöшта нин этша кольöмаöсь. Но Пи-

тирим босьтис киас да пуктис пидзёс вылас тайё таллянкасё дона кагаёс моз меліа, мортыдлөн весиг чужо́мыс вежсыыліс сэки — го́жъялёмаыс быттьо югыдджыкөн лосис. Няжнитис-паськөдіс мекъяссө, важысянь велалөм чуньясыс сяркнитисны потласьом кизьяс вылөд, и пöрысь таллянка, чушкигыр, но долыдырысь, сетис чирыштөм гөлөссө. Питирим копыртчыштіс веськыдыв да любöысла весиг пельбокнас ляскысис гармоньлөн парсасьом сьод пöв дінө, быттьо ныв морөс бердө тадзи инмөдчис... И видлалө, корсьо кутшөмкө лад. Пöрысь таллянка вочасөн аддзө тайё ладсö: норакодь и кузя юргысь шыясөн ворсö, паськыда босьтө и öттшөтш быттьо дзольгө-сяльөдчө визув ва моз.

Татшөм ладсö аддзөм бöрын Питирим бөр лэптис кымөс вылас шыльөдөм юрсиа юрсө да надея кутысь төждысяна синьясөн видзөдліс Райда вылө. А мөдыс, дерт, гөгөрвоис нин, мыйджык ворсө Питирим, ныв сөгласа довкнитис юрнас да сьөлөмсяньыс пондіс сьывны ворсөм шы улас:

Шльыгө паськыда Печора
Коми муөд уна нэм.

Со нин и Степан Фёдорович тшөтш мургыштө-сьылө. Но ёнджыкасө сійө шензьө, чуймөма. Чуймөма сыысь, мый тайё сьыланыс чужис сы синьяс водзын. Эз вöв — и друг лои... Нинөм абусыыс лои! И сьывсьө со...

Палаш пöч, Питиримлөн мамыс, кывзысигтыр тшөтш кутис мизгыны. А кор помасис сьыланыс, медводзөн дөвöля шуис:

— Бур и, рөбета, сьыынытө! Кор нөшта лөсьыда карөма! Шань изьватас тай карөма тайё песнясө!

— Палаш тьөт! — пöшти горөдіс моз гажмөм и шызьөм Степан Фёдорович. — Көсьян кө төдны, тайё сьылансө тэнад пивыд да тайё нылыс чужтісны! Оні на, Печора кузя кывтігөн, чужтісны. Позьö шуны, мый тайё сьыланыс тэнад чөскыд пелядысь свежөйджык на!

Пöрысь пöчлөн пи вылас видзöдысь чусалöм синъясыс войтыштны дасьöсь, сэтшöм любö сылы.

— Оз вед ылöдчы тайö, Питько? — пöся юалис сэсся сийö, но сьölöмнас гөгөрвоöма нин, мый тадзи и эм. — Аддзан, чое, кутшöм миян Питькоыд? Ок, дитя, айыд кө эськö öнi кылылі!..

Сийö тшöктiс мöд пöв ворсны да сывны. Сэсся шуис пиыслы:

— Питько, дитя, тэ инö аски гиж менам ылö тайö кывъяссö. Гырысь шыпасъясөн. Ме велöда тайöс да век куча сыйыны...

— Гижа, мам! — Питирим вöлі зэв рад мамыс вöсна. Рад сыысь, мый мамыс көть и ёна нин пöрысьмöма да косьмöма, но лов вывсьыс сьлөн абу на кусöма томдырся биыс.

А мамыс нин малалö-шыльöдö көр сюр кодьöдз чорзьöм-лыöссьöм кинас Райдалысь шыльыд кияссö, некор аддзывлытöм дивö ылö моз видзöдö ныв ылö да юасьö:

— Кудз инö тэд, мадаö, татшöм кыясыс сюрö? Мытшасьтöг вед, из выысянь исковтысь шор моз дзольгö, аттö чудеса!.. Ме окоч жö сыйынысö, а ачум тэчны огсяммы...

— А мый эськö тi медьёна радейтад сывны, бабуш? — шоныда юалис Райда.

— А мый дум зылам усьö. Тундраад ветлигö быдсö сылан, шогсö и гажасö. Даддяд мунан, мунан — помыс некудз оз во. Со и сылан.

— Бабуш, сьылыштöй мыйкö!

— А мый инö эськö, мадаö? — пöрысь пöч шöйöвошис, но сэк жö быттö и том ногөн веськалыштiс мыйгöрыс.

— Шондiö-мамeтö сыв! — туйдöдiс пиыс, сийö öти пельнас кывзысис налөн сёрниö.

— Сьыла вед... Чое, сьыла?

— Сыв, сыв! — окотапырысь тшöктiс мöдыс. — Ин кө на вунöдчы.

— Сөмын тэ, Питько, этша ворсыштав. Этадз меам артмөджык.

— Но, но...

Палаш пöч вештыштіс улөссө бокөджык, пуксис, кресталіс лыөсь кырымъяссө водзас да, енув пельөсын öшальсь, киас кагаа, пемдөм богоматерь вылө друг шогө усьөм синъясөн видзөдіг, заводитіс чусалыштөм, но важ сьылысьлөн мыла на гөлөсөн:

Шондіө-маме, дыр вед ноолөдлін,
Да часөн рөдитін.
Быдтылін менө кызд пуыс ыжда,
Мичлун козьналін асья кыалысь.
Көсьылін сетны дзоля семьяө,
Дзоля семьяө да маті земляө,
Частө волыны, дырен гөститны.
А сетін вед тэ менө
Ыджыд семьяө да ылі земляө:
Сизим ая-пи да нель ая-ныы,
Матушка да батюшко,
Мужике да ачум...
Öтік во олі — мамес иг аддзыл,
Мөд во олі — мамес иг кыылы.
Коймед во вылас ачум мөдөччи
Сук вөр кості да джуджыд гөраөд.
Шондіө-маме вочча мем воис.
«Сө муса дитя, көні нө тэнад да
алөй вирыд?»
«Шондіө-маме, шогсьыс кусөма».
«Сө муса дитя, көні нө тэнад
лым еджыд яйыд?»
«Шондіө-маме, орсөн лачкөма».
«Сө муса нылө, көні нө тэнад дас
кык сода сера пандыа
мальчайд?»
«Шондіө-маме, йөз ань вылысын».

Тайө вөлі ловтө кырлөдлысь сьылөм. Азыма кывзысь Райдалөн синъясө сөдзтысис пөсь синва. Сылы весиг пондыліс кажитчыны, мый оз пөрысь старука тадзсө сьыв, а збылысь том ныв норасьө. Муса бать-мам дінсьыс нетшыштөм, көдзыд тундра шөрө эновтөм өтка ныв.

Некодлы оз ков сійӧ... Тшыг, омӧлик паськӧма, кынмӧ...

— Бабуш! Тіян сьыланыд дас пӧв лӧсьыдджык мян-
лӧн дорысь! — сьӧлӧмсӧ сетіс Райда пӧрысь мортлы. А
мӧдыс, сьывнысӧ помалӧм бӧрын, яндысьыштіс, ки пы-
дӧснас чышкаліс шызьӧмысла косьмыштӧм вом доръяссӧ.

— Буди абу шыльыд сыа...

— Мый нӧ кӧть! — ыпъяліс Райда. — Ловтӧ тай
дзоньнас босьтӧ-а.

— Но, мадаӧ... Менӧ лӧка жӧ сыа дойдӧ.

— Быттӧ тайӧ сьыланас йиджӧма важ коми нывъ-
яслӧн уна нэм чӧжся став шогыс да дойыс... — сьӧлӧм-
сянныс содтіс Райда. — Став нывъясыслӧн, кодъясӧс
мырдысьӧнмоз нетшыштлісны бать-мамыслӧн шоныд
позйысь...

Райдаӧс водтӧдісны узыны пытшкӧс жырйӧ, гӧрда-
еджыда сера ситеч занавес сайын сулалысь крӧватӧ.
Гӧстя, яндысигтыр, пондыліс пыксьыны — абу пӧ лӧ-
сьыд тадзитӧ, ӧтнаслы медбур узянінсӧ босьтны... Но
Палаш пӧч эз и кут кывзыны, любӧпырысь вольсалис
ассыс медвиль, медъеджыд прӧстынясӧ.

Койка дорас, джоджас, ковӧр пыдди вӧлі павгӧдӧма
вывлань гӧна кӧр ку. Райда сувтіс сы вылӧ кӧмтӧм
кокъяснас, и сідзи и пурскысисны найӧ сэтчӧ — сэтшӧм
сук да кузь гӧна вӧлі куыс...

— Миян сыа лӧӧ вольӧн, — окотапырысь висьтавліс
баб. — Ты дорӧ кӧ тіян лӧӧ мунӧм — черитӧ кыйны, —
кӧть ӧти воль быть колӧ босьтны. Уль му вылас воль-
салан сыӧс, и шоныд лӧӧ узыны, паччӧрын кодь.

Райда, ставторсьыс ыззьыштӧм сьӧлӧма, водіс, и пыр
жӧ син улас веськалісны паныда стенӧ крепитӧм кык
борд... Зӧв ыджыд бордъяс, гашкӧ, метра кузьтаӧсь, найӧ
вӧліны быттӧ шевкнитчӧмаӧсь лӧбзигӧн да лым еджы-
да лӧсталісны электричество би улын.

— Тайӧ, буракӧ, юсь бордъяс, — шуис Райда, сылы
окота на вӧлі сёрнитыштны Палаш пӧчкӧд.

— Сыа... — ышловзьӧмӧн моз вочавидзис мӧдыс.

— Юсьсө нө тиян кыйоны жö? — повзыштискодь ныв.

— Оз, мый тэ, мадао! — öвтыштис кос кинас пöч. —
Сыа вед тундрасö мичмөдö... Сытöг яйид сәни тырмö...

— А кысь нө эськө бордьясыс?

— Эта йылысь лёка кузь басниис... Тэд, мадао, узь-
ны колö... Не этша вед мудзин...

— Висьталöй, бабуш!

Палаш пöч вештыштис улöс вылысь нывлысь көлуйсö да
кокньыдика лепитчыштис улöс дорышас.

— Онія моз жö аръявыы пöраыс сәки вöлі, — шуис
сәсся. — Пöткаыс буреч вöлі чукартчö кельöбьясö... Ма-
дао, лёка гажа сәки тундраад. Быд гөлөса шыяснас сьы-
лö да горзö пöткаыд, чуксалö да велöдö öта-мөдсö... Ты-
яс вылад сярвидзö сымда лэбач, кучöмыс тöлькө и абу!..
Ыджыд пийöлы, Саньколы, дас куим гөд сәки вöлі, йöй
на... Босьтас сыа чумысь батгыслысь ружийсö да и кам
лыяс тайö юсьыслы, ты вылас... Усьö сәсся, коньöр...
Ёна и вачкалі ме сәсся сыös, татшöмторсыд. Но он тай
бöрсö ловзьöд.

Мукöд юсьыс, төварышьясыс сылөн, кык лун чöж
сәсся вийисны сәни. Лэбалöны ты весьтöдыс... Мыйкө
лёка горзöны, шога чуксасьöны коньöрьяс... А кысь нө
воас?..

Ачум ме Питькöөн сәки буреч тыра вöлі. Бөрья кага
сыа менам, сёрөн нин вайлі.. Ёна и поозылі, мадао...
Меся, юсьясыс прокленитасныс миянös, да кагаыд нелюч-
ки лöö... Но, ен ськөд, лючки да бура чужис, из лёк.
Тöлькө тай ме моз дзoляник, абу айыс кодь. Сыа миян
лёка ыджыд да ён вööлі. Мукöд чоя-вокаыс Питьколөн
айыс моз жö мусюр кодьöсь быдмисныс и... А таа сölсем
мөд кодь — небыдджык да шогалысьджык. Жальыс ди-
тялөн унджык и, быттьö юсьясылөн норлуныс йиджö-
ма... Кудзкө дзoлясянныс век көсийö быдсö тöдны... Век
нин вöлі юасьö: мый тайö? Мыйла сыа?.. Быдсөн дöz-
мөдлас юасьöмнас... Ворснытö ёна радейтис и, чипсаннад
да пöляннад. А эсся айыс таллянкатö вайис сылы, шань

чача лои, кӧть лунбыд ворсас да кывзас таллянка шы-
сӧ... Буди инӧ сы понда и из кольччы кӧра дорас? А
вермис эськӧ бур паслукӧн лоны, вежӧра, оз пов ни...
Век кӧнкӧ ветлӧ да велӧдчӧ... Нащальникӧ тай абу на жӧ
петӧма-а... Семья из вермы лӧсьӧдны ни. Армия бӧрас
кутшӧмкӧ бабакӧд олыштӧмаӧсь...

Баб кӧсийс содтыны: весиг пӧ кӧнкӧ пи быдмӧ, ко-
нӧр, — но сюсьджыка видзӧдліс пӧся кывзысь Райда
вылӧ да эз шу тадзӧ.

Сы пыдди баб друг сувтіс да петаліс жырйӧ, занавес
сайӧ, да пыртіс сьӧд рама пытшкӧ стеклӧалӧм фотокар-
точка.

— Окота кӧ видзӧдлы, мадаӧ, кутшӧмӧсь ми коркӧ
вӧӧлім...

Райда босьтіс киас рамкасӧ, видзӧдліс, и сьӧлӧмыс
бара на вӧрзис морӧсас: сійӧ некор на эз аддзыв татшӧм
снимоксӧ...

Лымйӧн тубыртӧм куш эрд вылын сулаліс кӧр дадюв.
Куим кӧр, быдӧнлӧн сюръясыс пашкыр увъя понӧль ко-
дьӧсь, вӧліны лэдзалӧмаӧсь. Дадь бӧжын пукалӧ шоньд
паркаа том нывбаба, ыджыдкодь ныра лӧсьыдіник чужӧ-
мыс гажа и вильыш. Нывбабаыс кутӧ водзас арӧса кы-
мын кагаӧс. Кагасӧ пасьтӧдӧмаӧсь еджыд маличаӧ, мурт-
са на чужӧм войыв ошпи кодь сійӧ, петкӧдлывлӧны тай
найӧс телевизор пыр... Мӧд кага, ар нель-ӧ-вита, сэтшӧм
жӧ еджыд маличаа, пукалӧ орччӧн... Лым пытшкӧ сатш-
кысьбӧма ар дас кыка зонка, сійӧ нин кышӧда маличаа;
сійӧ юасяна видзӧдӧ Райда вылӧ, буракӧ, чуймыштӧма
фотоаппаратысь.

Сыкӧд орччӧн сулалӧ ыджыд тушаа мужичӧй, юр
вывсьыс чӧвтӧма мыш вылас маличаыслысь шапкасӧ;
сьӧд кузь юрсиыс пельпом вылӧдзыс усьӧ... Киас сійӧ
кутӧ кузь бедь, мӧд ногӧн кӧ, харей, кодӧн веськӧдлӧны
доддялӧм кӧръясӧн.

— Мадаӧ, тая тӧлькӧ и колис сӧсся меным... — ыш-
ловзис Палаш пӧч. — Бур кӧть, шань морт снимайтіс сӧ-

ки миянӧс. Ъстіс карточкасӧ и... Газетысь ачыс висьтасис... Войнаӧдз на таа вӧлі... Оні со ӧтнам коли... Санько, сулалысьыс тай, усис война вылад... Нылыс, коді киам, Тамарко, олӧ Нарьян-Марын, кӧзяиньскӧд... Эта пыис, Оле, Карейвӧрын, яранъяс дінын кӧр видзӧ, унджыкыс сәні налӧн комияс... А кӧзяиныс вит во сайын кувсис... Ёна бур кӧр видзысь вӧлі... Колхозад пыригӧн ӧкмыссӧ душ кӧртӧ вайлім... Сәсся и сы бӧрси на век тундраын ветлім... Оні кӧр дорас сәтшӧм паслукыс из коль... Том йӧз пышйӧны. А кодыс и кольӧ — лёка юӧныс... Винаыс вылӧ сетчӧныс... Кӧрсӧ мучитӧныс...

— Сәсся нӧ ті, бабуш, тадзи и ветлӧдлінныд век?! — Райда некыз оз вермы нетшыштны видзӧдлассӧ снимок вылысь.

— Тадзи, мадаӧ... То дадь вылын, то чумын... Велалан да — мӧдтор оз и коо... Век вӧля вылын, свежӧй яй да чери...

— Челядыс век тіянкӧд и?

— Век миянкӧд... Дзоясӧ тай толькӧ, Питькоӧс, интернатӧ мӧдӧдлім велӧдчыны... Став челядыс тундраын чужисны... Чумсьыд ывлаӧ на петан рӧдитнытӧ — яндзим вед сәні, мадаӧ, йӧз дінад...

— Ой-ой-ой! — Райда вӧлі дзикӧдз шемӧсмӧма.

— Мадаӧ, гажтӧм на овлӧ тундрасьыд! — пӧся шуис Палаш пӧч. — Кӧзяиныс кувсьӧм бӧрын тані ола да, чое дінын... Кӧръяссьыд гажӧй бырӧ и... Тані чойеыскӧд мӧс видзам, и, верит кӧть ин, некудз ог велав сы дінӧ. Пола мӧссьыд... Любӧй кӧрӧс, медся ён быксӧ вӧлі нярталаӧн куча, ог пов нинӧмысь, а мӧстӧ лысьтыны ог лысьт... — Баб чӧв усьліс, а сәсся и содтіс, гӧлӧсас йиджтысьӧм норлунӧн: — Мадаӧ, кудзкӧ лёка гажтӧм ӧтилад ооны... Ок, гажтӧм!.. Тулысын эськӧ сідзи и ләбовті ловзыны кучӧм тундраас... Пӧжсьысь-шумитысь ләбач пытшкас... Но он тай ләб, бордыясыс чегӧмаӧсь нін... Кызди тайӧ юсьыслӧн чегӧмаӧсь...

Унатор тані вöлі мöд кодьöн Эжва дорын серти...

Визувтысь ваа паськыд тыкöлаöс, код кузя вель дыр катисны найö ёсь ныра векни пыжöн, мыйлакö шуисны шарöн. Та йылысь мөвпалігöн Райдалы друг усис тöд вылас полярник Кренкельлöн неважöн лыддьылöм гижöд. Стилаын сійö гөгөрвотöма шензьö — мыйла пö войвылын, весиг Новая Земля вылын, проливьяссö шуöны шарöн? Маточкин шар. Югорский шар...

«Абу-ö комияс, изьватас, тадзё нимтылöмаöсь?» — ас ногыс гөгөрвоис öнi Райда.

А кор висьталіс ёртъясыслы асьыс мөвпсö, Питирим, а сійö не этша шензьыштiс нывлөн татшөмтор казялöмысь, падъявтөг шуис:

— Вермас лоны, комияс и нимтiсны. Найö быдлаö сибавлöмаöсь, Войвыв пасьталаыс... Сэссия öд мяян, шум, Урал сайса хантъясöс сідзи и шуöны — йöграөн. И вермас лоны, мый Югорский шарыд — збыльысь Йöгра шар...

Шарö петысь посниджык тыкöлаясын шывъялісны утка позтыръяс — тшапа пасьтасьöм гордаяс и сьöдов турунчöжъяс... Мукöд уткаясыс швычöка лэбалісны юр весьтöдныс, пурскысылісны сöдз ваö да долыдпырысь уйисны водзаныс, ёна матöсö пыжаöс сибöдтөг... Двустволкаа Степан Фёдоровичлы, кодi важöн нин эз адзыв та мында пöткатö, телепит вöлі лыйсьыштны, прамöйджыка вöтлысьыштны дэльöдчысь уткаяс бöрся. Но бöжалысь Питиримлы найö быттьökö вöліны веськодьöсь: удитам на пö найöс полошитнытö, наперво пö колö воöдчыны места вылөдз.

А кор найö, помасьлытöм шарöд верст нель-ö-вит катöм бöрын, петісны берөгö да мөдiсны восьлавны вежа пуритысь вөр турун пытшкын муртса-муртса тöдчыштысь ордымöд, пырысь-пыр жö повзьöдiсны сьöла позтырöс.

Тані Степан Фёдорович эз нин кут некодлысь кыв-

зысьны ни юасьны: өдйө чургөдiс ружйөсө да пөшти өтиласянь и лыйс куим сьөлаөс, сы вöсна мый том пөт-каяс эз и ылөсө лэбны, сөмын и жбыркнитiсны матысса увьяс ылө; налы, буракө, кажитчис, мый татысь муөд ветлөдлысь некутшөм лов оз вермы найөс судзөдны...

Степан Фёдорович дась на вöли и мукөдсө котшкөдны, но Райда пондiс лөкысь горзыны: тырмас пө! — да кутiс увьясөн шыблавны йөй сьөлаяслы. Сэки вөлись найө лэбисны ылөджык.

Степан Фёдорович скөрмыштiс Райда ылө, дыркодь бротөдчис: тадзи пө, нылө, оз вöравлыны... А мөдыс век на жалитiс йөй сьөлаясөс: мыйла пө найө оз повны мортысь, пыдөджык оз дзевсьыны.

— Тавосаясыд да, буракө, эз на адззывны пищала морттө, — шуис та ылө Питирим. — Онi сэсся төдны кутасны. Ловйөн кольөмаяссө мамыс чукөртас да лекция лыддяс миян йылысь. Висьталас, мыйся зверь гөнтөм ныр-вома кык кокаыд...

— Вот эськө төдны, мый сийө висьталас! — ырзысис Райда.

— Татшөмторөдзыд йөз эз на жө тай воөдчыны, — варовмис Питирим, — мед эськө төдны пемөсьяслысь думьяссө да шуөмьяссө... А мед тэ водзө сэсся эн кут майшасьны та понда, регыд ме тэнө вайөда зэв гажаинө, Пожөм дачаө...

— Эм кө танi пожөм рөдыс, — өтарө-мөдарө чатра-сигтыр шыасис тшөтш Степан Фёдорович. — Урөс ловпу сөмын чашйө-быдмө.

— Эм өти верөтя, шуи нин тай, — Пожөм дача. — Питирим тэрмасис сэтчө бур төдса динө моз.

Регыд мысти найө кайисны керөс кодьö, но сэки водзын мунысь Питирим шемөса горөдiс:

— Пожөм дачаыд сотчөма!

И збыльысь, томиник, во кызь-комына, пожөмъяса ягторөс кузяла и пасьтала чишнитөма пөжар, тыдалө, кольөм гожөмө. Биыс, буракө, абу и вывтiсө жар вөлөма —

некөн тани сылы босьтны ыджыд вынсö — да ёнджыкасö сöмын ялаа эжсö да пожом диньяссö чискалöма, унджык пожомыс лыскаось на сулалöны. Но тайö нин абу веж небыд лыс, а косьмём-чорзьём гөрд лыс, кодi оз вермы ни шондi югөр кыйны, ни зэр ва юны. И выныс сылөн абу нин кутчысьны увьяс вылас, да вочасөн гылалö со, гөрд вольöсөн вевттьö сьода пöймасьём мусö. А том пу-
ысысь ньöжйöникөн кусö мебөрья лов шыыс...

— Вот тэныд и Пожом дача! — шутөвтiс Степан Фё-
дорович.

— Кодкö нö нарoшнö али мый сотöма?! — сьөлём се-
тис Райда.

А Питиримлы кажитчис, мый сийö сулалö шойна до-
рын, кытчö дзёбöмаось сылы медся дона йöзсö.

— Жар дырйиыд кос ягыдлы уна оз и ков, — жугы-
ля шуис Питирим. — Кусöдтём чигарка пом шыбитiн, и—
ыпнитiс... А тэныд мый — мед сотчö, абу тай аслад... Тэ-
над зептысь оз чин...

Найö пуксисны шойччыштны верöтя дорöсö.

— Первойысь ме волi татчö зэв нин важөн, — висьта-
сис Питирим, — зонка на вöли... Пожөмьясыс тай ме суд-
таось на вöлины-а... Кузь лыскаось, небыд туганьясаось...
Сийö гожөмнас ми мамкөд мыйлакö эгö мунö тундраö,
тьötка ордын олим... Сэтөр вотны волiм татчö... Ёна и
чуймөдисны менö пожөмьясыс, сьөдз гашкö и ме некор
на эг аддзыв найöс, тундраад оз быдмыны... Тадзи жö
шойччыны пуксим. И перочинной пуртөн ме öти пожөм
йив чилснитi, зэв окота вöли гортö лэччөдны... А мам пи-
нявны кутiс менö: быдса пу пö виин... Луныс шоныд вö-
ли, и вундөминас регыд сир войтъяс сөдзтысисны... «Ад-
дзан, — век на дивитö мам, — бөрдö пуыс, ёна доймөмыс-
ла кыз синваөн бөрдö...» Сэксянь меным, буракö, ёна
мөрчис тайö. Небыд лыска пожөмыс ловья пемöс ко-
дён пондiс кажитчыны. А мый нö — морт моз жö синва-
өн бөрдö да...

Сэсся кыйсьысьяс петiсны зэв паськыд эрд вылö —

пом ни дор оз тыдав! Тайё вёлёма коскөдзыд зөридзөн өтмоза эжсьём зэв васөд нюр. Некутшөм ордым сер эз төдчы сәні. Гөгөрбок сөмын сярвидзис кузь и тшөг зөридз да нөшта гөрд пөкъя вөв шомкор... И сэтшөм ва нюрыс!.. Пидзөсөдз вөйталө... А кузь гөленя бакилөяс сэтшөм сьөкыдөсь... И ноп ёнакодь личкө, өд дыр кежлад унакодь быдсяматорсө лои лөдөма сэтчө...

Кор пырисны нюрө, Райдалөн повзьөмпырысь ырк-мунліс сьөлөмыс: сылы чайтсис, мый таті пасьталаыс кадъя, да он и төдлы, кызди тюльскысян-пыран вөсньидик сьөмөса кад улас...

Но Питирим болскис-муніс водзө сылы өтнаслы төдса туйөд...

Гоз-мөдысь кок улысь, сук зөридз пөвстысь, сьөкыда ырсмунлісны дзодзөг ыджта уткаяс, чуть оз весьөпөртны виччысьтөмысла. Мукөдыс повтөг лэблісны кыйсьысьяс-лөн веськыда юр весьтөдныс, и Степан Фёдорович быдсь кватитлавліс ружйөсө. Но сьөкыд нопйыс торкасис лыйнысө, и шуда уткаяс мынлісны на сылөн мөрччана зарадъясысь.

Бокын югнитіс зэв кузь ты, и пөшти берегьястөм, сөмын быттё друг оредөмаөсь зөридзсө.

— Тані пасьталаыс тыяс, — шуис Питирим воськовсө ньөжмөдлытөг. — Миян кок улын, гашкө, и коркө, уна сө во сайын, ты жө вөвліс... Сэсся мыйлакө косьмис, зөридзыс топөдіс васө...

— А ёна-ө косьмис? — кашкигтыр юаліс сы бөрся вөсьлалысь Райда.

— Миянөс лэптас... — нюмсерөн вочавидзис Питирим.

— Либө уна и утка пөжсьылө тані? — юаліс Степан Фёдорович, ноп личкөмысла өтарө-мөдарө мырдысьөн моз чатрасигтыр.

— Уткаыдтө мый... — өвтыштіс кинас Питирим. — Вот быд пөлөс чериыс гыбзьө...

— И, шуан, бур чери тшөтш? — Степан Фёдорович-лөн гөлөсын помөдз эскытөм на надея.

— Эз кө вөв бурис, та ылнасо ми эго и локтой...

Шонди тэрмасьтог кыпөдчө ылодзык. Сьөкыд нопьяснад ва нюрөдыд болскыны лоө жарджык. Райдалы ээв нин окота шойччыштны, көть эськө, шуам, тані весигтө и пуксьынысө некытчө, вутшьясыс ээв кизьөриникось. Сылөн чужөм кузяыс шорөн визувтө нбылом. Медся сьөкыд нетшыштавны кокьяссө турунсора топыд нюйт пөвстысь... Нопсө төбигөн збояліс — абу пө ме нюньө, йөз мындаыс жө пө верма нөбавны... А өні со, буракө, медводз небзис...

Питирим болскө и болскө водзө. Видзөднысө абу и ыджыд ачыс-а, выныс, буракө, эм... Нопйыс сылөн, гашкө, медся сьөкыд... Буракө, збыльысь кокьясыс сылөн көрлөн кодь жө сөнөдөсь да винелөсь...

Мыйөн сөмын асья ыркыдыс разаліс кыпөдчысь шонди улын, кыскө друг чажгысис-петіс геб. Посньыдик, но горш ташка!.. Сьөд кымөр быттө таяліс мунысьясөс... Пөимысь артмөм кымөр... Синмө и пельө, и быдлаө койө пөимыс. Вомад и голя розяд бускө-пырө... Сөмын и вештавны колө нбылодом чужөм вывсьыд да голясьыд, топыда ляскысьысь няйтөс моз...

Питирим котөрөн сорөн, кызди сөмын вермис нюрыслөн кизьөр эжөдөдыс, уськөдчис матын тыдалысь ляпкыдик бадьяслань, горөдіс:

— Биасьны колө өдийөджык!..

Сэні, водзын, бара югнитіс паськыд ты.

Питирим шыбитіс нопсө, тэрыба пондіс чегьявалыны кос увьяс, кульны урөсіник кызьясысь сюмөд. Мукөдлы тшөктөм эз жө ков.

Регыдөн гөрд кывнас ыпнитіс би, и вөлі өні сійө му ылас медся дона дзоридз кодьөн... Райда дзум суюліс ташкаөн курччалөм чөсөдысь чужөмсө пөсь тшын пытшкө, и вөлисти вом тырнас лолыштіс.

— Загреки тай! — шензис ныв, гебйысь рудөдом беретсө пыркөдігтыр. — Но и ташка!..

— Тайөяс өд дзикөдз вильөдасны мянөс! — шемөс-

мөма вөлі и Степан Фёдорович. — Некутшөм кыйсьөм оз и лолы...

— Нинөм, — сьөлөм сетіс ёртъясыслы Питирим. — Оні, аръявылыд, ташкаыс толькө лун сьөмөснас нин и петавлө, шондіа луннад. А рыт-асывнас кытчөкө вошлө... Менам антикомарин эм, мавтчыштны позяс...

Ты пөлөнөд шлөпкиг-мунігөн ваө келөм сук эжөр пөвстысь ырсмуніс гордаяслөн ыджыд позтыр. Степан Фёдоровичлөн ружийөыс вөлі киас, дась, сійө лыйис, и өти утка быттьө джөмдіс, а сөсся и войтыштіс посни серөн ворсысь ва веркөсө. Лыйөм шыыс повзьөдіс мукөд уткаясөс, кодьяс, буракө, тшөтш пөткөдчөмаөсь зөридз пытшкын. Өти, мөд, коймөд чукөр, быттьө команда серти, друнжөя, мыськовтісны турун пөвстысь да син лапнитігкості утыыштісны-лөбісны мукөд тыяслань.

— Но морө, тані тай позяс вөралыштны! — дөвөля нускис-кыскаліс нырнас Степан Фёдорович.

— Мый нө татшөм вөралөмсьыд, — крукыштіс сійөс Райда. — Кыдзи уткасө судзөдан ты шөрсьыс?

— Кыдзкө судзөдам... — чатрасис өтарө-мөдарө Степан Фёдорович. — Төлыс со мөдар берегланьыс нөбөдыштө, коркө-некоркө матыстас... Питя, шуан, абу нин ылын места вылөдзным?

— Абу... Со тай козъясыс тыдалөны... Сәті косджык местаыс, коркө яг вөвлөма, сөмын тай кералөмаөсь-а... Сәні зумыд берега ты эм, Йир ты. Сы дінө и овмөдчам...

— Либө ме бөрти, рытъявылыс, вола татчө уткаысла. Сәк кежлө и мукөдъясыс, гашкө, бөр бергөдчасны... — Степан Фёдорович ломаліс нин кыйсьөмлөн нәмөвөйя биөн.

А кор найө матыстчыштісны чурвидзысь коз йывьяса вөр визьөблань, Питирим друг серөктыштіс да шуис ыджыдджык ёртыслы:

— Степан Фёдорович, а, ме чайта, тэнад уткаөн мөд көзяин на чөсмасяс...

— Кутшөм мөд көзяин? — эз гөгөрво мөдыс.

— Со тай нō пукалō...

Медся джуджыд коз йылас сатшвидзис-пукаліс виджыд кутш да, збыльысь кōзяин моз, гоньйōдліс ѳтарō-мōдарō крукыля ныра юрсō. Рудов сера тушаыс сылōн вōлі быттѳо сизьдōма изьысь — сѳтшōм топыдōн да вынаōн кажитчис...

— Чайтан, тайō сѳяс уткасō? — юаліс кутш вылō тыр синмōн видзōдысь Райда.

— Регыд миян уткаысь толькō гōныс кольō, — падъ-явтōг шуис Питирим.

— Думайтан, казялас? — Степан Фѳедоровичлы жалъ уткаыс, сылы окота бергōдчыны да виччысьны, кор тōлыс вайōдас сійōс берег дорōдз.

— Сійō важōн нин казяліс... Сылōн синъясыс, позьō шуны, лазер луч кодъ лѳчыдōсь да югыдōсь.

— А мыйла нō либō сійō став уткасō ѳз сѳй? Коді пōжсис тани? — юаліс Райда.

— Кутшōм нō кōзяин тадзисō керлō, — вочавидзис нывлы Питирим. — Некутшōм кōзяин оз орōд аслас ов-мōслысь вужсō, а мōдарō — зильō ѳнмōдны сійōс... — Сійō чōв усьліс, сѳсся водзō шуис: — Бать на висѳтавліс, мый тундраын пō дзодзōгъяс нарoшнō пōжсьōны кутшлōн оланің гōгōр... А мōдыс оз кушты налысь позъяссō. Весиг видзō найōс горш кыньясысь да мый да...

— Дивō тай тѳ висѳталан! — шемōсмис Райда.

— Сōмын пōжсьōм бōрас, кор нин лōоны выль дзодзōгъяс, кōзяин заводитō босьтны дань: тшапйōдлō том пōткаясōс. Сѳки вōлись дзодзōгъясыс ылōджык вешйōны асланыс часōвōй дорысь...

— Сідзкō, огō лыййō Кōзяинсō? Мед олō? — шмонитіс Степан Фѳедорович.

— Мед олō! — ѳвтыштіс кинас Питирим.

Крукыля ныра Кōзяин дзоргис-видзōдіс коз йивсянь да, буракō, чорыда мōвпаліс сы йылысь, мыйла пырōны тайō кортōм гōстьясыс сылōн угоддьōясō.

А гōстьяс визгисны-вуджисны нюр да петісны чорыд

муа яг кодь вылӧ, кодлӧн дорӧсьясас сулалісны ӧтка козьяс.

— Войдӧр тані сук козья вӧр вӧлӧма, — висьталіс Питирим. — Война кадӧ кералӧмаӧсь, и ӧні сӧсья оз быдмы мыйлакӧ козыйс, куш сӧмын лӧк турун да ловпу петӧ.

Туруныс вӧлі морӧсӧдзныс, сук, кок улын немтор эз тыдав, и лоӧ вӧлі повны гуранъясын кок дойдӧмысь.

Но со водзын, козья-ловпуа сайӧд костӧд, югнитіс Йир тылӧн югыдлӧз веркӧсыс, быттьӧ мича ныв друг видзӧдліс сӧдз синнас... Нинӧм он шу — ыджыдкодь син: кузьтаыс верст джын кымын, и пасьтаыс тырмӧ. Шӧртіыс, кыдзи и овлӧ мича нывлӧн синмыс, буракӧ, пыдӧстӧм. Син лысьясыс кузьӧсь да тшӧкыдӧсь и...

Кокныыдик тӧвру, буракӧ, эз сидз ты вылӧдз, и сылӧн веркӧсыс шылыда сотчис-лӧсталіс шонді водзын. Быттьӧ ӧні на кисьтӧмаӧсь татчӧ сывдӧм эзысь, биа-пӧсь на сійӧ, абу на удитӧма кыдзисюрӧ кынмыны...

Но со водзын мунысь Питирим друг лажыньтчыштіс, чургӧдіс кисӧ: видзӧдлӧй жӧ пӧ!.. Ты шӧрас эзысьӧн лӧсталысь ваыс друг быттьӧ чарс-пузис — сәні ызи-бази чеччисны юсьяс... Шпачӧдчӧны лым еджыд бордьяснас... Кӧйгӧдӧмны сыв кузьта голяяссӧ... Югыд ва чирьяс резсьӧны... Ӑдйӧджык, ӧдйӧджык зільӧны... Но татшӧм сьӧкыдыд он на тай мыськовт жыдач моз... Мый ыджтаӧсь, самолётьяс быттьӧ... Квайтӧнӧсь...

— Ок ӧд кутшӧмӧсь! — медводзӧн шыасис Райда, шоныд синъясӧн лӧбачьясӧс колльӧдіг. — Первойысь аддза вӧля вылысь юсьясӧс...

— Лешак жӧ эськӧ да! — сьӧласис Степан Фӧдорович. — Вӧвьяс моз гымӧдчам-воам да кысь нин!.. Позис эськӧ кӧть ӧтиӧс чергӧдны пуляӧн либӧ картечӧн. Пуд яй эськӧ вӧлі...

— И кийд эськӧ лыбис найӧс лыйнысӧ? — чуймыштіс ныв. — Этатшӧм мичлун вылас лыбис эськӧ?

— А мый нө эзыс? Та ыджда позтырсыыд көть и чер-
гөдiм өтитө, немтор на эз төдчыв.

— Юсь яйыд пө абу чөскыд,—миритчөдана шуис Пи-
тирим. Сэссия содтiс:—Енмыс төлкаа вөчөма: вывтi ми-
чаыды абу нин сетөма чөскыд яйтө. А то гашкө эськө
дзыкөдз нин бырисны найө му вылысь... Көть и өна по-
лөны йөзсыыд, медгуса пельөсыяссө бөрийөны пөжсыыны-
сө.

Матын герчкисны уткаяс. Вылыын, сөдз енэжын,
ылыстчөм юсыяс пыдди воис, буракө, өнтая Көзияныс,
шивьялис паськыд бордыяссө вөрөдтөг, тыдалө, помөдз
көсийс төдмавны, кытчөджык овмөдчасны воысыяс. Ты
вывсянь өвтiс нятша көра ыркыдөн. И ташка эз лысьт
пуксыыны мавтөм чужөмьяс вылө.

— Кутшөм лө-ө-өсыыд тани! — сьөлөмыслысь нимко-
дьясьөмсө эз вермы кутны Райда, кор найө пуктiсны сьө-
кыд нопьяссө зэв ыджыд козьяс улө. Ныв нюжмасигмоз
веськөдалiс нопйөн бонзбөдөм лы-сьөмсө, чатрасис гөгөр;
и вежөра лөзов синьясыс сылөн, и мудзөмысла нөпкысь-
ыштөм чужөмыс вөлины шенмунөмаөсь вөр-валөн мичлу-
нысь да йөз олөм шумөн торкавтөм лөньлунысь.

— Буретш татшөмтор йылысь и ме частө мөвпавлi
фронт вылын. Сьөлөм доймытөдз мөвпавлi.. Вылисянь
бомбитөны.. Гөгөр йиркакылө.. Көрт дзужалө.. А тә-
над син водзын друг петкөдчылас со татшөм жө лөнь
ты.. Көнi шивьялөны уткаяс да гыбзьө чери.. И сә-
тшөм шог да гажтөм лолө.. — Степан Фөдорович лигыш-
мунөмөн пуксьөма веськыда муас, мышнас мыджсьөма
нопйыс вылө, личөдөма ки и кок, негырысь руд синьясыс
видзөдөны, видзөдөны ты вылө, чегсьөм ныра векни чу-
жөмыс ты веркөсыс кодь жө лөнь и — шуда.

Питирим, быттьө абу и мудзлөма, гоньялө өтарө-мө-
дарө, кокнас зымкниталө, видлалө му подсө:

— Тайө козьяс улас и лөсьөдам чомнымөс. Найө
тшөтш кутасны видзны мяянөс зэрысь да слөтысь. Лыс
тани тырмө, пес мыйта колө эм и.

— Чайтан, торксяс поводдяыс? — юалис Степан Фёдорович.

— Аръявылыд тані поводдяыс ыръян ичмонь кодь, ёна дурё, быд лун дасысь вермас вежсьывны...

Козъясыс вёліны шензьымён гырысьёсь, кызёсь, весиг Степан Фёдоровичлөн кузькодь сывйыс эз эськё судз найёс сигортны; найё вёліны дінсяныс да йылөдзыс сука щөтъясьёмаёсь пашкыр лапъяса кузь да чорыд увъясён... И лыскыс быттё абуджык Эжваса козъяслөн кодь — ёна чорыдджык налөн серти, сутшкасьысджык, и кызкё быттё ёнджыка чошкысьёма вывлань. Буракё, сымогысь, мед азымджыка кыйны шоча овлысь шонді югөръяссё да шоныд зэр васё, а сэссия тадзинад, гашкё, и шоныдджык тёлын, став ловъясё дзужалысь көдзыдъяс дырйи.

Но небось тай удитёмаёсь быдмыны козъясыс! Тырмылёма тай налы шондыс и зэрыс, көть эськё тасянь и зэв нин матын куш эрдъяса тундраөдз...

Пажнайтыштём бёрын рытъявылөдзыс керисны чом да чукөртисны вой кежлө пес — ёнджыкасё косьмём ловпуяс...

Бур чом артмис кык коз костын — ыджыд и шоныд. Вылісянь и бокъяссиянь кыза төбёма коз лыскён; содтөд пыдди — мед нин зэр оз мөрччы — вевт вылас вольсыштісны нарошно та вылө босьтлём да паськөдём полиэтиленөвөй мешөкъяс — найёс кокни нёбавнысё, и надёнойёсь. Дерт, вёліны кө бурджык кыздьяс, позис сюмөд кульыштны, но Питирим водзысянь нин төдіс, мый шогмана кыддзыс татысь оз сюр...

Вольпась пыдди вольсыштісны небыдджык коз увъяс, пуртъясён вундісны некымын нёб турун, а сэссия выліас павкнитісны воль, кодёс быть тшөктіс босьтны Палаш пөч. «Мед ныысё из вөв кынтёма!» — чиршөдліс сійё мужикъясөс туйё петігөн.

А би, дерт, лоё вом дорас,сылён жарыс пондас жайгыны чом пытшкё...

Куимнанныс уджалісны сьёлөмсянь, өта-мөд вежмө-
ныс. Степан Фёдорович, кодлы вывті нин ёна воис сьө-
лөм вылас татчөс, шызьөдтөм на вөр-ваыс, шмонитіс
вомсө пөдлавлытөг:

«Питя, видзөд жө, видзөд, мый вөчө миян Радшуль-
д: уль пусө куснялө, кос пусө чегьялө...»

Либө:

«Сэсса нө, Радшуль, кор ми тэнө чомйын шөракоста-
ным водтөдам, кодарланьысджык пондан топөдчыны?»

Райда сөмын и гөрдөдыштлө таысь. Но оз лөгась.
Сылы лөсьыд жө лов вылас. Сійө, буракө, некор на эз
төдлы татшөм ногөн лов кылөмсө... Сійө кызкө быттө
друг мөдкодьөнджык лои... Томджыкөн и кага ногсөн
сөстөмджыкөн... Бурджыкөн и быдтор гөгөрвоысьджы-
көн... Югид олөмсө радейтысьджыкөн... А корсюрөясө
вежөрнас ыпьялысь Райдалы весиг пондыліс кажитчыны,
мый сійө зэв нин важөн олө вөр-ваыслөн тайө царствоас,
и ставыс тані — сылөн, ставыс тані кывзысьсө сылысь...

Сэсса Степан Фёдорович босьтіс двустволкасө да ко-
төрөн сорөн муніс өнтай лыйөм уткала, өти сайын пө и
мукөд тыяссө тшөтш кытшовта.

Питирим судзөдіс нопсьыс гырысь синма кулөм —
«сорокопятка» — керыштіс кык вугыршаты, лескааліс на-
йөс. Сійө нуөдіс Райдаөс ва весьтө өшйөм сук бадьяс
улө дзөбөм пыж дінө, кодөс пө кутшөмкө ногөн ытва дыр-
йи пыртлөма татчө төдса дядьө.

— Матын али мый юсяньыс? — юасис Райда.

— Абу эськө матын да... — пыжысь васө кымыньтіг-
моз висьтавліс Питирим. — Но став тайө местаясыс
ыджыд ытва дырйи ойdlөны. Вөрыс и нюрыс... Весиг
миян сиктным тшөтш... Ставыс тайө увтас ді вылын моз...
Коркө Печораыс мөдарөдыс визывтлөма, уна сюрс во са-
йын... А сэсса мыйлакө вешйөма... И кольөма тэа-меалы
чериа тыяс.

— Видзөдлам, видзөдлам!.. — эскытөма шуис Райда.
Өдйө вөйтісны капрон кулөм. Сэсса Питирим сыніс

шонділы паныда берег дорланьо; сәні вөлі сөдз ваа лөнъ-
тас, код гөгөр тшөкыда быдмисны паськыд коръя ва-
аканьяс. Көвйөн домалісны пыжсө баддьо.

— Тані вуграсьыштам, — шуис Питирим, сувтөдіс пыж
шөрө нидзув доз, кодөс кыкис гортсяныс.

— Вугыр вылад эськө менам ыджыд надея абу да, —
веськодпырысь шыасис Райда водз пуклөс вывсянь.

Но эз на удит сьлөн чөвтөм вугырыс помөдз вөйны,
кыдзи гөрда-еджыда табыс, кольмөм моз, чепөсйис бок-
выв, быттө тыдавтөм төв ныр пондіс нөбөдны сійөс...
Райда виччысьтөмысла шөйөвоши, оз төд, мый вөчны.

— Лэпты! — тшөктіс сәки Питирим.

Райда пондіс лэптыны, но мыйкө зэв сьөкыда воис,
вөсньыдик шатин йылыс нюгыльтчис. Райда ёнджыка
ырситіс, и сәки ва пытшкысь быйкнитіс ыджыд чери,
улиса дзиркнитіс шонді водзын, усис пыж пыдөсө — ачыс
мыніс вугырысь — да пондіс кызсюрө чеччавны сәні.
Ызьбөм Райда кыкнан кинас кутіс сійөс — видзөдө и ним-
кодьясьө, сәтшөм долыд сылы.

— Ме чайті — ёді, а кельчи тай вөлөма... Некор на
эг аддзыв татшөм кельчисө... Көть эськө папакөд не этша
жө нин кыйлім...

— Печора гөгөрын став чериыс гырысьджык да чөс-
кыдджык, — бара на кайтыштіс Питирим.

Сідз ли абу ли, но эзысь сьөмъя, гөрд бордъяса да
гөрд кольчаа синма кельчи вөлі сәтшөм тшөг да мича,
мый Райдалы окота вөлі, чачаөс моз, дырджык малавны
сійөс. И торйөн нин сы понда, мый аслыс шедіс татшө-
мыс, и Питирим со тшөтш аддзыліс, кыдзи сійө лэптіс...

Но со нин Питирим кыпөдіс быгыльтан кодь гөгрөс
сынпиөс; сійө вөлі кельчысь на мича да тупльөс, а топы-
да сярвидзысь сьөмыс сідзи и пөртмасьө калитөм зарни
сора эзысьөн...

Сөмын тай нимкодьясьнытө сьөн некор!

Райдалысь табсө кодкө бара нин кыскө, ва пыдөсө-
дзыс вөйтлөмөн нөбөдө. И торйөн нин сьөкыда лыбө...

Песпом кодъ ёкыш!.. Шнёпкысис сійо пыж пыдосё, лёкысь сяркйё-шпородчө, чошкөдөма кузь пиня пила кодъ щөтьсө, гөрд бордьяссө ээлөдөма...

— Ок и пират! — быдсөн повзис Райда. — Татшөмтө он и лысьт босьтны киад...

— Юрладорсяныыс нылыдыс личкы щөтьсө, — велөдис нылөс Питирим.

Райда полігтырйи кыкнан кинас босьтіс ёкышөс и өд-ва вермис кутнысө — сэтшөм ыджыд вынөн нөйтчис-пес-сис сійо зумыдсыыс-зумыд вир-яйнас. А кутшөм чорыд да сарөг сійо! Быттё көрт кольчуга кышалөма, вомөныс сьөд вөньясөн шочиника серөдөм доспех, а медся сатөкин-сө, нёкчимъяссө, вевттёма лэчыд дорыша лезвиеясөн.

— Да өд тайө абу чери, а — броняө дорөм танк! — век на шензис и нимкодясис ныв.

— А мый, ёкышыд миян тыясын медся страшнөй зверыс и эм, — шуис Питирим. — Некодлы оз сетчы татшөмыд, весиг ыджыд сирлы. И немторысь оз удзөд асьсө, быдсө изө-сөйө — ловъя черитө и турун вужтө. Ош кодъ жө дзик сійо, ваын олысь ош кодъ...

Өдва и мездіс Райда пурта-шыа пиратөс, вугырсө суюйөдзыс нылыштөма да. Кык чунь нывлөн вирөдз сутшкысис. Питирим казяліс да төждысьөмөн тшөктіс:

— Пожйышт чуньтө ваас да нённышт вирсө, мед көть оз пежөссы. — Сэсся содтіс нюмъялігтыр: — Энджык сутшкасьысь ёкышъяссө кый...

— Найөс лөсьыдджык лэптынысө да! — воча серөктис Райда: — Сэтшөма водзсасьөны...

И бара — кельчи, сынпи, ёкыш...

Ёкыш, сынпи, кельчи...

И некод абу весьт кузьтаысь посныдджык. Быттё кодкө бөрийө найөс ва пыдөсас. Быттё кутшөмкө пожпыр петөны найө вугыр дінө вотөдз. И сэтшөм азыма кватлалөны нидзуссө. И пырысь-пыр шедөны. Дерт, татчөс чериясыд вугыртө эз на адззывны, эз на велавны мударитны Эжвасаяс моз...

Кельчи, сынпи, ёкыш...

Сөмын и ырсыёдлөны вуграсысыяс. Кыкнанныс пө-
сялөмаоьс, чужөмъясыс банйөмаоьс, югъялысь синъясыс
аддзөны сөмын табъяснысө, кодъяс быттьө дзикөдз йй-
мөмаоьс: чишкөны-вешйөны, сунлөны, дыр кезлө вошлө-
ны ва пытшкө...

Пыжлөн съөд пыдөсыс пасьталаыс нин эжсис эзыса
пөртмасысы чериён, шондї нин бердны кутіс, ыркнитіс,
дзикөдз вошис дөзмөдчысь ташка... А вуграсысыяс век
на жөдзөны-мошкоритчөны пыжын, некыдз оз вермыны
петны берегө... Бара на окота выльысь чөвтны вугырсө.
И лов тырнад кывны, кыдзи көв помын пессьө чериыс, а
сэсса и веськалө киясад...

— Но дивө, сэтшөма сөйө! — Райда чөвттөг нин пук-
тіс вугыр шатинсө пыж вомөн. — Некор эг чайтлы, мый
вуграсьөм татшөма вермө озтыны мортөс. — Видзөдліс
пыж пыдөсын нөйтчысь черияс вылө, нимкодълун и жаль-
лун вөрзисны морөсас. — Тырмас сэсса миянлы, а то ты-
сө дзикөдз куштам...

— Кельчи-ёкышсьыд куштыны и колө сійөс, — зэв
збыльысь шуис Питирим. — А то найө еджыд черилы оз
сетны рөдмыны, ставсө сөйөны... Та мында хищник кы-
йөмсьыд тэа-меалы премия на колө сетны.

VI

Кыпыда ыргө бипур, радлө, мый рытья ыркыдас
бөр вермө перйыны пескысь шондїөн коркө сетлөм шо-
ныдсө. Пемдіс нин. Би югөр улын, съөкыда өшйөм пемы-
дас, ыджыд козьяслөн мыгөрьясыс торйөн нин гырысь-
өн да зумышөн кажитчөны. Быттьө вөрса туньяслөн за-
мокъясыс зымвидзөны. Вой кезлө лөньөм ывлаас ясыда
кылө уткаяслөн скөрысь герчкөмыс: буракө, горда-мамъ-
яс чуксалөны узьмөдчыны кывзысьтөм пиянсө. Көнкө не-
ылын нораа моз кривзөны гора гөлөса туриас. А дзик на
неважөн ты весьтөд, өта-мөд вежмөныс гогзигтыр, лэбис-

ны дзодзюгъяс. Питирим шуис: буракö пö, лэбзылöма-
öсь сиктбердса му вылö анькытш сора зöр кокавны. Мед
пöтöсджык сёяннас томъяслөн унджык вын чукöрмас ылі
туйö, лунвылö петігкежлö...

Да, тайö каднас Войвылад лэбачьясыдлөн уна тöж-
дысьöмыс...

Вой кежлö лöсьöдчö му. Вöртас сайö водіс-узьмöдчис
шонді. И мед эз ло дзикöдз гажтöм му вылын, ас пыд-
диыс ыстіс енэжлөн пемдöм йиркö тöлысьлысь быгалöм
дора чөлөсöс да лыдтöм-тшöттöм кодзувъясöс.

— Сідзкö, шуан, Кöзяиныд пановтöма тәнö, а, Степан
Фёдорович? — шыасис Питирим; сійö керис чери ыджыд
да паськыд вöралан пуртөн. — Шуан, нöбалöма уткатö?

Степан Фёдорович помалöма нин куштыны сьöлаясöс,
куимнансö, буретш чишкалö найöс би вылын.

— Пановтöма антусыд! — би жарысь чатöртчöмөн,
скöравтөг вочавидзис вöралысь. — Бара нин вöлі пукалö
сійö жö коз йылас да весалö нырсö. И зэв дөвöльпырысь
видзöдö ме вылö...

— Тöдö жö инö бур вöчöмтö? — шыасис картопель
весалысь Райда.

— Кöсий эськö ме сылы петкөдлыны бур да!.. Уткасö
корсигмоз тыылысь берег дорсö дзоньнас собалі зöридз
пытшкөдыс... Но некөн абу... Мудзтöдз лои... Сэсся скöр-
мöм йылысь кöсий лöсыштны антуслы бокас гырысь дрöб-
йөн. Но эз сибöд: буракö, гөгөрвоис, мый ог бурысь ме
сы дінö кыйкъяв-матыстчы...

— Сэтшöм сійö, Кöзяиныд, — нюмъяліс Питирим. —
Ставсö аддзö и гөгөрвоö.

— И мед, колөкö, сёйис! Нöшта на тай со вит утка
лыйи... Тырмас сылы и мянлы, катша-рака мында сзні
уткайд... Нель зэв ыджыд ты öтлаасьöны паськыд висъ-
ясөн. Пыжнымöс кö кыскывны сэтчö, ноп тыр позяс лый-
лыны уткатö...

— Мый мянлы сымдасьыс? — чуймис Райда.

— Солалам... Гортö нуам... Сола уткайд — добра...

— Меным чери ёнджыка кажитчө, — шуис Питирим. — Ми со Райдакөд ведра чери кыскалім нин вугырөн...

— Куш жө кельчи-ёкыш да... — наянитыштіс Степан Фёдорович. — кызди ачыл шуан — жар чери...

— Пелядыд вугырад некор оз шед. И толькө войын сійө ветлөдлө, лёкджык войясө...

— Сідзкө, бурджык поводдя кө лоө, ми вермам и бөжсө сылысь не аддзывны? — падмис Степан Фёдорович.

— Вермас лоны и сідз, — шуис Питирим. — Бөжыс и юрыс сылөн зэв пыдынөсь...

Пуны бөрийсны куимнан пөлөс черисө, но ёнджыкасө — ёкышъясөс, өд найө медчөскыд көрсө сетөны юквалды. Ыджыккодь рачө этша и колис местаыс валы да картупельлы...

Степан Фёдорович лочки солалис томиник съоляясөс, пысавлис бура вольөм уль кыз пу шатин йылө да өшөдіс би жар весьтө. Мед пө тшөтш и мөд блюдо лоө, юквалысь отар...

Сэсса со и сук чай нин пөжсьө чайникын...

Сэтшөм чөскыд көр разалис гөгөр!..

— Ме ог нин вермы терпитны — сөйны окота! — шуис Райда да весиг кылөдіс дульсө.

— Сөстөм сынөд вылад мудзөм-керөм бөрад век тадзи овлө, — шуис Питирим рач вевт вылө чери лэпталіг.

— Сэсса өд шу сөяныс кутшөм! — медьёна нимкодясис Степан Фёдорович. — Царскөй сөян!.. — Чорыд чепольнас видлалөм бөрын сійө босьтіс би вылысь жаритчөм съоляясөс. — Но, вайө заводитам сэсса...

Кор пуксялисны, Степан Фёдорович кисьтыштіс юквалсө аслас кружкаө, чурснитыштіс съод нянь сорөн да бара на эз вермы кутчысьны горөдөмысь:

— Но, морө, добра жө тайө!.. — видзөдліс азыма панясысь Райда вылө да жалитөмпырысь содтіс: — Розаыд дзик весьшөрө эз лок мяянкөд...

— Сійо аслас лётчыкыскөд Чёрной море дорын нин пөжө мышсө, — сёйигмызыс шуис Райда. — Велалёма сійо мян быд во нюжодны гождомсө... Шуо тай: кытчөдз пө лунвывса став шойччанинас сг ветлы, сэтчөдз ог дугды...

— А ме пайысь кө — таысь бурджык курортыс оз и ков! — пөся шуис Степан Фёдорович, кодлөн дзыкөдз вылө бурмис сёлөмыс чөскыд юкवासь.

Сэтшөм нөгыля да пөтөс вөлі уна черисыд пуом юкवासь!..

Но нөшта нин чөскыдось вөліны буретша соласьом, би жар вылын асланыс сөкөн небзьом-пөжсьом, рысь кодь еджыд яя сёлаяс. Найо лөсьыда банийомаось, пөся руасисны ловтө гильөдысь көрөн, яглөн медся нежной көрнас, быттьө небыда мавтісны сёйысьяслысь гыркпытшкөснысө да көсийтөг тшөктісны казътывны сы йылысь, мыйта чөскыдыс да бурыс эм вөрын да ваын.

И некытчө тәрмасыны, вильөдчы да сук чай юыштав. Колөкө, куритчы да выльысь заводит сёйны, со тай мыйта черисө лэпталёма рачысь да солалёма...

И лөнь гөгөр, би сөмын варовитө. Чорыда кылө бисянь шоналөм коз лыслөн көрыс... Вөралысьяс чөла видзөдоны гажаа шлонгысь би вылө... Найо бура пөтөмаось. Мудзыштөм сөнъясыс небзьөмаось билөн да чайлөн шоныдысь, чөскыд пөтөслунысь.

— Но, морө, лөсьыд жө овны таладор югыдас... — шыасис сэсся билань табак тшын пөлялысь Степан Фёдорович. — Немтор кө не юкны мортыды.. Ота-мөднымөс кө не пурны...

— Сэтшөм лөнь тані, а көнкө өні воюйтөны, — шуис гатшөн куйлысь Райда. — Со этайө би киньяс пыддиыс бомбаяс гылалөны вылісянь... Көнкө да көнкө век воюйтөны му вылад...

— Да-а... Мед жө нин енмыс видзас татшөмторсьыд! — Степан Фёдорович кыкнан кинас чепөстіс водзсьыс сынөдсө, быттьө мукодыслы тыдавтөм мутиясөс

йӱткыштӱс. — Куш сӱмын ӱти думыштӱмсыыс мышкыс
важ ранаӱй ӱнтыштӱс...

— ӱна тӱнсыыд сӱтӱ чашнитӱма, — шыасис Питирим
сӱрнисӱ водзӱ пестан ногаа.

— Крупнокалибернӱй пуляӱн... Войналӱн первой во-
нас на... Бӱрынӱтчам вӱлӱ, ӱти кытшыс мӱд кытшӱ пе-
там... ӱнӱ на син водзын ставыс... Зӱв кузь колонна ми-
ян... Салдатъяс и мирнӱй пышӱысыя... Йӱз и скӱт...
Друг кымӱръяс сайыс быӱкнитӱсны «юнкерсыя», быдса
стая... Сьӱд кырнышъяс быттьӱ... И давай сизьдыны ко-
лонна кузялаыс... Крупнокалибернӱйыс, помсянь по-
мӱдз... Водӱ ме... А сӱйӱ ме вылӱ йиркӱдӱ-локтӱ... Пыр
ыдждӱ и ыдждӱ син водзын... Биӱн сьӱласьӱ... Шуа тай:
мед жӱ нин не аддзывны сӱсся татшӱмтӱ... Гӱрыштӱс сӱйӱ
менсыым мышкӱс... Бур, мый сюрсальӱс ӱз чашнит...

— Ой-ой-ой! — лӱвтыштӱс Райда, ырситӱс-чеччис
куйланӱныс. Нывлы пондылӱс кажитчыны, мый буретш
сы вылӱ воӱ самолӱтыс... Матысмӱмысла содӱ и содӱ...
Став мирсӱ вевттьӱ... А сӱсся сы бӱрын, гашкӱ, и нем-
тор нин оз ло?..

— Нылӱ, повзьӱдӱ тай ме тӱнӱ аслам висьтасьӱ-
мӱн? — пӱрыс салдат тӱждысьӱмӱн сетчыштӱс нывлань.

Мӱдыс быттьӱ ӱз и кывлы сылыс шуӱмсӱ — лов тыр-
нас нюкырмунӱс друг чужӱм дойыс. Ныв вылӱ видзӱ-
дыс Питиримлы ӱнӱ сылӱн пыр сӱдзӱн овлыс чужӱ-
мыс кажитчис жар луӱ нетшыштӱм, лӱсмунӱм дзоридз
кодьӱн.

— ӱна жӱ матӱтӱ ветлӱдлӱ морт дӱнтӱыд смертьыс...
Да шогыс-дойыс... — восьтӱс сьӱлӱм кылӱмсӱ Райда. —
И ачыс мортыс унджыкысыс немтор оз вермы вӱчны
наыс мездысьӱм могыс... То война сӱйӱс нырыштӱ... То
ещӱ мыйкӱ... То самолӱтнад гыпкысыс кымӱр сайсянь...

— Нылӱ, оз ков сьӱлӱмад сӱтшӱма босьтны олӱмсыыс
став лӱксӱ, — шӱжыда шуис Степан Фӱдорович. — Сӱдзи-
над ӱд, он и тӱдлы, томӱн-кадӱн дзикӱдз чышкасян... А

тэныд овны да овны колө. Верөс сайо петны колө, шань челядьөс быдтыны... Виль олысьясөс...

— Ме, Степан Фёдорович, йозыслөн челядьсьыс пөт... Школаын велөдигөн... Меным тырмымөн шогыс-дойыс йоз челядьлөн мучитчөмысь... Йой бать-мам дінын быд-мигөн налөн мучитчөмысь...

— Оз жө кө став бать-мамыс йойтавны-а? — шуис Степан Фёдорович, ныв вылө тыр синмөн видзөдиг.

— Ставөн — не ставөн, а мыйта колө на тай эм сэтшөмыс, — дөжныштис Райда. — Отяс юоны да тыш-касьоны... Медмисьтөм кывъяснас быд лун пуроны отамоднысө... Мөдъяс юксьоны да энөвтөны челядьнысө... Гусясьөмысь тюрмао сюрөны... А кага ставсө аддзө тайөс... Ставсө кылө... Тулысладорыс ме понді дивитны оти зонкаос: мися, во помасьө, а тэ пыр омөльджыка и омөльджыка велөдчан, гортса уджъяс он вөчав. А сийө, дас нель арөса мужик нин, бөрддзис да и висьталіс, мый пөшти пө некор ог узьлы гортын. Бать пө кодалө да нөйтө ставнымөс, мамөос и чоя-вокаос... Быд вой пө лоө пышйыны гортысь. Вот и висьталөй өні меным: тайө нө олөм? Татшөм олөм могысь али мый колө семьясө лөсьөдны? Челядьсө?.. Татшөм олигад мый нө лоө челядьыскөд? Налы өд ставыс пуксьө сөстөм лов выланыс, еджыд лым вылө са моз... Став лөкыс өд пөжөсьтө найөс, лунысь-лун тшыкөдө... Ми школаын велөдам найөс бурөн лоны, югыд олөм вөчысьясөн лоны... А мый нө кольө налөн татшөм велөдөмсьыс, кор найө веськалөны гортса зык-косяс?.. Лөк ногөн йойталөмас?

Ни Степан Фёдорович, ни Питирим немтор эз вочавидзны Райдалөн пөсь юасьөмыс вылө. Найө чөла видзөдісны паськалөм, гажаа ыргысь би вылө, быттө сэтысь көсийсны аддзыны сьөкыд воча кывсө. Нывлөн сөрнийс кыкнаннысө өна шөгөдіс...

Торйөн нин шөгөдіс Питиримөс. Сы вөсна мый Райдалөн кывъясыс бара на ыззьөдісны сийөс думайтны аслас пи йылысь... Думайтны медся дойдалана ногыс... Сы-

лы друг пондіс кажитчыны, мый буретш өні, со тайё здукъясас, скөрмём мужичёй, пиыслён выль батыс, юрсиодыс кватитёмён, каньёс моз, зульёдө детинасө, ныр вир пильтытөдзыс зульёдө...

Татшөм мөвпсыс Питиримлөн сувтліс вирыс, быдлаті ээлавліс, сьёкыд лои лолавны... Быттьё морёскудас друг клопкисны-тувьялісны ыджыд из, коді пондіс мырдысьөн личкыны сійёс, мый шусьё мортлөн лолөн... И нөйтчө-топалё лолыс, и ыджыд доён пыдзыртчө сы пытшкысь вир сора синва...

— Но, морё, Радшуль, а ме чайтлі, тэ мөд ногөнджык гөгөрвоан оломсө... — аслас думъясө вөйтчөмөн шуис Степан Фёдорович. — Шудаа быдмин... Ставторыс век судзсис тиян... Батыд, Михаил Михайлович, ыджыд сьёлөма, төлка морт. Абу миян моз тырлы-бырлы...

— Папа некор эз ылөддыв менө, эз дольлы, мый оломыс куш сөмын гажа сад кодь... Мый сәні сөмын и дзользьёны лэбачьяс да мича дзоридзяс пөртмасьёны. Сійё веськыда висьтавлывліс меным оломас овальс нелючкияс йывсьыс... Велөдіс быдтор йылысь аслым тшөтш думайтны... Быдтор вылө пыдіджыка видзөдны... Тагысь ме медьёна ошка сійёс...

— Нинөмла тагысь сійёс, антусөс, ошкынысө... — ышловзигмоз шуис Степан Фёдорович. — Тадзинад сійё кадысь водз сьөктөдіс тәнсьыд оломтө... Од кымын унджык аддзан ас гөгөрсьыд да кымын ёнджыка думайтан, — сымын сьөкыдджык овнытө...

— Мед сьөкыдджык кө, сы пыдди тэ төдан и кылан правдасө, — шуис Райда.

— Ме чайта, нылө, та понда жө и верөс саяд век на петтөм тэнад, уна думайтөмыдла...

— Ме ог ёна завидьты гозьяясыдлы... Водзтісө, гашкө, кор томджык вөлі, быдсяма руыс пыравывліс... А өні — ыркалөма нин ставыс тайё... Сытөг на позьё овны да нимкодясьны тыр лолөн...

Райда эз ылөдчы ни эз ышнясь тадзисө сёрнитігөн.

веськыда висьталіс сьёлём кылёмсө, и сьлөн татшөм сёрниыс кызкө ёна вөрзьөдіс мужичөйясөс, кыкнаннысө кутшөмкө да кутшөмкө ногөн вөрзьөдіс. Олөмад тай не этшавьс овлө тадзисө: мыйкө шуасны тә дырйи, и лов пытшкөсыд тәнад ыпнитө да заводитө чискыны-сотчыны, жар гожөмын öзйөм трунда моз, и некыз тә сйөс он вермы кусөдны — трундитө и трундитө. И тәнад олөмысь став нелючкияссө югдөдө, и найөс аддзөм-кылөмысь зэв сьөкыд да шог лолө.

— Степан Фёдорович, — чөвусьлөм бөрын медводзөн шыасис Питирим. — Тә вот куим челядьөс быдтөмыд... Ставыс нин гырысьбөсь найө, быдөн уджалө... Тә шудаа-ө олін? Семьяад? Оні тә шудаөн-ө асьтө кылан?

Степан Фёдорович эз виччысь татшөм юалөмсө да падмыштіс. Би вылө видзөдысь вугыр кодь лэчыд синьясыс кутісны шөйөвошөмөн печласьны, мурөстыштіс, лыс вылө пунктөм пачкаысь перйис выль сигарет, öзтіс öгыра ув помсянь, бандзибьяс нюрсунлытөдзыс нёнъыштіс табак тшынсө, сэссия и шуис, сигарета кырымнас гажтөма öвтыштөмөн:

— Кутшөм нин сән, морө, шуд!.. Велькыда кө шуны, ме тиянысь на öтка... Сэтшөм öтка!.. Кыдз эськө бурджыка шуны... Аддзывлінныд, көнкө, сука быдмысь томиник пожөмьяс пөвстысь сотчөм бока пөрысь кондаөс?.. Чурвидзлө тай сэтшөмыс важ пөрөдчөминьясын... Йылыс көрсьөма, увьясыс кыззисюрө чегьясьсөмаөсь, вужьясыс джынвийө сисьмөмаөсь, öдва нин кутөны вынтөммөм тушасө... Пөльыштас ёнджык төв ныр, и гыпкысь-усьсө сийө, быттьө эз и сулавлы тані уна вояс чөж... И торьясө некод оз и кут жалитны да казьятивны сйөс...

Оні нин ковмис шенмунны Райдалы да Питиримлы; сы вөсна мый найө некор на эз кывлыны Степан Фёдоровичлысь татшөм сьама сёрнисө: олөма салдат век вөвлі серамбана мортөн, варовитліс век гажаа, шмонитлывліс мукөд вылын и ас вылас... А öні, видзөд со, сьлөн лов пытшкын быттьө төдтөм жыр вөссис, зэв гуся жыр...

И тайо жырсо восьтом бөрүн друг быттьо ёнджыка пöрысьмыштіс Степан Фёдоровичыс. Кыдзко быттьо пондіс кажитчыны ёна нин небзьёмаён, позьо шуны весиг бонзьёма кодьон — чужом и туша, — и сы выло, татшом вылас, видзодігөн Райдалы да Питиримлы, кыкнанныслы, и збыльысь сувтліс син водзаныс том вөр пытшкын сулалысь, чизыр төвьясон да йиа зэръясон бонзьөдөм отка кондалон рудов мыгöрыс.

— Да тэ-о тайо, Степан Фёдорович? — нарошно вильшаджыка шыасис Райда: — Этатшөма друг коньөрмин?.. Татчөс войыслон сынөдыс али мый эз лөсяв? Али онтая көзяиньд шевуйтіс-вомдзалис сы выло ырыштчылөмысь?

Но вежсьом руа Степан Фёдоровичлы эз мөрччы нывлөн гажъялөмыс. Да, буракө, өні эськө сылы немьснемтор эз мөрччы, сы вөсна мый гуся жырсьыс лэдзөмаыс дзоньнас ойдөдіс мортыдлысь ловсө да ньоти кывзысьтөг нөбөдіс-нуис ытва визув моз.

— Збыльысь, войтыр, зэв откаөн ме ачымөс кыла, — бара на шуис Степан Фёдорович курыда. Сэссия и содтіс, асьсө пыдөсөдзыс гугөдөмөн: — Гөтыр дінө оз кыскы... Челядькөд торъя матыслун абу, кутшөмөс эськө ме көсийи... Удж вылын сьөлөм омөля жө бурмывлө... А олөмөй кольөма-исковтөма... Квайтымын арөс нин матын... Оліолі, век жө быттьо мыйкө ноки-вөчи... А олөм помланьө потөм вор дінын лои...

Степан Фёдорович сёрнитіс лөня, видзөдіс гажаа ворсысь би выло, небзьөм-личалөм чужөмыс вежыньтчыштөма курыд нюмысь...

Райда да Питирим дой кылана синъясон видзөдісны сы выло, но некоднанныслон кывйыс эз бергөдчы мыйкө шуны, сы вөсна мый эз и позь өні немтор шунысө: татшөм здукьясас мортлөн ловлы, кытчөдз сійө помөдз оз гугөд асьсө, кытчөдз оз лэдз сьөлөм сотысь ядсө, буракө, став мирыс овлө веськодьон...

— Öні ме, пöрысьладорыд, частө думайтывла: мыйла

нө менам тадзисö лои? Быттьö тай нө эг нин сэтшөм чапкас мортөн вöвлы... Эг йойөн ни... Уджысь эг повлы... Йöзыс век пыдди пуктылісны и... Гашкө и чайтöны, мый ме зэв шуда морт... А вот со менам лючкисö немтор эз артмы олөмас... Но ті энö чайтöй, мый ме норася!.. Ог... Ме некодкөд на эг сёрнитлы та йылысь... Меным сьöкыд та йылысь сёрнитнысö... Но тiянöс, кыкнанныдтö, ме зэв пыдди пукта... Позьö шуны — радейта... Гашкө и ылалөм аслам челядьöй пыдди... И окота висьталыштны аслам олөм-вылөм йылысь... Откымын ассьым думьясöс висьтаваны... Көть нин сы понда, мед эькө ті тшöтш энö тальöй менамлөн кодь туйсö... — Степан Фёдорович öтар и мөдар чөвтліс синьяссö ёртьясыс вылө: — Быттьö кывзаньыд кө?..

А мөдьясыс, дерт, пельнысö чошкөдөмөн кывзисны. Да и кыдз нө он кывзы, кор тэнад синьяс водзын морт, асьсö ньöти жалиттөг, пыдзыртö сьölөмсö?..

— Ранитчөм бöрын менам воштысьöма садьöс, — заводитіс пöрысь салдат выль сигарет öзтөм бöрын. — Но ёртьяс абу энөвтöмаöсь ассьыныс помкомвзводанысö, кык лун чөж кыскалөмаöсь, кытчөдз абу сюрöма санбат. Уна вир менам мунома. Содтөд вылө, и кынөмöй висьмөма. Жарысла да ранаысла, буракö, сотча вöлі, и юкталасны менö кутшөмкө гөптысь ваөн. Сы бöрын сэсья вир сора мыт мөдөдчөма... Шой кодьöс нин вайөмаöсь менö санбатас... Ачым ме немтор ог помнит... Кыдзи бөртинас тыдовтчис, быдса вежон чөж садьöй абу петавлөма. Кулөма нисьö ловья, муртса-муртса чискыштöма лолöй. Но он тай ньөмды, кор абу на шуөма...

Позьö шуны, мездіс менö санитарка. Дуся нима, зэв мелі да шань ныв. Пуксяс вöлі орчөн улөс вылө, шыльөдö юрсіөс — сәки ме эг на татшөм лысөм юра вөв, — чужөм вылысь пöсьöс сөстөм рузумөн чышкалө. Ок пö тэ, коньөр, кутшөма омөльтчөмыд! Абу пö и ловья морт кодь, куш лыд да кучикыд... Но көть пö öти пань шыд паньышт, менам кысь, мукөдыслысь кө он... Меным оз

пыр немтор, бөр петө... Но мед не обидитны нылос, кызмырдысьөн, зывокос венөмөн, нылала... Сэссия и вочасөн велалі, сейнытө тай быдөн на велавлөма...

Неуна ёнмыштөм бөрын менө мөдөдісны госпитальө, Дусяыс колльөдіс менө да сэтчө и кольччис уджавнысө... Ме во чөж туляси госпиталяс, Дуся век вөлі орччөн — мелі, шоныд кияса, вирысь ни ранаысь, ни мукөдторысь повтөм. И дерт, не сійө кө, код төдас на мый дыра ме эськө эг сувт кок йылө. Меным сэки кажитчис, мый ачыс енмыс ыстис сійөс ме дінө, мед не лэдзы на Степан Попковос мөдарьюгыдө, кытчө сэки быд лун мунісны дас да сө сюрсыясөн...

Ми өтвывтчим Дусяыскөд. Гашкө, тшөтш и сы вөсна, мый сылөн, меысь кындзи, матыссаыс некод сэссия эз вөв — бать-мамсө и посныдджык чоя-вокасө, ставнысө, нырөмаось фашистыяс. Менө комиссуйтисны, овмөдчим ми карө, көть эськө и сиктын менам вөліны на бать-мам и өнөдз на керка сулалө... Дуся пырис уджавны столөвөйө пөварихаён, а менө босьтисны министерствоө консультантөн — войнаөдзыс на ме помавлі кооперативной техникум и эг дзик сямтөм-төлктөмөн вөв.

Овмөдчим ми эг омөля, ньөжйөнникөн ме и вөрө куті ветлывлыны, ружийөөн, черитө кыйыштали и, вочасөн бөр ёнмышті... Рөгыд сэссия челядь чужисны — пи да ныв... Овны да овны эськө миянлы, ладөн да мирөн... Но ме вочасөн понді көдзавны гөтыр дінө... Вида ачымөс: мися, өд сійө тэнө кулөмысь мездіс! Быд ногыс янөда, а немтор ог вермы керны — кыскө мөдьяс дінө. И морөсөс йирөмөн йирө куслытөм мөвп: «Дусяыс абу пөв тэныд! Вёшьшөрө тэ сісьман сы дінын, кор гөгөр сэтшөм мича да төлка нывбабаяс дасьөсь юкны тэкөд шуд...»

Нөшта нин сы вөсна, мый сійө вочасөн ёна лэдзчысис: шыляліс-кызіс, ичөт тушааыд дзик нин сьөкыд гыр кодьөн лоис, и дуркджыка олө... Школаын велөдчылөма сөмын нель класс, и книга дінө ни некытчө оз пырөдчы... Медтыкө кынөмыс пөт... И жаль сійө меным, и зывок...

Мукөд дырйныс видзөдны ог вермы... Көть мый оз вөч сійө, көть мый оз шу — немтор меным оз кажитчы... Ставыс быттьө неладнө сылөн... А ме том на вөлі, комын арөсыс на эз тыр... Менө кыкис нывбабаяс дінө... И ме гусьөнникөн понді гуляйтны мөдъяскөд, война бөрад тай өтка нывбабаыд тырмымөн вөлі... И сәки нөшта нин сьөкыд лои... Нөшта нин зывөкджыкөн Дусяыс лои... Садь юрөн ме кызкө-мыйкө вермылі на кутчысьны, а кодалігъясө став лөкыс и дойыс петалис ортсыө... Зыкыс и шумыс сәки тырмыліс... Синваыд и укөрбаыс... А челядь нин куимөн быдмөны... Ставсө кылөны... Ставсө аддзөны... Кыдзи тай шуис Рада — став лөкыс пуксьө налөн сөстөм лав выланыс лым вылө са моз...

Ме век радейтлі челядьөс, немтор некор эг жалитлыв налы... Но найө вочасөн пыр көдзалісны ме дінө, буракө, кодалігъясад зыксигөн ёнджыка повзьөдлысьөма найөс... Да сәсся өд звермөм код мортыд и видзөднысө, буракө, абу андел кодь... А гашкө, и мамныс тшөтш пөльтыштис ме дінө лөгалөмсө — со пө кутшөм вөвлі, а өні, госсялыштис да, видзөд со мый вөчө... Мамныс дінөджык век сюртчисны челядьыс... Ме весиг эг сяммы некодлысь чужтыны вөр-ва дінө муслун... А мыйө вермис велөдны мамныс? Кор аслас грамота ни немтор. Весиг книга дінө некутшөм муслун абу... Сөмын пусьыны да пөжасьны кужө... Куим челядь пөвстысь весиг некод эз помав среднөй школа... Мыйөн сөмын быдмыштасны, ставөн видзөдөны өдийөджык утыштны гортысь — коді ФЗУ-ө, коді нөшта кытчө... Да и, сідз кө нин шуны, коды абу окота өдийөджык мунны ладтөминсьыд?.. Оні ме бура нин казялі: ладтөм семьяяссьыд челядьыс томөн-кадөн лөböны, мед өдийөджык лөсьөдны ассьыныс поз... Нөшта өти шудтөм поз. А мый нө, йөй юрад, кор некутшөм сям на абу олөмсө вежөртны, кысь бурсө лөсьөдан?..

Пиөй менам армияөдз на гөтрасьліс, важөн нин быдтысьө, олө Уфаын, тесть ордас... Оз ме дінын, батысь дінын, а төдтөм йөз ордын... И, буракө, ёнасө оз и кыскы

сійӧс ме дінӧ — во вит-ӧ-квайтнас кӧ ӧтчид волас, и то нин бур...

Но нинӧм таысь норасьнысӧ... Ме ачым медьёна мыжа таысь... Ме ачым эг куж, эг сяммы топыда сибӧдны сійӧс ас дінӧ... Кӧдзӧді ас дінысь...

Колӧ вӧлі олӧмӧс дзоньнас. ставнас сетны челядьбыслы... На ради медсясӧ овны... Чужисны кӧ нин найӧ... Найӧ ӧд абу мыжаӧсь, мый налӧн сэтшӧм лӧсявтӧм батьмам, мый батьмамныс оз вермыны видзӧдны ӧта-мӧд выланыс... Колӧ вӧлі челядь радиыс этшаджык думайтны ас йывсыным... Вӧр-ваын тай буретш сідзи и вӧчсьӧ... Шуам, кӧр-мам ылӧдӧ кӧинъясӧс пиыс дінысь... Ассьыс олӧмсӧ сетӧ, мед сӧмын пиыс кольӧ ловйӧн... Сы вӧсна мый тӧдӧ — пиыс бурджыка водзӧ нуӧдас олӧмсӧ...

А миянлы, видзӧдтӧ, аслыным на колӧ бурджыкасӧ овны. Гажаджыка овны... Юны да гуляйтны... Бокын кырсапны... Гортад сьӧлӧмыд оз бурмы да... И ме ӧмӧй ӧтнам татшӧмыс? Воштӧм шӧдсӧ кор оз ков корсьысьыс? Мыйта колӧ сэтшӧмыс!.. Пазӧдам-жугӧдам ми асьнымӧс олӧгчӧжным да и свет вылас лӧдзам ас кодным жӧ тшыкӧдӧм ныла-пиаӧс... И ставыс заводитчӧ выльысь...

Сёрӧн ме понді тайӧс гӧгӧрвоны... Некеыз нин оз позь ӧні выльысьсӧ заводитны... Челядь быдмӧмаӧсь... Аслам олӧм кольӧма... Но ме тӧянлы шуа: гӧтрасьӧмыд — морт олӧмын медся ыджыдтор! Сыысь главнӧйджыкыс сӧсса немтор абу!.. Сідзкӧ, и видзӧдны сы вылӧ колӧ, кыззи медся ыджыд событие вылӧ... Таын тӧнад и аслад шудыд... И гӧтырыдлӧн... И челядьыдлӧн... А оз кӧ лӧсяв — став нелючкиныс да шогыс таын жӧ... Гортад и удж вылад... Да, весиг удж вылад... Сы вӧсна мый сьӧдас, тышкас-мышкас олӧгӧн морт лӧдзчысьӧ, оз быдмы, вартан машина бергӧдлысь думайттӧм вӧв кодьӧн нӧм кежлас кольӧ... Менам эз ӧмӧль юр вӧвлы, бур ногӧн кӧ сӧвмӧдігӧн, гашкӧ, и мыйкӧ ыджыдтор жӧ вермис думыштны... Но кысь!.. Кор вежӧрыд мӧдтор вылӧ веськӧдӧма... Коо мӧдторысь мучитчӧ... Нӧм чӧж лонс сідз-тадз уджъяс вӧ-

чыштавны: то кодлөнкө отсасысь, то консультант... Кодлыкө лыдпасъяс чукөртан, доклад лосьодан... И татшөм удж вывсьяс на не этшайсь вештывлісны ййіталігъясад... Уджалөм-керөмсьыд сөмын том дырйи сьөлөм бурмывліс, кор пөрөдчылі, видз-му уджавлі... Мудзтөдзыд муркөдчан вөлі и — тыдалө вөчөмайд... Ранитчөм бөрын эз ло та вылө выной... Сэсся, видзөд, и олөмой мөдар кусынь вежыньтчис...

Степан Фёдорович чөв усис, кызкө дзоньнас лябмуни-лөньөдчис, быттьө аслас висътыслөн жө сьөктаыс топыда личкис морттө. Сэсся и гөрддзалис став сёрнисө ассьяс:

— Сымда и эм став шудыс менам, войтыр... Оні сэсся асьныд думайтөй, уна-ө сійө менам вөлөма, шудыс... Онтай ме быттьө и дивитышти Радаөс... Откөн олөмсьяс... А кутшөм ме дивитысь!.. Оз и ков гөтрасьны сьөлөмсяньыд радейттөг, ыджыд любовтөг... Мед эськө сійө вөлі отарладорсяньыс и мөдарладорсяньыс... Ота-мөдтө бурджыка төдмалөм да гөгөрвоөм бөрын... Татшөм делөад ни жалитөм, ни слаблун, ни кутшөмкө выгөда босьтны зильөм, — немтор оз вермы вежны радейтөмтө... Сытөг коркө да коркө мөдар бөдъ помыс сьө равно кызкө чорыда вартас... И ставсө пузувтас... И мелөн кодъ жө мырдысьөн олөм мөдөдчас...

Вой кежлө биө лөдісны кызджык кыз пу дінъяс, мед эськө лосьөдлытөг, ноддя моз, дырджык шлонгисны-ломтысисны найө. Сэсся и водісны биөн югдөдөм да шонтыштөм чомйө. Мужичөйяс көсийсны водтөдны Райдаөс отнассө көр ку воль вылө, но ныв ас ногыс вөчис, вольсалис сійөс вомөн ног — мед пө быдөнлөн мыш увтыс кос да шоныд лоө. А шөракостө водөмысь Райда эз кут пыксьыны...

Сэсся и лөнисны ставөн, важөн нин узьмөдчөм вөрваыс моз жө. Дерт, пырысь-пырсө некод эз унмовсь, сы вөсна мый унакодъ лои сёрнитөма сьөлөм вөрзьөданасө, виртө өддзөданасө. Но вочасөн войся ыркыд сынөдыс,

билон азыма шлонгомыс, ыджыд козьяслон муртса кылысь шувгомыс пальодисны да лоньодисны войтырлысь ырзылом ловнысо и мудзыштом вир-яйнысо тшотш, и оти борся мод унмовсялисны найо — медводз Степан Фёдорович, медборын — Питирим...

Астья войнас Райда садьмис кымомысь. Би воли кусаң выйын. Кражъясыс шорвыйодыс сотчомаось да оръясьомаось, шомсялом йыла помъясыс чусконы-тшынасьоны: ловпуыд тай абу на сирод пожом — лосьодлытогыд дзикодзсо оз вермы сотчыны.

Райда видзчысьомон, мед не садьмодны узьысь ертъяссө, петис чомйысь, йожгылясигтыр чукортис ваймом бипурын пось шом, полялыштитис, и кор вылысь мыччысис ловзьом би кыв, ньожйоникон пондис вердны сийос такежло водзвыв дасьтылом сирод чагысон. А сәссия и чукортис жуг кодыдз косьмом шонид сәрапомъяс, и ныв киясон ловзьодом би горша босьтчис на дино...

Гөгөр воли пемыд на. Лонь. Енәжын сука сярвидзисны кулак гырся кодзுவъяс. Сымда кодзув!.. И сәтшом яра найо ломзисны!.. Ныв некор на эз адзвыв татшомсо...

А кыз пемыдыс быттё личкө-топодо гөгөрбоксянь... И Райдаос друг шымыртитис полөм, лолыс сидзи и сыркмунлис повзьямысь... И ачыс эськө эз вермы висьтавыны, мыйысь енджыкасө тадзи весьопорис... Гашкө, чайтитис, мый кодкө — ош либө ачыс вөрсаыс — вермис вувзьясьны пемыдсяныс? А гашкө, и сылон отка ловъя лолыс ляпмунис пемыд да лонь мирыслон ыждадысь, дзирдалысь кодзувъяса йиркыслон пыдостомлунысь?..

Сийо муртса эз садьмод узьясьясос. И окота воли босьтны киас да зарадитны Степан Фёдоровичлысь двустволкасө...

Но кос пескыс гажтомчөм би вочасон пыр енджыка ырзис, паськыджыка вөтлис пемыдсө, Райла шоналис, и повзьялөмыс сылон бөр пондис лаймавыны. Сийо они видзодис, кызди би югорьяс вильыша ворсоны узьясьяслон чужомъяс вылын, да друг мөвпыштитис сы йылысь, әм-ө

кутшөмкө йитөд мортлөн чужөм да сылөн лов кылөм, сылөн этшыс костын. И тайө мөвпыс дзикөдз гажмөдiс нылөс.

Со, шуам, Степан Фёдорович, — лөсьөдлiс ас кежас Райда. — Сийө, гашкө, буретш сы понда и өдийө öзйысь да отарө-мөдарө шыбласьысьджык, мый енмыс сетлөма сылы гөрба, весиг чегсьөм кодь ыджыд ныр и сэк жө — ичөтик кизь кодь вом?.. Тадзисө отлаөдөмысь дядьöйс-лөн чужөмыс и ортсыяныыс кажитчө ыкшакодьөнджык...

А Питирим? Либө Питько, кызд тай мамыс шуө?.. Кымөсыс сылөн да нырыс быттö черөн отчыл лөсыштöмысь артмөмаөсь, ныр тшупöдыс со оз тöдчы. Важ грекьяслы пö татшөм чужөмыс кажитчывлөма... А кысь изьватасыслы татшөм чужөмьясыс? Райда казялiс нин, мый на пöвстын вель унаөн веськыд ныраясыс... Быттö тай нө Грециясяныд татчөдз, Печораөдз, абу зэв матын?..

Питиримлөн чужөм серыс дзик мөд кодь руаөн сийөс петкөдлө: быттö мортыс асныраөнджык кажитчө; быттö ас думьясасджык вöйтчөма да налы сетчөмөнджык олө. И сэк жө небыдөн да бурөн сийө кажитчө... Торйөн нин ёна нимкодьмөдiс нылөс Питиримлөн пельыс: сийө вöлi гөгрөсiник, нывкалөн кодь пелькиник, би жарсьыс алöймыштöма да мыччасис көр гөн кодь сук юрси пытшсяныыс лыс улысь муртса на чургысьөм яг рыжик моз. Райдалы весиг зэв окота лои малалыштны тайө пельсö...

Сэсся Райда казялiс: «Меным ёна любөджык видзөдны Питько вылө, Степан Фёдорович вылө дорысь...»

Но мөд гөлөс та вылө пырысь-пыр жө вочавидзис: «Сы вöсна мый сийө томджык да шыльыдджык... И мичаджык... Мича вылад пыр видзөдсьөджык... Көть пу вылө, көть лэбач вылө, көть морт вылө...»

«А мыйла нө либө вирыд друг шызис сы вылө видзөдигөн? Лов шыыд дзугсис и?..»

«Эн лөсьөдлы нинөм абусö... Мортыс меным кажитчө сы вöсна, мый төлка да шань, быдтор сяммысь... Бур сьөлөма ёрт...»

Сэссия Райда нёрвотчис чом вом дорё, лосьёдіс юрсё кыз вуж вылө да дыр чёла видзёдіс коз лапъяс пыр югыда сярвидзсыс кодзувъяс вылө... Вочасён сылы пондіс кажитчыны, мый мукөд кодзувъясыс оз енэж йиркын дзирдавы, а лэччёмаось да өшйёмаось сук лыска увъяе пытшкё, сәні югзьёны, шочиника уялысь би киньяс сор... И таысь кодзула енэжыс лои быттьё нёшта на гөгөрвотөмджыкөн, нёшта на шйёвоштанаён... Збыль өмөй абу сәні пом ни дор? — чёла мөвпаліс ныв. — Збыль өмөй сәні дугдывтөг киссьёны да бөр чужёны выль мирьяс?.. А мортыдлөн лолыс? Абу өмөй сйё татшөм жё шензьёдана да гөгөрвотөм? Верман өмөй төдны, кызди да мый чужё либё киссьё-пазалё сәні?..

Сэссия друг көнкө пемыдас, ты весьтын моз, кыліс лова то кырыштысь норсьыс-нор горөдөм:

— Курлы-курлы-ти-ив...

Сэссия нёшта, нёшта, матынджык... И сымда норлун, сымда гажтөмлун вөлі тайё горзёмас, торйөн нин бөръя нюркнитөм шыас, мый Райда дзикөдз весьөпөрис, чеччыштіс чомйысь, видзөдө, видзөдө пемыдас, сьёлөмыс нөйтчө морөсас.

— Юсь тай чуксасьё, — кывзысигмоз шуис тшөтш садьмөм Питирим.

— Мыйла нө сйё татшөм нораа чуксасьё? Мыйла нө вой шөрнас лэбалё?

— Гажтөмчө, тыдалё, ёна... Гашкё, пөвсө воштіс...

— Да кысь нө сйёс войнас аддзас?

— Гашкё и чайтө, мый воча сетас гөлөссө. Юсьыд пө тай пөдругаыс вөсна гажтөмысла кувны вермө...

— Ой, коньөрөй дай лэбачөй!.. Мый дыра нө нин сйё лэбалё тадзи? Гашкё, тулыссяныыс нин? Кутшөмкө звер лыйис другсө да?..

Дзирыд кодзув вевта лөня узьысь вөр-ва весьтын, ыркалөмысла зэв гораён лоём сынөдын водзё нөйтчис сир курыд шоглуна горзём:

— Курлы-курлы-ти-ив...

Садьмис Райда лыйом шыысь — матын гып-гыпкерисны кыкысь, вевсьон моз. Восьтис синьяссө, вочаасис видзөдласнас би дорын пукалысь Питиримкөд. Вөлі луньяугыд нин.

— Степан Фёдорович водза-водзсянь уткаясөс полошуйтө, — шуис Питирим юрсө тылань доровтлөмөн.

— А тэнад нө мый оз узьсысь? — Райдалы абу на окота петны чомйысь; аслас көлуйысь вывті сійөс содтөд шебралөмаось, и Питирим со бура пестөма бисө — шоныд, лөсьыд, чөскыда узьом бөрын быдлаті быттьө личалөма-кокнялөма.

— Менам став вөтыс нин вөтавис, — шуис Питирим. — Вай чеччы да мыссы... Чай менам дась, юыштам и петам кулөмнымөс кыйны...

— Мый нө эськө тэ вөтасин? — водзө на юасис Райда.

— А, мый оз ковсө!..

— Жаль висьтавытө? Али сэтшөм нин гусятор адзылін?

— Оти нылөс зэв ёна вөталі... — шпыньмунис Питирим.

— Но? Быттьө абу нывьяс бөрся котралысь да? Ме чайтлі, өтдортчан тэ наысь...

— Зіля эськө и эм өтдортчыны да... Важсыс на пөт... Но, буракө, ловья юрөн он мын ті вокысь... Вөтнад, да всё равно сирасяныд... Торйөн нин сьөлаястө сөйигөн...

— Тшак либө колө сөйны...

Райда босьтис майтөг да ки чышкөд, вильыш нывка моз чеччалігтыр чепөсйис ты дорө. Друг сійө став вирьяйнас кыліс, кызди мышсянныс сы вылө видзөдө Питирим. Бергөдчышталіс да кыйис ёртыслысь гажтөмчысь, пөсь видзөдлассө, и таысь лигышмунисны кок пидзөс йөзвиясыс, тайкө усяс, и жарө шыбитіс... Сійө весиг эз казаяв, кызди вежсьөма ывлаыс: ыркыдджык лоөма, ко-

дзулось енэж пыдди уліті кывтöны сьöкыд кымөрьяс, дасьöсь лым лэдзны. И төв вочасөн садьмө...

Пыжөн воис Степан Фёдорович, пыж нырыс шарөд-чигтыр юковтіс берегдорса сук эжörсө.

— Кытшовті ассыным тыös, — кинас öвтыштöмөн шуис вöралысь. — Морыд, унакодь утка повзьöді, а уськөді сöмын öтиös. И то гөгöра...

Пыж пыдöсын, вынтöма сюркнясьöмөн, дзөрьяліс зэв ыджыд ловья утка. Пемыдруд мыш вылыс мичаа серөдöма шочиник еджыд чутьясөн, морöсыс да тшöтш и голяыс водсяньыс чим еджыдöсь жö.

— А нырыс, нырыс мый кузья! — шензьöмөн горөдіс Райда. Сійö лажыньтчис, кöсйис жалитöмөн шылькнитны ранитчöм пöткаös. Степан Фёдорович мыйкө горөдіс, но вöлі нин сёр. Гөгöра змей моз лыйыштіс кузь голянас да шыла кодь ёсь нырнас сизьдыштіс Райдалы ки пыдöсас, кытысь пыр жö сөдзтысис вир.

— Эн матыстчы сы дінö! — сёрмöмөн öлөдіс Степан Фёдорович. — Менсьым кырымös кыклаті нин розьöдіс. Вир выв ош кодь скөр...

— Но и молодец, — шуис Райда. — Аслас олём вöсна помөдз тышкасьö...

— А часлы, вот ме петкөдла сылы! — Степан Фёдорович кöсйис кватитны збой лэбачös, но мöдыс, чирзигтыр, бара на вирөдз сизьдыштіс шыла нырнас, öтчыд дай мöдысь... Сэки вöралысь дзикөдз звермис, кызкө-мыйкө кватитіс коньөр лэбачös кокьясöдыс да пондіс юрнас швачөдны-кучкавны пыж дорö...

— Мый тэ вöчан?! Мый нö тэ вöчан?.. Лэдз öни жö!.. — шойөвошöмөн горзіс Райда. Сылөн горзём шы вылө котөрөн воис тшöтш Питирим...

Степан Фёдорович шыбитіс гөгöраös берөгö. Збой лэбач эз нин сэсся лэптав шыла ныра юрсö...

— Тадзи öд оз жö ков, Степан Фёдорович... — Ыджыд доя гөлөсөн дивитіс Райда. — Бурджык эськө нöшта öтчыд лыйин ли мый ли...

— Мыйла зарадсö весьшөрö видзны? — шуис Степан Фёдорович, кияссö мыськигтыр. — Сэссия и дөбельки-öдз скöрмöдiс сийö менö, со мыйта розь кырымъясö вöчис... Да мый тi кыкнанныд нырнытö öшöдiд?.. Вöралiгас нö кызди витöгыс? Виртöгыс да?.. Кысь нö сытöг свежöй шыдыс?..

— Менам öнi татшöм шыдыд öдвакö кылалас... — ышловзис Райда, сийö некызд на эз вермы ыркавны весьöпöрлöмсьыс. А нöшта нывлы кутшöмакö вöли шог тшöтш и сыысь, мый öнисянь сийö, буракö, кутас видзöдны Степан Фёдорович вылö мöдджык синъясөн нин...

— Но, миянлы буди колö ветлыны видзöдлыны кулöмös-а? — личöдiс Питирим зэлалыштöм костсö. — Чайсö бöртиджык юам... Сыныштам-керам да, вытьным лöджык...

— Ветлам и эм! — окотапырысь чепöсйис Райда.

— А дырджык кö лöө тiян, ме сёйышта да котöртла мукöд тыяс дорö, — шуис Степан Фёдорович.

Райда пуксис сынны кык лопта пелысөн. Регыз сылөн, мый вынсьыс сынышталöмысь, лөнис лолыс, эз нин лo окота мöвпавны мисьтöм серпас йывсьыс.

— Войпель нырсö мыччалö, вермас лым вайны, — шуис нылös бура гөгөрвоысь Питирим, кымөръяслань чатрасиг.

— Сiдзкö, тэа-меалөн вуграсьöм талун оз ло?

— Оз ло... Став жар чериыс татшöм луннад пыдö дзебсис...

— Но сы пыдди, гашкö, мукöд чериыс ветлöдлiс?

— Ме чайта: ветлöдлiс...

— А Войпельыс сийö — вой төв, да? — сынигмоз водзö юасис Райда.

— Да-а, — нюжöдiс Питирим, сэссия и серöктöм сорөн содтiс. — Кага дырсянь сы вылö менам лөгöй петö...

— Мыйыськö?

— А няньнымös век вöли кынтö... Тöвнас муна-муна даддын еджыд тундраöд, кынöмыд пондас сюмавы...

Коран мамыдлысь нянь, а сійо — ийзёма, пиньыд о́з мёрччы... Мыйла татшом чорыд няньыс? — ёна скормо́мөн юасян мамыдлысь. Войпель по́ кынтёма, шуо сійо. И о́д, пеж лолыд, быд лун кынтё... Кыдзи татчө он скормы?.. Часлы, мися, быдмыла да ёнмыла! Петкөдла ме сылы пуж...

— А сійо со век на ловья, — мөвпалана нюмъяліс Райда.

— Ловья...

Райдалы дум вылас друг усё Палаш пөчөн петкөдлөм фото — лымъя эрд вылын көр видзысьлөн семьяыс... Онi со кын нянь йывсьыс висьтыс сэтчө жө содтөд... «Кутшөм о́лом! Кутшөм челядь дыр!» — синва петмөныс жалитө Райда.

Ёна турунзём ичөтик шөрдi дортi кывтигөн ныр увсьыныс чепөсийс утка позтыр, мамыс — сьодов ва тар — повзёмөн «кра-кра» горзигтыр, лэбыштис водзө. А пияныс оз на вермыны лэбзынысө, но лапаяснас и бордъяснас шенасиг-шпачөдчигтыр зэв жө өдийө төвзёны ва веркөсөдыс мамыслань, садьтөг повзёмнысла, коньөръяс, чирзёны... Сизим пи...

Пыжаяс сувтисны, видзөдоны пышйысьяс вылө. Мыйөн ставөн воөдчисны мамныс дорө, тюп-суныштисны, ставныс өтпыйө, и дзикөдз вылө вошисны, быттьө абу и вөвлөмаөсь.

— Пөдисны али мый ва пыдөсас? — юасьө дзөръялысь Райда.

— Хы, пөдтан найөс... — сералө ёртыс. — Суныштисны нятшаяс пытшкө, мун да и корсь сэсся найөс. Гашкө и сөмын нырнысө чургөдисны ваысь, мед неджык тыдавны.

— Мыйла нө тайөяс век на оз вермыны лэбавны?

— А код төдас... Гашкө и мамыслы дырджык пөлыс эз сюр тулыснас... А гашкө, воддза позсө рөзөритисны — йөз ли, зверьяс ли... А рөдмөдчыныд, тыдалө, быть колө... Рөдмөдчытөгыд, тыдалө, некод оз көсий овны... Оз вермы ли...

Райдаос парскыштисны тайо кывьясыс, сийо юасяна видзодлис ёртыс выло, но модыс сесся немтор эз шу...

— А Степан Фёдоровичыд ко казялас тайо бордтом поэтырсо, отитог вермас котшкөдны...

— Вермас... — оти кывьясис Питирим. — Колө висьтавны сылы, мед тані сийо оз кыйсы... Став черисо по полошуйтан лыйсьомнад...

— Сідзи и шуам! Тырмасны сылы мукөд тыясыс...

Куломныслон берегдорса сямод табьясыс вильыша вöрисны-йөктисны. Питирим долыда видзодлис Райда выло: «Шедома!» Сийо лэптыштіс куломсо сюрөсөдыс, и сәні кузялаыс, пескылясигтыр, сярвидзисныгырыськодь черияс.

Пыж пьдөсө ляскысис медводдза пелядь — польо кодь тшөг, зэв ичөтик юра да кыз тушаа, крута лыбысь мыш выла. Негырысь эзысь сьомыс кузяла ногыс быттьо вералө спираль-сутуга кодь визьясөн... Но кутшөм шылыд да тшөг! Небось тай кодкө вердлөма!.. Сесся Питирим мездіс чер пу кузьта кымын пелядьос и весиг любөпырысь видзыштіс сийос киас... Тайо кажитчис ещө на тшөгджыкөн, ичөт юрсяныыс тшупөдөн моз кызіс-гөгрөсмис тушаыс, да сідз жө вералис сьодов спиральясөн эзысь сьомыс...

Сесся вөліны нөшта на пелядьяс,гырысь ёкышьяс да кельчияс, сынпияс да мичакодь сирьяс. Кулом помөдз воом бөрын пыж пьдөс дзоньнас вевттысис эзысьөн да гөрдөн...

— Войпельыд тэнад, няньтө кынтылөм пьдди, мича чери на модөдіс мянлы, — любөпырысь шуис Райда, кор найо воисны кулом помөдз.

— Да-а!.. — сералис Питирим.

Сәки Райда казяліс, кьдзи водзынджык лэптөм пелядьяслөн сьом вылысь вуйшөны-кусөны спираль кодь визьясыс. И кьдзкө дзоньнас нярмунөны тшөг тушаясыс... Висьталіс та йылысь ёртыслы да содтіс:

— Абу лөсьыд видзодны, кызди тэнад синъяс водзын кусо ловья лов... Вушйо-бырө мичлун...

— Гөгорасо лёкысь виомыс сэтшөма нормодис тэнө, да? Некедз оз такав сёлөмыд? — Питирим чуймыштөма Райдалон тадзи майшасьомысь, а тшөтш и чери кусом казялөмысь.

— А тэныд нө абу жаль ловья лолыслон кусөмыс? — вочавидзөм пыдди ачыс юалис ныв. — Тэнө оз вөрзөд тайо? Оз дойд?

— Но, шуам, чериыд абуджык сэтшөм жаль, сийо бытьо турун кодынджык меным кажитчө... Сөмын жаль овло, кор кульмысь шедо, кор покйыс нин лювалө-петө... Сийо жө пелядыс пө сө сюрс пок чирйөдз лэдзө... Бура кө кыйны да видзны сийос, некор оз быр... — Питирим юасяна видзодлис Райда выло, көсийс тодмавны, мөгмөдис-ө тадзисо шуомнас да содтис: — А вөрса пемөсьясыд вот меным жальось... Яйтө эськө ме и сөя жө, но пищаль өг босытлы нин кио дас во... Сэки, дас во саяс, өна доймасис лолөй... И мыйкө бытьо чегсис сэни... Выль ногаджык лоис... Буракө, жальлуныс унджык лоис... Зверьпөтка динө тшөтш и... Торйон нин вөр-ваын олысьяс динө. Од налы сидз нин вывти сьокыд овнысө... Сөянтө некод оз дасыты. Төлын кодзыдыс дзужалө. Кузь пиняяс да лэчыд гыжъяяс быд здукө кыйөдчоны тшапнитны... Мый со найо, коньөръяс, миян йылысь, йөз йылысь, думайтөны-а?

— Ас ногыс мыйкө, дерт көнкө, думайтөны жө... — мөвпалана шуис Райда.

Степан Фёдорович вөлі би дорын на. Кор аддзис пыж пыдөсын сярвидзысь мича черитө, лэчыд синъясыс горша югнитисны:

— Но, морө, ти тай збыльысь, вөлөм, он шутитөй! Ти-ян тай чери вылас вирьясыд зэв өна лөсялөны!.. Но добра!.. Тадзинад ми төвбыд кежлө чериасям... Пелядсьө колө торйон солавны... Вай ме ачим кера и солала... — Босытис кнас медыджыд пелядсьө, малалыштитис тупляос бокь-

яссө. — Но морө, закускаысл.. Но добра!.. Ёна кө пон-
дас шедны, ми солалам и тшынодам... Сөмын тай кулө-
мыд миян куш өти... Питя, тэ, гашкө, котөртлан гортад,
кутшөмкө дядьбөлысь корлан нөшта гоз-мөд кулөм...

— Тырмас миянлы өтиыс... — воча нурбыльтіс Пити-
рим.

— Ми өд татчө эг локтөй тысьыс став черисө курав-
ны, — өлөдыштіс ышмөм дядьбөс тшөтш и Райда.

А Степан Фёдорович думсьыс быд ногыс пиняліс ась-
сө, мый эз босьт сьөрсьыс гоз-мөд кулөм либө кузь тыв-
сө...

Сійө лэчyd пуртөн керис пелядьяссө, и кыз яя госа
кынөмьяссө восьталігөн керигчөжыс нимкодясис лолыс.
Сэсса сьөмнас и вир сорнас бура солаліс найөс кык пөв-
ста целлофанөвөй мешөкө...

Та бөрын вөлісь котөртіс уткаясөс кыйны...

— Висьөдчигөн шусьө Степан Фёдоровичыс, а, видзөд
со, көчалысь пон моз на котралө, — серөктіс Питирим.

— Горшыс тойлө да, дерт... — зэлыда кодь шуис Рай-
да. — Эг ме чайтлы, мый сійө татшөм...

Найө кыкөн пукалісны би дорын, тэрмасьтөг вильө-
дісны төрытъя пуөм ёкышъясөс да юисны сук чай...

Ывлаыс букшасис, кымөръяс костөд шонді мыччысь-
ліс зэв гежөда, ваысь ранитчөм утка моз сөмын — мед
лолыштны и өдйөджык бөр суныштны, вөлі ыркыд, но
сы пыдди эз дөзмөдчы ташка. Ты вылын сынөм-нок-
сьыштөм бөрын, да ещө бур чери кыйөм бөрын, вөлі лө-
сьыд налы, не кө артавны сійөс, мый Райда бара на дзу-
гыльмыштіс олөмаджык ёртныс вылө.

— Ме мөд кодьөнджык чайтлі Степан Фёдорович-
сө, — аслас думьяслы сетчөмөн шуис сійө. — Война пыр
мунөм морт... Быттьөкө и сылы колө бурджыка төдны
олөмыслысь донсө... Ёнджыка гөгөрвоны бурсө да лөксө...
Ылө водзөджык видзөдны... Быттьөкө ыджыдджык водз-
саян вын колө лоны олөмыслөн нелючкияскөд вермаси-
гөн... А сылөн, видзөд, ставыс мөдарө лоөма... Буракө,

войнаыд мукөдсө нэм кежлас весьөпөртөма... Сэтшөм пө тай дженыд олөмыд вөлөма!.. И нинөмла пө аския лун йылысь думайтны!.. Мед сөмын талун лөсьыд вөлі... Мед сөмын талун пөт и код... Олоны сэсса тышкас-мышкас, кодарө төв нуас, чарөм вывті кырсь-кильёс моз... Мый уджавны-вөчны? Көть мый, мед сөмын кокныдджык да пөтөсджык вөлі... Кутшөмкө югыдджык мог сувтөдны да сы вөсна вермасыны? Сьөлыштны пө ог көйы!.. Татысянь сэсса и став лёкыс петө... Гырысьджыкъяс водзын нювсьөм... Слабджыкъясөс чиршөдлөм... Кык бана шаньгаасьөм... Сійө жө горшлуныс абу өмөй татысянь жө?.. Төлк да слөй кө сюрас — кватитны аджавтөдз... Мед сөмын киөдыс некод эз кут-а... А бөртинас сэсса со лөвтам: олім-вийсим пө, а пөрысьладор потөм вор дінын колим...

Райдалөн пыдө вөйөм лөзов синъясыс быттө руасисны шөгөн, и вижоватөдз гожъялөм пельк чуньясыс вынысь песісны посныдик корьяса бадь йыв; быттө тайө нюдз вожас чукөрмөма вөлі олөмсьыс став гудырыс да лёкыс, и ныв босьтчөма помөдз нырны-пазөдны найөс.

И Питирим друг сьөлөм тырнас кыліс, кутшөма сотөны тайө мортсө олөмыслөн зывөктана нелючкиясыс...

Сэк жө Питирим казяліс, мый өнісянь сійөс ещө ёнджыка пондас кыскыны Райда дінө, кызди войся ылалөм бобулөс югыд би дінө...

Но Питиримлы эз вөв окота и ёна дивитны пөрысь салдатөс, и сійө, думсьыс, зіліс небзьөдыштны сёрнисө:

— Йөзыд дыр на кутасны новлөдлыны войнатө ас пытшканыс... Көть эськө сійө быттө и важөн нин кусіс... Сымда вир да дой бөрад... Мися, сійө жө Степан Фёдоровичыс... Эз кө сьөкыда ранитчы, гашкө, дзик мөд нога олөм пуксис сылөн... Мөд мортөн вөлі... Олөмад ставыс сэтшөма кысьөма өта-мөдыскөд... Весиг тай дөрөмсьыд өти сунис кө нетшыштан, дзоньнас заводитө быздыны..

— Но өд быдөн кө кутам куш сөмын ыстысьны кутшөмкө помкаяс вылө, сәки дөбелькиөдз ставыс дзугсяс!

Оз кө быд морт понды чорыда кыв кутны аслас керём-вөчөм вөсна...

Питирим та вылө нинөм эз вочавидз пырысь-пырсө. Сэсся сійө кутис нюмъявны да шуис:

— А меным окота нин лөсьөдны выль сьыланкыв... Важөн жө нин думайта сы йылысь... Арся сьыланкыв... Лэбөны зарни корьяс, кышөдчөны кок улын... Лэбач кельөбъясын кылө төждыяна гор... Гожөмыс бара нин ку-сө... И менам олөмөй тшөтш нин мөдөдчөма аръявыв... А век на виччыся мыйкө бурөс... Рада, вай думышт сэтшөм кывъяссө... А горсө да ладсө ме быттё кыла нин...

Питирим мизгис-сьылыштис.

Райда чуймөмөн видзөдліс ёртыс вылө, коді тадзи бергөдіс сёрнисө.

— Кутшөм нө ме сьылан гижысь! Ме учитель, литература велөдысь... Йөзлысь гижөмасө велөдысь... А ачим нинөм вөчөм могысь сөмын дурыштла... Менам кывъясыд сөмын тшыкөдасны бур ладсө...

— А тэ видлы, видлы!.. Мед эськө и югыд и сөстөм вөлі, а тшөтш и нор...

Ылыс тыясланьын кутисны гыпкыны-луйсыны.

— Степан Фёдоровичыд бара на заводитис воуйтны, — шуис Райда.

— А тэа-меа мунам сэтөр видзөдлыны, Кузь вис пөлөнөд сьөд сэтөр ёна артмывлө, — шуис Питирим. — Вуграсьөмысь талун немтор оз гынмы: кымөра да төла да...

Вис пөлөнөд мунны вөлі зэв сьөкыд — лөк ловпу сора бадь да голяөдзыд эжөр. Аръявылыд эжөрыс бура чорзьөма да лөма бритва кодь лэчыд дорьяса, чужөмтө вундө. И бадь-ловпуыс вуж дінсяныс оз веськыда кыпөдчы Эжва дорын моз, а ёна мегырасьөмөн ошалө ва весьтын, и некыз он вермы казьявны, көні помасьө муыс да заводитчө ваыс.

Эжөр да зөридз пөвстысь и югьялысь кыз корьяса вааканьясөн да нявдаён кыскөм то векнявлысь, то паськавлысь вискысь, дзик ныр увсьыныс, тэрыба ырситлыв-

лісны мича сера жыдачъяс да матінікӧ лэбыштӧм бӧрын вильыша шлӧчкысылісны-пуксылісны быд пӧлӧс лӧльӧ-гагнас жуысь ваӧ.

Сӧсся и сӧтӧрлӧн нинӧмӧн сорны позьтӧм чӧскыд кӧрӧн чорыда ӧвтыштӧс — водзын кузь турунсӧ личкисны сӧтӧрлӧн мырдвеж на кустъяс, и быд кор сӧні сӧтшӧм лӧссыда дорӧсалӧма да быгӧртӧма.

Сӧтӧрыс ӧшаліс гырысь и тыра розъясӧн, но вӧлі пӧшти ставыс на веж, пырыс тыдалана тусьяса, и веж пытшкӧсас бура тӧдчисны вылісянь улӧ асыкалысь везъясыс...

— Ой-ой-ой, кор нӧ тайӧ добраыс кысьмас! — жалитӧмпырысь горӧдіс Райда, ылӧдз вежӧдысь кустъяс ыллӧ гоньялігтыр.

— Ӑні сӧсся некор нин... — Питирим тшӧтш жӧ падмыштіс татшӧмтортӧ аддзӧмысь. — Сідз нин сылы ковмас пырны лым улӧ, гожӧмыс кӧ эз тырмы...

— Некор али мый тӧян тані оз кысьмыв сӧтӧрыс?

— Мыйла оз, кысьмылӧ... Косджык гожӧмъяснад, кор шондіыс тырмӧджык. Додь тыр позьӧ вотны татысь...

— Да-а, Эжва дор сертиыд тані тай ӧна и эм ыркыд вӧлӧма... Вой морейдлӧн кӧдзыд лов шыыс ӧна и эм тӧдчӧ.

Но кустъяслӧн лунвылӧ банысь позьӧ вӧлі бӧрйыштавны сьӧдӧдӧм тусьяссӧ, и найӧ кутісны ӧктыны целлофан мешӧкъясӧ.

Недыр мысти Райда шензьӧмӧн горӧдіс:

— Тані кодкӧ вотчӧма нин да! Миянӧдз... Турунсӧ со майкӧма-талялӧма... Да ӧд тані не ӧти морт вӧлӧма...

— Ош тай дурӧма. — Питирим копыртчӧмӧн видзӧдаліс кок увсӧ. — Сӧтӧртӧ сійӧ ӧна жӧ радейтӧ. — Бӧр веськӧдчис, шпыньмуніс: — Гашкӧ, шома на вотысыд да, скӧрмис... Скӧрысла туплясис да чапаліс гӧгӧр.

Райдалӧн ыркмунліс морӧсас, тӧдлытӧг чатрасыштӧс гӧгӧр, шуис пӧсялыштӧм гӧлӧсӧн:

— Локтас кӧ бара и... Буретш ӧні кутас сюмавны кынӧмыс да... — Нывлы окота лои сибӧдчыны матӧджык Питирим дорӧ.

— Да, вермас дōзмыны, мый сылысь сѣянсō вōрō-
дам, — нарошнō лōдсальштис мōдыс.

— Мунам либō ойдōджык татысь... Ружийō ни немтор
абу миян...

— Да оз лок, эн пов, — эскōдис Питирим. — Тані сы-
лōн татшōм столōвойид мыйта колō эм, йōзыдкōд оз кут
мырддысьны сэтōр вōснайд.

Сэссия на весьтō воис варыш, тыдалō, бара на татчōс
Кōзьяинид. Первойсō сийō шывъялис зэв вылітi, но воча-
сōн кытшовъяссō босъталіс пыр увланьджык и увлань-
джык да козьяс вылнаōдз лэччис.

— Оз-ō сийō кōсийы уськōдчыны миян вылō! — повзис
Райда.

А повзянтор и вōлі — эстшōм гундыр шывъялō юр
весьтаныс! Вына бордъяссō, гашкō, сыв пасьта шевкнитō-
ма да быттō оз и вōрзвōдыштлы наōн. Нырыс мути-
лōн! — паськыд косалōн быттō, кōнкō, сэтшōм жō лэчыд
и чорыд... Вижев синъясылōң югнитлōмыс весиг тōдчō...
Морōсыс да кынōм улыс пемыдрудōсь, а бōжыс дзик
еджыд... Татшōм гундырыд кō вылісянь став о́д вывсьыс
швачкас морōснас — любōй мортōс чергōдас кок вывсьыс,
непōштō уткаōс либō кōчōс...

— Нинōмысь сылы миян вылō уськōдчынысō, — Рай-
далы вочавидзис Питирим, но век жō босьтис қиас зумыд-
джык бадь вож.

— А мый, век жō уськōдчывлō йōз вылō?

— Тундраад тай татшōмъясыс, позсō кō вōрзвōдан,
пырысь-пыр и вувзъыясны-а. Кōть сэссия код вылō.

— Мун татысь, мун! — беддъōн жō вывлань шенасис
Райда. — Ми ог тәнсьыд сѣянтō вотйō...

— Бать висътавліс: татшōм варышъясыс пō кызь во-
ясōдз век о́ти местаың поздысьōны, тыяс да юяс дорын.
Мед чери и пōтка вōлі. Та дыранад, дерт, быд пельōс на-
йō тōдмалōны... Быд уткаōс и...

— Но дивō! Но Кōзьяин! — шензис Райда. — А қы-
мын пиōс нō найō быдтōны?

— Кыкӧс пӧ... Асьныс, гӧзья, кыкӧн, и кыкӧнӧс быд-
тӧны.

— А утка-сьӧлаыд, буракӧ, дасӧдз?

— Енмыс тай ставсӧ зэв бура артыштӧмӧн лӧсьӧдлӧ-
ма... Варышыд кӧ ӧд унджык рӧдмис, сӧки эськӧ налы
уна сӧян ковмис, ловья сӧян... А ӧнӧ налы слабджык да
урӧсджык пӧткаыс тырмӧ, йӧйджык чериыс да...

— Сӧмын мортлы некор немтор оз тырмы... — ышлов-
зис Райда.

Паськыд бордья Кӧзьяинлы, тыдалӧ, кажитчис тадзсӧ
шуӧмыс. Сийӧ бур ногӧн курксыштіс, а сӧсся и, шы-тӧв-
тӧм планер моз, тӧв нылыд исковтіс аслас мукӧд угод-
дьясӧ.

Чомлань бӧрсӧ лӧччигӧн вотчысыс кызкӧ-мыйкӧ
посйысисны да вуджисны вис вомӧн, сы вӧсна мый сӧтӧ,
лӧкиник козья йӧнӧдӧд, зумыдджык вӧлі муннысӧ. Во-
дзын восьлалыс Питирим друг тан сувтіс, шензьямӧн
ружӧктыштіс.

Водзаныс пласьтвидзис жервидзись ордлыяса лы чу-
кӧр!

— Ой-ой-ой, кутшӧм коньярӧс нӧ танӧ смертыс суӧ-
дӧма?! — весьӧпӧрис Райда.

— Йӧра тай пекляӧ шедлӧма...

Сӧки сӧмын Райда казьяліс вижӧдӧм, тыртӧм юр чаш-
ка весьтысь сӧмӧм цинка прать, кодӧс вӧлі домалӧма кыз-
кодь козийӧ...

— Ой, коньяр! — синва петмӧныс жалитис Райда. —
Абу кӧ энъ эщӧ, сюрьясыс тай оз тыдавын-а...

— Оз тай...

— Мыйта ковмис пессыны сылы танӧ... Кытчӧдз ло-
лыс эз пет...

— Да, пессыштіс, дерт, — дзӧрьялігтыр шуис Пити-
рим. — Видзӧд со, гӧгӧрыс став понӧльсӧ чегӧма да ня-
кырӧма... Коз гӧгӧрыс быттьӧ циркульӧн кытшсӧ чер-
титӧмаӧсь... А козийыс со, видзӧд, кӧрталӧмаинӧдыс бон-
зьяма быдсӧн, сирӧн ойдӧма... Видзӧд, видзӧд, цинкаыс

муртса абу орёма кыздисюрё пеласьёмсьыс! Куим-ё-нёлъ сї сөмын кольёма ортөмыс... Но и но...

Татшөмтортө аддзөмысь Райда торйөн нин ёна шемөсмис:

— Вот сәсся и эн шу, мый олөмыд мукөд дырйиыс куш сөмын өти сї йылын кутчысьө... Нөшта өтчыдысь кө выныштчис и — мыніс... Бара вөля вылын вөлі... Гашкө и, коньөрлөн, пи тшөтш кынөмас вөлі... Кодөс чужтыны көсийс... Но кысь сәсся выныштчан... Кор петөма нин став выныд... Кысь на пө и орөдан голянад көрттө... Вай өдийөджык мунам татысь!

Недыр вөсьлалыштөм бөрын Райда бара на шыасис:

— Мыйла нө көть эз видзөдлыны петясө, пуктөны кө. Эз эськө сы дыра мучитчы пемөсыс...

— Тайө, буракө, Пурьсь Порөлөн, Керөсбөжысь, — шуис Питирим. — Сійө пө ёна кыйсьөма... Асьсө кольөм во тюрмаө пуксьөдөмаөсь косясьөмысь. Буракө, эз и удит пекляяссө кыйны.

— Велаліс вөр-ваын ставсө вины-джагөдны, а сәсся и йөз вылө пондіс усьласьны! — эскөдана шуис Райда.

— Ме эськө ог төд асьсө сійөс да... Кывсьө тай вөлі, лёка косясьысь пө... Гашкө, йөзыс та понда и Пурьсьнас нимтісны да?

— Аслыс эськө сылы тадзисө мучитчыны да сісьмыны! — ырыштчис ныв.

Но виспомса туруна кушин бөр нимкодьмөдіс найөс — сәні топыд чукөрөн дөлалісны уна рөма омраяс... Йөзысь ёна джуджыдджыкөсь, дінөдыс сой кызтаөсь, вочасөн йывмысь вижовгөрд идзьяс выланыс налөн сідзи и сярвидзөны пырыс тыдалана ыджыд шөвк тупыльяс кодь тугьяс. Дзоридз-тугьяс!.. Быд тугйөс нюдз емьяс отсөгөн зөвтөма, буракө, медся сяммысь да мелі киөн, и сійө лоөма гөгрөсысь-гөгрөсөн, и сералө-дзордзалө кольмытөдзыс...

Быттьө баситчөм-вөччөм шыльыд яя том ичмоньяс сулалөны, радлөны-нюмъялөны том верөсьясныслы...

Долыдмөм Райда, копрасиг да маласиг, шензбөмөн шуалө:

— Да мыйла нө туруныслы татшөм мичлуныс? Да коді нө тадзисө төждысьө сы вөсна?.. Со өд көні арся сьыланыс, Питирим дай Серафимович.

Нывлы весиг жаль лои, кор ёртыс лэчыд пуртнас чилснитіс чорыд дорьяса да тыртөм пытшкөса омраөс. Но мөдыс зэв збыльысь такөдіс сійөс:

— Часлы ми тайө мичсьыс, тыдалана мичсьыс, вөчам кылана-юргана мич... Пөлян вөчам да ворсам арся сьыланкывнымөс...

VIII

Пажнайтігөн, чом дорын, кытчө абу на волөма Степан Фёдорович, Райда висьталіс ёртыслы выль сьыланысь кывьяс:

Зарни давиё надзөн пыра,
Гөгөр югыд — пом ни дор...
Бара нин со гождөм бырө —
Усьө кыз да пипу кор.

Сьөлөм доймасьө и көсйө —
Талун сійө вывті нор —
Корьяс моз мед лөня вөзйис
Кодкө меным мусатор.

Олөм эз на бурмөд лолөс,
Көть и юрси лөө дзор.
Шудыс воліс и бөр косліс,
Кызди ытва бөрын шор.

Мыйкө виччыся на бурөс,
Көсья вөчны сэтшөмтор —
Медым сьөлөм вылын юргис
Кыпыд йөлөгалөн гор.

Зарни давиё надзөн пыра,
Гөгөр югыд — пом ни дор...
Бара нин со гождөм бырө —
Усьө кыз да пипу кор.

— Со тай мый артмис... — Райда яндысигтырйи видзөдліс Питирим вылө. — Бурджыкатө ме өдвакө сямма...

А мөдыс буретш вөлі лөсьөдчө вөлавны гөрд заа омраысь пөлянсө, и өні, Райдаөс кывзігөн, быттьө кынмыліс места вылас, видзөдө, видзөдө, но, буракө, немтор оз адзы, сы вөсна, мый синъясыс вазыштөмаөсь.

— Рада, тэ быттьө менсьым лолөс пыдзыртөмыд... — джөмдалана шуис Питирим. — И сэтысь сөдзтысьөма буретш сійө, мый ме көсийлі пычыктыны...

— Тэ збыльысь шуан? — долыдмис Райда. — Он мөнө бурөдөм могысь?

Та вылө вочавидзөм пыдди Питирим пөся шуис:

...Корьяс моз мед лөня вөзйис
Кодкө меным мусатор...

Кызди нө артмө татшөм лөсьыдаыс да стөчаыс?.. Ныв мортлөн?..

— Эндөм нывлөн, эн вунөд содтыны... — варовмис Райда.

— Унджыкөн эськө вөліны татшөм эндөмъясыс! — пөся шуис Питирим.

— Мый эськө сэки вөлі?

— Сэки?.. Сэки эськө нястиыс му вылас этшаджык вөлі...

— Кутшөм «нясти»...

— Но, тиян ногөн кө, няйтыс...

— Аттө бур кывсьыд... — Райдалөн гөлөсыс и синъясыс шоналісны.

— Ме эськө, тэ моз кө сямми, уна на бур кыв висьталі тэныд...

— Мыйыськө?..

— Көть нин сыысь, мый тэ дырйи лөсьыд шыяс садьмөны лов пытшкын... — лөня шуис Питирим. — Став кушөм шыясыс садьмөны... Эг нин чайтлы-а...

— Ме дырйи-ө? А гашкө, чужан вөр-ваыд садьмөдө найөс? Гортад воөмыд?

— Тэтөг ме неётчыдысь нин волі татчө, но некор на татшөмыс эз вөвлы...

— А кодкө кө мөд ныв вөлі ме местаын? Любөй кодкө...

— Всө равно эськө эз вөв татшөмыс...

Райда шөйөвошөма, оз төд, мый вөчны. Сэссия сійө вольсаліс ыджыд целлофан мешөк, шаргис-кисьтіс сы вылө вайөм сэтөрсө, мед весавны, да вөлись меліа шуис:

— Оз ков личодны көртвомтө, Питько... — Райда медводдзаысь на нимтіс тадзисө Питиримөс, и мөдыслы вемөдзыс йиджис. — Тэа-меа абу дас көкъямыс арөсаяс...

— Ме төда... Ме эг на и личөдчыв... Но ме нин со кути вөтасыны тэ йылысь.

— Сідзкө, төрытнад тэ менө и вөталін?

— Да...

— Висьтав, кызиджык?

Налөн синъясыс вочаасисны лөня ломтысьысь би вомөн. Райдалөн лөзов аканьясыс, кодьясөс дорөсалөмаөсь пемыдджык кольчаясөн, быттө ньөжйөникөн, вый тупыляс моз, гөгыльтчисны Питиримлөн банйив вөсьөм лов кузяла, и сәті вөвлытөм меліа пондіс ёнты, и сәтшөм лөсьыд лои, сәтшөм лөсьыд!..

— Быттө ми тәкөд купайтчөм бөрын куйлам Эжва шөрса ді вылын, — синьяссө куньөмөн, зэв шоныда, шуис Питирим. — Луныс шондіа... Лыаыс сөстөм, вижов, зарни пызь кодь... Жарыс лювкъялө-вералө сы весьтын... Шондіыс лышкыда пөжө миянөс... Сэссия мыйлакө тай ковмис вуджны берегө, и ме босьті тәнө мөздөрө.

— Ме ачым кужа варччынысө... — шуис Райда.

— Ог төд, босьті тай-а... Медся донаторсө моз... А тэ сывйыштін менө голяөд... Топөдчин шонді водзын пөсялөм вир-яинад... И быттө ми дзикөдз вылө өтлаасим тәкөд... Быттө өти мөртөн лоим...

— Гашкө ме топөдчи сы вөсна, мый повзи вөйөмысь? — торксьөм лов шы сорыс шуис Райда.

— Не сөмын та вөсна... Мөдтор вөсна тшөтш... Ок,

кутшом ме шуда вөлі!.. Тэ быттьо тшөтш и... Збыль... Сомын тай, ййылдөн, водз садьмысис менам... Садьми да — сьолөмөй нимкодыпырысь швачөдчө морөсын, вирөй ыпьялө... И сәки ме гөгөрвои, мый таысь бурджыкыс, таысь ыджыдджыкыс олөмас немтор абу...

— Мыйысь бурджыкыс?..

— Радейтчөмысь...

Райда шөйөвошөмөн кызөктыштис, сәсся юалис:

— Весиг лөвтө бурмөдысь вөр-ва?

— Сийө вөчө радейтчөмсө югыдджыкөн...

— Весиг музыка?

— Сийө ачыс — радейтчөмысь артмөм лад да шы...

Некоднанныс оз видзөдны өта-мөдныс вылө. Райда копыртчөма да весалө сэтөр. Мөдыс малалө-бергөдлө омра, быттьо куш сы йылысь и мөвпалө, кызди эськө бурджыка вөлавы... Сәсся Райда шуис:

— А ме чайтлі, буретш тайөторйыс өна чишкалөма тәнө... Быттьо тай со, видзөднысө, абу шыблас кодь, а өткөн олан... Абу том нин и... Мися, тайөс кодкө, ми-чөйысь буракө, нәм кежлас чишкалөма...

— Сидзи и вөлі!.. — пөсьджыка артмис Питиримлөн. — Онөдз ме ачым сидзи жө чайтлі... Нәм кежлө чайти.

— Абу кө окота тәныд та йылысь казътывны, ме өд ог и юась, — водзвыв өлөдис Райда, көть эськө аслыс и телепит окота вөлі төдны татшөмтортө.

— А ме көсья висътавыны тәныд, — шуис Питирим. — Эг кө эськө көсйы висътавынсө, ме эськө вөт йывсьыс нинөм эг и казътышт. Сэтшөм вөт йывсьыс... И мед тэ ставсө төдин ме йылысь...

— Но инө...

— Ми өтлаасим сыкөд музыкальнөй училищын, — заводитис Питирим, пельк чуңьясыс аслас век на малалөны-видлалөны омраөс.

— Да? — чуймыштис Райда. — Тэ велөдчин училищеас?

— Велөдчи, кык во... Армия бөрүн нин пыравлі... А таөдз мыйсө сөмын эг карлы, век сьөлөм сертиджык удж корси... Интернатын велөдчигөн на ылалі тундраысь, око-та лои и мөд сикас мир вылас бурджыка видзөдлыны... Семилетка помалөм бөрүн медаси пароход вылө матрос-өн, Печорасө гожөмбыд гежмалім өтарө-мөдарө... Но арь-явылыс сэсся дышөдіс, зэв нин ньөжйө шлопкан-мунап баржанад да пурнад. Он өткодяв көр даддыкөд... Сэс-ся матросыдлөн уджыс лөка гажтөм — то пес жаявтөдзыд пыртлан, то палуба нярскан-мыськан... Мися, гашкө, за-водын менам шудөй? Велөдчи токарө, детальяс төчиті во-мөд-көймөд, сысянь и армияө ветлі... Но станокъяслөн сьылөмыс кызкө быттө эз жө дзикөдзсө бурмөд сьө-лөмөс. Тундраса мортыдлы дзескыд быттө тшынось цехьясад. Сынөдыс быттө оз тырмы ни... Сэсся и музы-ка век менө чуксалис кытчөкө аслас мыла шыяснас... Кор-кө зэв нин важөн мамө карліс меным бадь вожысь чип-сан. — Питирим пөлөс ногөн вөлыштис омрасө лэчыд пуртнас. — Часлы, өні ми карам жө сэтшөм сямасө... Но вот, карис меным мамөыд чипсантө... Пөлышти ме и — дивө! — пу торсьыс петис сэтшөм лөсьыд шы... И тайө шыыс, буракө, нэм чөж кежлө мыйкө вөрзвөдіс сьөлөм-ысь... Сійө жө вайөдіс менө музыкальнөй училищеөдзыс... Сэні ми и төдмасим Валяыскөд... Ме баян кузя велөдчи, а сійө сьыліс... Сэсся тай и сьывсим... Сійө мыйлакө чай-тис, мый ме — «великөй музыкант»... Мый талун-аски ме-ным сетасны Государственнөй премия, миян быдторыс лөб, и ми сьылігтырйи овмөдчам пан-бароньяс моз. А главнөйыс — миянөс кутасны өна славитны, быдөн пон-дас төдны миян йылысь... Но пөляннад чипсөмсянь опера гижтөдзыд костыс зэв кузь вөлөма!.. Да кор нөшта куль-тураыд көрьяс да кыньяс, да нөшта черияс төдөмөн и помасьө... А сэк кежлө миян чужис нин кага. Видзнысө сійөс некодлы, яслиын места абу... Олам частнөй керкаса гөбөч кодь жырйын... Валюкөй менам вочасөн дөзмыны пондіс, и ме регыдөн «талантсянь» пөри «бездарьө». Тор-

йөн нин сэк, кор сийо ачыс пондiс сьылыштавны йоз во-
дзын, кинотеатрьясын да кон да...

Отлаын олөмысь радлуныс да шудыс пыр куcиc и ку-
cиc. И ми торийодчим. Ме вöли сэки том на и ёнасö эг
майшась. Петi училищесь, а сэссия и карысь мунi... Но
регыдөн ме казяли, мый томдырся кыпид-гажа олөмöй,
шог тодтөм олөмöй помасьома нин. Вөлөмкө, тайо мирас
ни öти вöчөмтор дзикөдз вылө оз вош, а кызкө да мый-
кө аслыд жö и бөр вочкө сёрнджык, бурөн ли лөкөн воч-
кө. Меным кутiс лоны зэв гажтөм пыись... Сэтшөм гаж-
төм! Но Валя эз и кöсйы сёрнитны, мед сетны меным
зонкасö... Көть эськө и регыд мысти нуöма сийöс бать-
мамыс дiнö, Воркутаö...

Ме кутi кывны, мый олөмыс меным вочасөн дубалö.
Ме ачым аслым эг кут эскыны... Нинөм вылө туйтөм лөк
гаг кодьөн пондi ачым аслым кажитчыны... Сэссия заво-
дитi вина юны... Но винаыд, вөлөмкө, шогьяссьыд оз жö
мезды... Он кö палявлытөг ю... Регыдөн ме казяли, мый
тадзинад мортвыйсьыс дзикөдз пондi вошны... Веськодь-
өн ставыс пондiс лоны... Нинөм дорö оз кыскы ни. Лунь-
яссö мурталан он мыйкө буртор карөмөн, а öти сулеясян
мөд сулеяөдз... А думьясыд куш сөмын вина доз гөгөр
и бергалöны...

Но кызкө-мыйкө тай сувтi жö сэссия... Велөдчи элек-
тросварщикö. И вочасөн пондi уджавны медся джуджыд
стройкаяс вылын... Менö төдöны нин карын и сэтшөмьяс
вылас и мөдөдöны. Мукөдыслөн юрныс дурмө вылас, а
меным, мөдарö, кымын вылынджык, сымын любөджык.
Став карыс сярвидзö улад, йоз жуöны... Төв шутьялө-
сьылö, и ачыд тшөтш мыйкө сьылан... Отчыд телевышка
вылын сваритчи, и ми сэнi техникыскөд, помалөм бöрас,
гөрд вина доз юим, сё ветымын метр вылнаын...

— Ок, йöйясыд! — Райдалөн кодзыд йирмөгөн ырк-
мунлис мышкыс. Сылөн важөн нин вунöма сэтөр весалөм
ййвсьыд. Юалис: — А Валяыс нö?..

— Сийö?.. Помалөма училище... Выльысь на öтлаась-

лёма кутшөмкө сьылыськөд... Но абу тай артмөмаось... Сэссия петёма олёма геолог сайё... Шань морт пö веська-лёма, бур сьёлёма, көть эськө и водзті нинөм абусьыс мыждылёмаось... Кагасё мянлысь аслас ним вылө гижө-ма и...

Водзё Питиримлы сьөкыд лои сёрнитны да ланьтіс, пондіс зэв збыльысь вöлавны овра. Райда кутіс жö весавны сэтөр. Но сёрниыс помавтөм на вөлі, и Райда лөня юаліс:

— Сэссия нө сы бөрүн эн на и аддзыв зонкасө?..

— Кык во сайын ветлі, гажтөмыс джаг гөрөдөн шыртыштіс голяёс да, — сьөкыдпырысь шуис Питирим. — Гортас эг пыр, ывла вылын, лөсьөдчи да, паныдалі детинкасө. Сёрнитөді... Сулалө меным паныд югьялысь лэбула школьнөй картуза зонка... Быттё и мыйөнкө муныштө мелань, но быттё и абу ме кодь, мамыс моз жö сьөдов, и тшөтш быттё мамыслөн ыкшалунөн өвтыштө чужөмсянныс... Сулала ме, ки и кок дзикөдз лигышмунөмаось аслам, и ог төд, мый шуны... Шуны ачымөс батьөн?.. Но кутшөм нө ме бать?.. Кыдзи нө вермас тайө зонкаыс нимтыны менө батьнас?.. Кор сійө эз на аддзыв менө вежөра синмөн? Кор мөд морт вердіс-юкталіс сійөс? Көтасьөм гачьяссө вежлаліс...

А мый, мися, веськыда шуны, гашкө? Сэссия босьтны киөдыс да нуөдны татысь? Мунны кытчөкө чөрту потшөс сайөдзыс, мед некод мянөс эз аддзы... Ставсө висьтавны сэссия зонкаыслы...

Но гөгөрвоас-ө сійө?

И мый на сәки карас лёк бабаыс, зонкаыслөн мамыс... Код вөсна тадзи пазаліс мян олёмным?

— Таысь сьөкыдджыкыс меным сэссия некор на эз вөвлы... — сьёлөм доймана төдчөдіс Питирим.

— Ой, ёна жö дзугсьөма ставыс слөмас! — шуис Райда лөвтыштөм моз. — И өд быдөнлөн аслас шог да дой... Аслас! Абу мукөдлөн кодь... Мый нө колө вөчны, кыдзи нө колө овны, мед эськө дзикөдз бырөдны найөс?!

— Вай тэа-меа лөсьодам сэтшөм сылан... Но сэтшө мөс!.. Мед сійо медся бур лекарство моз лөньодас да нимкодъмодас йозлысь ловьяссө... Быдөнлысь... — нюмъялігмоз шуис Питирим, сылы окота вөлі нин кежны ас йывсьыс сёрниысь.

— Да эськө да!.. — пөся шуис Райда. — Но водзвыв вай стөчмөдам на со кутшөмтор: кызди позьö сідзи думайтны.. сідзи вөтасьны нывбабаяс йылысь, кор новлөдлан сьөлөмад гатшөм дой да шөг?..

— Ме нө мыйөн төда... — падмис Питирим. — Гашкө, сы вөсна, мый ловья на ме... Сьөлөмөй на со типиктө морөсын..

— А он-ө тэ ставсө тайөс лөсьөдлы? Нинөм вөчөм дорысь?

— Мый тэ, Рада! — садьтөгыс повзис Питирим. — Ме тэд ставсө веськыда висьталі.. Кызди кыла сьөлө мөн... Ме тэныд дзоньнас гугөді сьөлөмөс... И гугөді ме сійөс эг пырысь-пыр, а ёна думайтөм да мучитчөм бөрын.. Кор нин гөгөрвои зэв ыджыдтор..

— Ыджыдөс?..

— Да... Мися, нывбаба пазөдіс менсьым олөм-шудөс, но сөмын нывбаба жө и бөр вермас выль ногөн өзтыныломзьөдны сійөс..

— Сөмын? — Райда чуймыштөма, тыр синмөн видзөдө ыззьөмысла гөрдөдыштөм чужөма Питирим вылө..

— Сөмын... Гөгөрвоны кө быттьө шудсө пидісяньджык..

— Нывбабаяс нимсянь аттьө бур кывсьыд... Ыджыда и эм шуөма... Ёна доймастьтөгид, буракө, тадзтө он и эм вермы вежөртнытө..

— Рада, өні ме виччыся, мый тэ меным вочавидзан? — Питирим быттьө и шмонитіскодь, но пөся тіралысь гөлөс сертиыс позис гөгөрвоны, мый таысь збыльджыкыс да сылы коланаджыкыс оз овлы. — Кызди тэ ме вылө видзөдан?

— Ме?.. — джөмдыштис Райда. — Пельюд тай, наперво, зэв ёна кажитчө-а...

— Пель? — бөбмис Питирим.

— Да... Яг рыжик кодь мичаник да зумыд сийö... Кор тай рыжиккыс чургөдчө важ лысьяс да коръяс пөвстысь... Гөгöрыс лөсьыдика дорөсалөма... Али томиниқ ельдөг кодь?..

— Ме сьөлөмөс шөри вунда... вирөй пуө ранаас, а тэ сералан, — дзугыльмис Питирим.

— Мыйла нө серала... — Не то збыльысь, не то вильыша сёрнитис Райда. — Кольөм войнад ме садьми... Отнам... Сэтшөм пемыд... Сэки и казялі тәнсьюд пельтө... И быттө гажаджык лои, шоныдджык... И зэв жө гырысь думъяс пондिसны чужны... Шуам со тайö: мися, мортыдлөн лолыс пөртмасьысь кодзувьяся пыдөстөм енеж кодыс жө гөгөрвотөм да шемөсмөдана. Мися, мыйта сюрс во нин зильоны төдмавны сийөс, ловсө, но помөдзсө некыдз оз вермыны төдмавны... А тэ шуан — серала...

Питиримлөн личмунис чужөмыс, ки пыдөснас ниртыштис Райдаладорса шуйга пельсө.

— А нөшта меным ёна мусмис тэнад мамыд, Палаш шөч... — синъяссө читкыралігтыр виччысьтөг шуис Райда. — Мыйлакө меным сийө кажитчө пөрысь юсь кодьөн, кодлөн, дыр да ыліті лэбалөмысла, бырөма-вошөма борд выныс...

— Сьөкыд и эм гөгөрвоны мортыдлысь ловтө... — ышловзис Питирим.

— А тэнад, буракө, эм жө мыйкө мамыдлөнкодъыс... — стөчмөдіс ассьыс мөвпсө Райда.

Шуис тадзи и гатшөн шыбитчис-водіс көр воль вылө, кыкнан кинас нимкодъпырысь лебезитө сук да топыд гөнсө. Сэсся сийө, дзик нин виччысьтөг, юалис:

— Кывзы, Питько, а тэныд эськө окота абу лэбзыны тундраö? Ачыд тай шуан, матын нин пө сэтчөдз тасянь...

Питирим, дерт, некутшөм ногөн эз виччысь татшөм юалөмтө, но дыр падъявтөг вочавидзис:

— Меным век окота лэбзыны сэтчө... Аслам чужа-
нинö...

— Юсь-дзодзöглы моз? Да?.. Найö тай со мый ылна-
сянь бөр волöны... Дженьыдик гожом кежлö... Бытбöкö
сэни, Африкаясас, оз вермыны пöжсьынысö. Дивöнад он
тырмы...

— Эськö не сöмын гöсти воыны Войвылас! — Пители-
римлы рана вылö сов моз инмис тайö сёрниис. — Эськö
мыйöнкö ыджыда отсавны сылы... Ок эськö, верми кö!..

— Колö отсöгыс?

— Кыдз оз ков, Рада! — Пителирим вөркань моз чеч-
чыштис пукаланінсьыс, öти киас джынвийö кером пöлян,
модас — пуртыс. — Тшöтш öд пазавны пондис Войвылыс...
Енмөн сетом озырлуныс бырны пондис... А кызкö кут-
ны колö сийös! Не бырöдны, а содтыны... Öд мыйыс сө-
мын тани абу! Черныд! — вомад сылö чöскыдысла, ачыл
тай видлин... Зарни дон сулалысь шоныд гона кыньясыд...
Поткайс!.. А куш öти кöрыс мый дон сулалö! Көр кы-
сысь вуром пимиястö Москваын медколанаторсö моз кват-
лалöны! А кодi эськö эз уськöдчы шöвк тупыль кодь не-
быд да шыльыд пезгу шапка вылö? Либö көр куысь жö
песом-вöчөм няр кепысь вылö? Гöч кодь небыдик том
сюръясыс — ловтö öддзöдысь лекарство... А видлин-ö тэ
неуна кынтыштөм, шондi чөлос кодь гөрд яйсö кöрыс-
лысь?.. Айбарчсö?

— Тадзитö ошкөм бöрын быть ковмас видлыны, —
шуис ёртыс вылö тыр синмөн видзöдысь Райда.

— Он вермы лыддьöдлыны, мыйта бурсö сетö кöрыд!
И öд вердны сийös оз ков... Турун пуктыны ни картаяс
вöчавны сылы оз ков... Ачыс йирсьö, нуод сöмын йир-
сянинас... Да öд тайö, буракö, енмыслөн медся бур кози-
ныс и выим!.. Кодös сийö сетис йöзлы... А көр лыдыс со
чинö... Йирсяниньяс оз тырмыны... Тундрасыс яласö
ставсö нин вольöмаось... А сийö абу туруныд, быд во
выльысь оз быдмы... А мыйта ялаыс парма ягьясын!
Вольсалöма! И сэтшөм кыза да тшöга пуритö... Ачыл

коть нятшкы-сэй... Сәні эськө төвъясын видзны көрсө, көр овадыс абу... Кыдзкө пыртлыны... Оні жө сымда нин туйяс эмось быдлаын, мыйся техникаыс сөмын абу...

А кутшөма колө отсавны аслыс көр видзысыслы! Тырмас нин сылы кынмавын нәмөвөйся чумйын. Да синсө ордны лувъялысь тшын пын... Мед өнія кадся морт моз нин шоныда да гажаа сійө оліс... Мед челядыс сылөн эз нин чужны лым вылын, көрпиян моз. Мед том мортыс көр дінас уджалігөн эз ныжмы вежорнас, а сиктса да карса моз жө сөвмис... Позьө өд ставсө тайөс карны, позьө!.. Сөмын паськыджыка колө, государственнөя...

Ме быдсяма ногыс думайта... Сійө жө чери йывсыд и... Мися, гашкө, бур черинас озыр тыяссө кызкө колө шонтыштавын... Шуам, электростанцияса шонид сөдз ваөн... Партия съездыд тай шуис карны Печора вылын ыджыд ГРЭС... Сәки эськө налы гождөмсө позис нюждөдыштны... Шонид ваад пө тай чериыд кык пөв өдийө сөвмө-быдмө... Да бур ногөнджык жө лөсьөдны чери видзөм-кыйөмсө... Мед эськө быд мортлы чөскыд чериыс воис пызан вылас, а не сөмын бөрийөм йөзлы... Заграницаса буржуйяслы да... Пөтка кузяыд тадзи жө позьө и. Гөгөрвоысь йөзлы тайө делөсө сетны. Кодъяс эськө кыйганыс думайтисны пөткаыслысь лыдсө содтөм йылысь... Бур ногөн кө, ставсө позьө карны... Ставсө! Эта пасьтаинас! Да өнія вынъясөн... Сөмын колө бурджыка гөгөрвоны Войвывсө! Му шарыслысь тайө шемөсмөдана юкөнсө...

— Ме, ас пайысь, өнісянь мөд синмөн нин кута видзөдны тэнад Войвыв вылө, — сьөлөмсянныс шуис Райда. — Торйөн нин татшөм монологъяс бөрад...

— Сидзкө, миян вынъяс содөны... — гажмис Питирим.

Налөн видзөдласъясыс бара вочаасисны.

— Но жө тэ, Питько!.. — шуис Райда. — Кывзы, а мыйла Питько? Мыйла сэтшөм сьөкыдасө нимтөмаось? Питирим дай Серафимович?..

— Мед нин зумыджыка вөлі... Изъватасыд водзті

ёна дурлёмаось нимъяснад. Миян сиктын өти дядьолөн нимыс — Леопольд, а гётырыслөн — Конкордия...

— Гашкё, ним вёснаыс и гётрасис дядьоыс? — гажаа сералис Райда. — Но жё и изьватаcl..

— Тэнад тай со шоча паныдасьлысь ним жё — Райда — Рада...

— Мыйла нё? — важ коми ним тайё, папа пуктылёма. Сійё миян важ коми олөмтё да мойдьястё бура тёдё.

IX

Пöлянсö Питирим вöчис куим розяос. Сэссия и пондiс чипсыны-ворсны, кужысь чуныяснас то öти, то мөд розь тупйивлөмөн. И гөрдов заа омраыс, кодi неважөн на ворсöдчис шөвк тугьяснас, радпырысь ыльöбтiс-лэдзис ас пытшсьыс негора сөдз шыяс; первойсö найö кыздисюрö сярöбтiсны, сэссия вочасөн быттё стройё сувталiсны, салдатьяс моз, кутшөмкө лад пондiс кывны-төдчыны, и чуймөм Райда гөгөрвоис, мый, буракө, тайё выль сыланыслөн ладыс, да кортөг-тшөктытөг пондiс сывны негораа...

...Сьөлөм доймасьö и кöсйö —
Талун сйö вывтi нор —
Корьяс моз мед лөня вöзйис
Кодкө меным мусатор...

Питирим нимкодпырысь довкнитiс юрнас. Ворсö и ворсö ачыс... Райдалөн со помасисны нин кывьясыс... А пöлян век ливкйөдлө-чипсö, и мыйкө нориник да сөстөм кылö сылөн шыясысь...

А, гашкө, тайё оз пöлян ворс? А гажа вөр-ваыслөн кутшөмкө выль, төдтөм на ловья лов сьылö? Кызди коз пытшкө дзебсьөм сьылысь кайыс? Кызди лэчыд гөлөса турияс кривзöны матысса нюрын? Кызди сизь торөдчö кос конда йылын?..

Сöмын тай сылөн, пöляныслөн, сьылөмыс мукөдыс

серти быттё ёнджыка вөрзёдө сёлөмтө. Мукёдыс сер-
ти унджык сәні мортсямаыс...

А, гашкө, тайё абу арся, а тувсов сьыланкыв? Тув-
совъя моз вугырасьё лов дїнад да...

— Питько, тә он төд, мыйла сьылөмыс сәтшөма шы-
збөдө мортөс? Сьыланкывйыс? — юасьё ворсысьлыс
Райда.

— Төда...

— Мыйла нө эськө?

— Шуам, тәа-меалөн сьыланкывным лои быттё...
окыштчөм кодбөн...

— Лөсьөдлы вай!..

— Тә мөвпыштін кывъяс, ме — ладсө... Найё өтла-
асисны... Радейтчысьяслөн вом доръяс моз... Со и шы-
збөдө...

— Сідзкө инө тәа-меа окыштчим нин?

— Да...

— Эг со и төдлөй...

— Позьё на и төдлыны. Та бөрын и мөд ногөн позьё...

— Кутшөм өд сюсь кывсьө! — серөктис Райда. — Тыр-
мылас на и тадзисө... Сәсся өд мөд ногыс, збыль вылас-
сө, мужичөйясыд оз и кужны лючки радейтнысө...

— Оз кужны? — чуймис Питирим.

— А мый, кужоны али мый? Кор радейтчөмнысө ве-
жөны вина вылө?.. Удж да вина... Кыдзисюрас олөм...
Ковтөг жугөдөны асьнысө, водзсыс-водз бонзбөдөны...
Радейтчөм вылө немтор нин оз коль... Та вөсна найё лё-
кось, кодзидось... Ни меліун, ни пөсьлун...

— Кысь тә тайөс төдан?!

— Ме? — серөктис Райда: — Оти гожся рытө Эжва
дорын көк көкис.

— Хы, — нюмъяліс Питирим, — а кызди нө либө че-
лядыс чужөны, огө кө кужөй ми вокыс радейтнысө?

— Та вылө тай ыджыд кужөмъяс оз на и ковны...
Сәсся тай и не тыр сюсь челядыс уна жө чужө, кода-
лысьясыдлөн... Бур көть, мый нывбабаясыс оз на дзи-

көдз лэдзчысьны — асланыс тшыкөдтөм вирөн оз на лэдзны дзикөдз вылө коньөрмыны морт рөдыслы.

— Хы!.. Некор эз волы юрө татшөмторыс...

— Эз кө волы, сы пыдди өні гырысьджыка мөвпышт! — Райдалөн синъясыс наяна югнитисны.

Питирим көсийс на мыйкө вочавидзны, но сәки ты весьтын шыасис юсь:

— Курлы-курлы-тив...

Кыкнанныс ырсмунисны, чепөсийсны берег дорө. Да, юсь и эм, өтнас... Выліті лэбө, тәрмасьтөг. Голясө кызкө быттө ээв нин кузя нюжөдөма, вывтиджык кузя, некутшөм лэбачлысь Райда эз на адззыв татшөмсө.

— Буракө, войсяйд тайө!.. — шуис чатөрөн видзөдысь ныв. — Бара нин со лэбалө горзө...

— Рада, оз ков сідзисө... Быд лэбач вөсна кө тадзи вийсьыны, уна ковмас...

— Быттө мортлөн бөрдөм кылыштө горзөмас, — өртсө кывзытөг ышловзис Райда. — Тадзи кө кутас вой и лун бөрдны, бөр ковмас мунны татысь... Ме ог вермы татшөмтортө кывзыны.

Регыд пондіс кывны Степан Фёдоровичлөн кашкөмыс, сәсся и ачыс тыдовтчис — дзескыда төбөм нопсө гөрбыльтчөмөн тішкө-нөбалө.

— Отсав шыбитнысө, — мудз гөлөсөн шуис сійө Питиримлы.

Мөдыс отсаліс мездыны зэлыда личкысь волысьяссө, сьөкыдпырысь лэдзис нопсө муө, юаліс:

— Из али мый сөвтін, сәтшөм сьөкыд тай?

Степан Фёдорович чөла разис ноп көртөдсө, паськөдіс, сәсся и пыркнитіс-лэдзис кыйдөссө. Би дорө гузыгысис утка чукөр, сы мында утка!.. Гырысь и посни. И став рөмъясыс ыджыд чукөрас өтгудыртчөмаөсь: чим сьөдыс и лым еджыдыс, турунвижыс и лөзоватыс. Но медся ёна Райдалысь синсө дойдіс еджыд вылын мырда гөрдөдысь вир...

— Ме талун бура жö уджалі... А то, морö, весиг абу и лöсьыд тiянысь... Тi чери кыянныд, а ме весь котрала. — Степан Фёдорович кисьтiс чайникысь кружка тыр кöдзыд чай да горша юис: — Весиг некор на вöлі нянь шöрöм курчыштны...

— Мыйла нö колö татшöм начкысьöмыс? — Райда шемöса видзöдiс турдöм голяяса да сук вирöн йиджтысьöм гöна утка чукöр вылö, и сийöс друг лов тырнас пондiс кезийöдлыны, весиг син водзыс пемдылiс, юрыс кутiс дурмыны, муртса эз усь.

— Пöсь ваöн заваритан — гöныс нельснитас, куштыны оз ков. А сэсса и солалам, мирövöй закуска лö! — долыдасис Степан Фёдорович.

— Та мындасö эз жö кö ков начкыны-а... — Питиримöс тшöтш чукрöдлiс: — Тани, гашкö, кызь душ?

— Кызь кык, — стöчмöдiс Степан Фёдорович. — Ме талун тöлкöнджыка нин кыйси, выль тактика думышти... Кос керьясысь пуртор кöрталi, понöльяс сэтчö сатшйöдлi — маскировка. И дзик утка чукöр дiнöдзыс вöлі сибöдча... Сьöлöм бурмытöдз лыйси... Да и уткаыс катша-рака мында, быд лун позяс та мындатö пезьдавны...

Райдалы окота вöлі горöдны, мед кежöдасны син водзсыс гырдөсьöм утка чукöрсö, но кызкö-мыйкö кутчысис на, сöмын зывöка юалiс:

— Патроныд нö эз на али мый быр?

— Куимсёсьыс? — серöктiс кыйсьысь. — Эз дерт... Вежон чöжыд кö тырмас-а...

— А кызди нö тэ кöсьян петкöдны сымда кыйдöс-сö? — юалiс Питирим. — Сы ылнасö... Да нöшта ыджыд нюр вомöныс?

— Кыйöматö, морö, петкöдам нин кызкö да мыйкö! — Степан Фёдорович та кузя ньöти эз падъяв. Сэсса сийö зэв тöдчанаа шуис: — Тöдан, Питя, мый на ме казялi? Сэни, ягкодьян, йöраяс олöны... Дзик на свежöй сiт аддзылi... Ме кöсья кыйöдчыштны сэни öти асылö. Быть чергöда йöратö.

— Но йорасо жо оз позь лыйлыны! — горөдіс Райда.

— Мыйкө тай, оз позь... Лыям дай — поэяна лоас. Код морыс төдлас та ылнасыс... А ми ставон төвбыд кежлө яяось лоам.

— А меным оз ков татшөм яйыд! — дзикөдз пузис Райда. — Солалөм уткаясид оз ковны ни!.. И мед эз вөв лыйома йорасө!.. Эн лысьт!.. Лыян кө, ме явита! Явита!.. — бөръя кывъяссө ныв горзис-шуалис бөрдөм сорөннин, сәсся и котөртис ты дорө.

— Мый сыхөд друг лои? Кутшөм мазі чушкис? — Степан Фёдорович гөгөрвотөма видзөдлывлө то Питирим вылө, то утка чукөрыс вылө. — Ме чайті, нимкодьмөда тиянөс... Лунтыр пон моз уялі-котрالی... А, гашкө, ті тані лөгасид өта-мөд вылад, а өні сәсся сійө ме вылын лөксө пөсө?..

— Ми зэв бура олім-сөрнитім, — шуис Питирим. — Сэтөр со вотыштім и...

— Сідзсө тай нө быттьөкө и шань нылыс, — водзө пудьясис Степан Фёдорович. — Батгыс шань и, важөн миянөн веськөдлө... Но, морө... Верөс сайө сылы колө петны, со мый. Сәки ставыс ладмас...

Рытыс колис дзуглясигтырйи, көть эськө и Степан Фёдорович быд ногыс заводитліс шмонитны. Быттьө төдтөм йөз пукалісны, кодъяс неважөн на аддзысьомаөсь тані да оз кужны, кызди да кодарсянь панны сөрнисө.

Питирим частөкодь видзөдлывліс коз увьяс костө суйыштөм поляныс вылө: окота вөлі босьтны сійөс да гораа ливкнитны вой кежлас лөньөм вөр-ва пасьталаыс. Но кымөра чужөма Райда вылө кыйкнитлөмъяс бөрын сійө эз жө лысьт ворснысө: өд өні ворсөмыс сылөн пөсь скөвөрөда вылө кисьтөм ва моз вермас дзажкнитны.

А регыд сәсся Райда пырис чомйө да юр вывсяньыс вевттыысис шебрасөн. И эз нин шөрас сійө вод, а дорланьыс...

Да-а, немтор шуны, гөгөрвотөм и эм вөлөма мортыдлөн лолыс...

Питиримлы Райдаысь не кокныдджык жö вöлі. Öд сійö бур выlö вайöдис найöс татчö, шойчыштны да вуграсыштны вайöдис, гажа вөр-ваас сöстöм сынöдөн лолаыштны... Онöдз сэтшöм лöсьыд вöлі гөгөрбок, а другыйкö быттö пазаліс... Зэв донатор быттö пазаліс...

Сöмын Степан Фёдорович некутшöм пазалöм эз кыв. Сійö рытивбыд долыдырысь нокис-идраліс кыйдöссö, пуан ваөн чишкаліс-куштіс да соласис. Мортыдлы нимкодь вöлі, мый сэтшöм бура талун вөраліс, мый озыр прöмысөн воас гортас, и рытыс со бара гажсяліс, и кынöмыс чöскыд юкваөн пöt... Райдалысь дöзмöмсö сійö эз зэв пыдди пукты: пöрысь нылыдлөн пö, буракö, арся лунлөн моз, öтырышья этшыс вежласьö — то шондіа, то зэрö... Степан Фёдорович чöскыдырысь куритчис да, аския кыйсьöм йылысь öнисянь нин мөвпаліг, ни пöся ни кöдзыда сёрнитіс:

— Эн жö öд лыйöм уткаяс пондаыс сідзи дзугыльмы, Радшуль? Сьöлышт... Найö сы выlö и эмöсь, мед лыйлыны... Ни тэ ни ме найöс эгö вердöй да быдтöй. Государство ни... Найö асьныс чужисны да быдмисны... Сідзкö, тайö добраыд абу кодлөнкö, а — быдөнлөн. И ме верма босьтны, мыйта колö, мыйта кужа да верма... Да нöшта кор менам вөралан билет эм: быд во взнос мынта квайт чөлкөвöй... Öг кö ме босьт — мукöдыс курыштансы... Тасянь со матын, Уса вылад, кар кыпöдсьö, быдсяма йöзыс сәні чукөрмө... Вертолётъясөн пондасны воыны татшöм тыяс дорад... Быдса десантьяс чеччöдавыны... Вужнас ставсö орöдасны... Печорасö дзоньнас нептьён пöдтасны... Ачыд тай аддзылін, кутшöм тасма кольöма бадь бурысь вылас тулыснас письтылöм нептьсьыс... А тэ дузьялан салдат-морт выlö, сьölöмсö бурмöдыштіс лыйсьöмөн да... Менам, гашкö, тайö бурыс сöмын нин и коліс олöмас да... Гашкö ещö вина да...

Райда немтор эз вочавидз.

Райда лёка узис войсё, унаысь садьмыліс быд пёлос вётъясысь. А асьядорыс сылы петкөдчис дзик нин шемсөмөданатор.

Быттьо сійо өтрасөн сулалө Печора кыр йылын, зэв джуджыд шелля вылын. Видзөдө — о енмөй! — Печораныс жар биён сотчө... Сәтi кывтысь нефтыс öзйөма... Дзоньна паскыд ваыс ыпъялө-сотчө!

И чери чеччалө ва пыдөссьыс... Сы ыджта сьөмгаяс, дельфинъяс моз, брынснитлөны... Сы вылнаөдз чеччышлөны... И горзöны сылы, Райдалы... Мый вынсбыныс горзöны-бөрдöны:

— Сударыня-государыня, мезды миянөс!.. Мезды-ы!..

Райда уськөдчө кыр йывсянь... Мыйкө көсийө вöчны... Но лэччаніныс некөн абу, сәтшөм крут шелляыс...

А кык пудъя сьөмгаяс сөмын и бузгысялөны биа ваө! Сөмын и шковгысялөны...

Ырсмуніс Райда, чепөсийс чомйысь, оз гөгөрво, көні мый сійо...

— Мый нө лоис, Рада? — шыасис ты дорсянь ва тыра чайникөн воысь Питирим. — Повзин тай мыйыськө?

— Эстшөм лёк вөт аддзылі... — вöлисти сайкалыштіс ныв.

Матын кыліс вевсьөн моз кыкысь лыйөм.

— Лыйсьөмсьыс, буракө, и садьми... — тылань кывзысигмоз шуис Райда. — Сөмын вөтнад мөд ногөн кылісны лыйсьөм шыясыс... Бара нин лыйсьө Степан Фёдоровичыд... Оз-ө нин сійо бордъясьтөм на уткаястө мияндысь котшкөд?

— Вермас лоны и найөс... — ышловзис Питирим.

Бара лыйисны... Сәсся нөшта кыкысь помся.

— Но, адгорш! — Райда котөртис ты дорө, пыж эз вөв сәні. Питирим тшөтш вөтчис ныв бөрся.

Ылыс яг весьтын сьаккис-кыпөдчис шонді, и ставыс гөгөр вөлі ойдөма сылөн ловзьөдана югыдөн.

— Вай ми сылысь коляс патронъяссö гусялам мешöк-
сьыс да вöйтам ваö, — скöрысь шуис Райда. — А то сийö,
бура лыйсьö да, став пöткасö и зверсö пыллас танi.

— Дöзмас öд... — падъялис Питирим. — Дöбелькиöдз
вермас лөгасьны... Вермас гортас мунны...

— Но и мед мунö!.. Бөр кöть лöньлас вөр-ваыс... Сы-
тöг олыштам...

— Абу лöсьыд... Асьным жö нуöдiм мортсö... Со мый
ылнаöдз вайöдiм...

— Сiдзкö, либö ме ачым муна! — керыштiс-шуис Рай-
да.

— А сэтшöм лöсьыд вöли миянлы, — дзугыльмис Пи-
тирим. — И талун со луныс бара зэв гажа пуксьö, вугра-
сим на эськö...

— Сiдз эськö да... Но ме сэсся ог вермы видзöдны
тайö начкысьöм вылас... Гөгөрво тэ менö — ог вермы...

— А ме кöсии на тэнö пöлянön ворсны велöдны...
Сбылыштны на миянлысь сьыланкывнымöс...

— Та мында виртö аддзигөн менам оз сьывсьы... Öнi
миян сьыланкывным меным быттö пондiс кажитчыны
вирөн суктöма кодьön... Збыльсь, вай мунам и эм бөр...
Ставыс нин торксис öнi... Ми тэкöд мöдысь на ветлам
кытчökö... Кыкөн... И пöлянтö сьöрысь босьтам... Но?..

На весьтöд, нораа герчкигтыр, лэбис öтка ыджыд ут-
ка, кытшовтiс ты йывсö да бөр сетчис мöдар помланьыс.

— Миян тöдсаным... — жалитыштiс* Райда. — Гашкö,
куш öтнасөн нин и колис... Эз и вермы помöдз быдтыны
пиянсö... Эз и аддзыв налысь лэбалöмсö...

— Рада, оз ков татшöма дойдавын асьтö... — сьölöм-
сö сетiс Питирим.

— Но мыйла нö мортлы этатшöма колö лёкавын вөр-
васа олысьяс вылас? — эз вермы лöньны Райда. — Öнi
öд абу нин тшыг сийö... Но, шуам, коркö и ковмылис ов-
ны сылы куш сöмын кыйöм-виöм помысь... Кор мортыс
эз на кужлы быдтыны нянь... Эз на велау видзны гортса
пемöсьясöс... А öнi жö ми быдторсö нин кужам! Колö

жō мōд ногōн нин видзōдны мянлы вōр-васа олысьяс
вылас! — Райда шог синъясōн колльōдiс на весьтōд выль
кытшолōн лэбысь уткаōс. — Отчид сиктын ме адзылі,
кызди код юра дядьō велōдiс писō лыйсьыны... Тулы-
сын... Тшōктō, вōлōм, лыйны сьōд бурься ябыръясōс...
Найō воōмаōсь пōжсьыны, гозъя, пиянōс быдтыны... До-
лыдпырысь кокасьōны сылысь лым вылын... Дас кык арō-
са зонкайд и лыяс... И рад лоō, мый уськōдас ōтисō...
Инмас... Та бōрын, мый нō лоō тайō зонкасьыс?..

Степан Фēдорович вайис сизим уткаōс.

Питирим пыр жō гōгōрвоис, кутшōм позтырысь на-
йō — сьōд уткаяслōн бордъясыс сōмын на джынвыйō вō-
ліны гōнсялōмаōсь.

А Райда синва сорōн моз юалис:

— Лэбавтōмъяссō тай лыйин?

— А морō, кад нин лэбавны налы, — дōвōля серōктiс

Степан Фēдорович. — Вōралан сезоньс заводитчис нин.
Газетын нин юōртiсны.

— Но сiдзкō и сувый ставсō! — помтōм лōглунон шу-
ис Райда. — А ме танi олысь ог сесся ло!

И сийō пондiс шуркйōдлыны-чукōртны асьыс кōлуй-
сō.

— Да чōвлы тэ, Рада... — вōлись шōйōвошис Степан
Фēдорович. — Мый йōйталан? Немторсьыс... Питя, тэ
ли мый ли тшōтш мыйкō шу сылы... Толькō на слōйыс
сюрис да, огō на жō бōр мунōй!.. Мый вылō нō либō лок-
тiм та ылнасō?.. Деньга видзим... Немтор на оз чин та-
тысь мян кыйсьōмысь...

— Вот-вот, быд адгорш сiдзи и думайтō! — ёкыштчис
Степан Фēдорович вылō Райда. — «Ме помьсь оз быр ни
оз чин... Меным колō пановтны мукōдсō да унджык тшап-
кыны...» Оз чин... А видзōдан да, чинōма и бырōма нин
ставыс, кушалōма вōр и ва... Кулōма кодь лоōма. — Рай-
да сьōкыдпырысь вуджōдiс ловсō да выльысь на вувзы-
сис чуймōм Степан Фēдорович вылō; сылы мырдысьōн
окота лои висьтавны сьōлōмас лоōм став дōйсō: — А мый,

абу али мый сідзи?.. Оти быдса позтыръяс нем жалиттөг кокошитө... Мөд кульмыны кайөм чериөс додь тырөн гум-лалө... Коймөд, тышкас-мышкас план тыртөм могысь, го-сударство нимөн став пещсө да ёгсө лэдзө юө... Од юыс — «быдөнлөн» жө, ставсө терпитас... Белалөмаөсь думайтны, мый вөр-васө куш сөмын сы вылө и лөсьөдлө-ма, мед эськө тыртны адгоршъяснысө... Мед эськө ныр-ны да виавны сэтысь став ловъясө... Мыйла нө ньөти абу жаль ловъя лолыс?! Коді, гашкө, миян моз жө ним-кодясьө олөмнас? Шонді петөмөн и небыд зэрөн нимко-дясьө... Да өд тадзи кө и водзө лоө, йөзыс коркө сэсса джагаласны асланыс горшлун вөснаыс! Пөдасны ли... Кор ставсө нырасны да пещөсьтасны... Кор немьсь-немтор оз коль му вылас... Тшынасьысь трубаясысь кындзи. Ве-сиг сынөдыс оз коль... Сідзи и пөдасны сэсса ставныс... Природаыс өтчыдысьөн босьтас сәки водзөс йөзөн вөчөм нәмөвөйся став дойясьыс...

Тадзисө ратшйиг-сөрнитигөн Райда то шуркйис-чукөр-тіс көлуйсө, то щөтясьөмөн сувтліс мужичөйяслы паны-дөн. Лөз гуранъясас пыдө вөйөм синъясыс сылөн ыпъя-лісны яр биөн. Позис чайтны, мый тани өні абу рамник да шань мывкыда Райда, а ачыс ёма-бабаыс, коді виччысь-төг петөма вөрсьыс да бурөн оз көсйы лэдзны кыйсьысь-ясөс, быть көсйө босьтны налысь ыджыд водзөс...

А ёна шенмунөмөн видзөдысь Питиримлы друг быт-тө лои гөгөрвоана, мыйла Радаыс вывтіджык косньөд, көть эськө, буракө, сөйөм-юөмын тырмытөмсө некор эз төдлы. «Быд пөлөс мөвпсьыс сотчө сылөн лолыс и вир-ййыс! — сьөлөм сетөмөн думыштис Питирим. — Кыдзи ыджыд жар вылын из шом сотчө — шомыс сылө, а изйыс кольө...»

Питирим, кыв ни джын шутөг, тшөтш пондіс чукөрт-ны көлуйсө.

— Питя, тэ нө мунны жө али мый көсьян? — дзикөдз падмис Степан Фёдорович.

— Отнас өд сйө оз аддзы петнысө, вошас...

— Либö гортöдзыд колльöдан да бөр лок, — долыд-мыштис Степан Фёдорович. — А ме тані... виччысьышта... — сійö көсийс шуны: «вöралышта», но Райда дырйи эз нин лысьт тадзисö шуны.

— Ме, Степан Фёдорович, буракö, ог жö нин бёрсö лок... — нурбыльтис Питирим.

— Кыдз он лок?! Отнамöс али мый менö колянныд?.. Друг да висьма ме тані? Отнамыд кызди пета сэки?.. Мыйла нö, морö, нуöдчынысö вöлі?..

— Мунам либö тшöтш öтлаын, — сöмын и шуис Питирим.

А час-мöд мысти куимнанныс петисны гортлань туйö. Ыджöм нопьясаöсь. Степан Фёдорович медсьöкыда кыскö, көть эськö и Питирим, жаялдзаыс, став көлуйсö сылысь тöбис аслас нопйö... Вывтіджык уна уткаыс лои дядьöйдлөн, солалöмаыс и куштытöмыс...

Райда бергöдчылöмөн медбөръяысь видзöдліс турун зорöд кодь топыд чом вылö, код водзын вынтöма тшына-сис на таялöм бипур, и бара на мыйкö вөрзис-муткырт-чис морöсас, и весиг синваыс доршасис... Мыйкö зэв бур и зэв лёк лоис сыкөд тані, и öні со чашйысьö таысь сьöлöмыс... «Öдйöджык нин көть школаö! — майшасис ныв. — Челядькөд ноксигөн оз-ö регыдджык разав став гудырыс...»

Ты весьтöд, герчкигтыр, век на лэбаліс öтнасөн кольöм утка. Корсис-чуксаліс пьянсö... Сійö, буракö, вöлі ёна чуймöма, мый пьяныс оз шыасьны сылы воча, мелпырысь оз уйны-локны чуксасьöм вылö...

Коньөр мам!

Гöгрöс ты дорö матыстчигөн лöсяліс паныд лэбысь уткаяслөн кельöб. Мыйөн казялісны йöзöс, быттьö команда серти ставөн чивкнитисны вывлань. И Райдалы тöд вылас усины татчö воигөн аддзывлöм уткаяс: сэки найö, повзьöдлытöмьясыд, стройнысö вежтөг лэбалісны юр весьтöдныс.

«Велөдiм ми найöс, кыдзи колö овны!» — курыда нюм-мунiс ныв.

Шондiөн югзбодöм, пыдöстöм лöz енэжын шывъялис сырья борда Кöзяин. Зэв вылö талун кыпöдчöма, негырьсь кытшовьяс вöчалöмөн колльöдö сьöкыда вöсьлалысь войтырöс.

Паськыд нюр шөрöдз воём бöрын петiс ташка. Сьöкыд ноп нöбалiгөн некыдз он вермы водзсасьны ськöд. И нюрыс пидзöсöдзых да, турунзбöм вутшъясыс кизьöриникöсь, некыгчö пуктывны ноптö.

Питирим öддзöдö вöськовъяссö, мед регыдджык кос вөр дiодз воодчыны да сэнi мавтчыштны мазьөн... Лёкысь кашкöны. Ньылöмныс шорөн визувтö вывсьыныс. Шоналём сынöдыс оз судзсьы ловнысö вöськöдны...

Торйөн нин васöд да вöйталö вөр дi дорöдыс. Танi весиг шор кодь визувтö. Сöмын тай кыдзисюрö-а, зэв паськыда. Шочиник нилбөг потшъяс кок улад вöськавлöны...

Медбöрын мунысь Степан Фёдорович вильдiс да бузгысис-усис гатшөн сiм ваö, сьöкыд нопйыс кыскис мышыв... Сидзсö абу и сэтшöм джуджыд ваыс, но некыдзи оз вермы чеччыны. Нетшкысьö-пессьö капканö шедöм ош моз. Но морöс вомöныс зэлыда кöрталём ноп кövъяссö оз вермы мынтöдны.

Кымыньтчыны ваас оз лысьт ни — пöдан ещö, вылисьяныс жамкнитас нопйыс да... А кузь эжöрыс со сайöдiс нин водзын болскысьясöс... И ташкаыс пурö-сёйö...

Друг Степан Фёдорович лов тырнас кылис, мый увсьыс кизьөр нюйтыс ыджыда потöмөн вөрзис, да сийöс нёнялö-кыскö пыдöстöм йирö. «Кадья татi!! — садьтöгыс повзис вöралысь. — Татчö тай и смертьыд суис менö!.. Фронт вылын эз су... Биа шер улын... А татчö талялис... Нуйт пытшкын пöдны ковмас... Нопйöй вöсна... Аслам горшлун вöсна...» — ставыс тайö пемыд войын чардби моз югнитiс лов вылас, öти здукөн дзенавмөн ясыда югдöдлiс ассьыс став олём-вылёмсö... И сийö горöдiс лёк горшөн:

— Ме-ездö-ой!!!

Райда да Питирим шемöса бергöдчисны — ёртиныс не-
көн оз тыдав. И найö нöшта на ёна весьöпöрисны: кык-
нанныслы кажитчис, мый Степан Фёдорович веськаліс
казявтöм кадъяинö да тюльскысис-вöйис сэтчö.

Найö ыза-буза шыбитісны нопнысö ваö да усиг да
чечигтырйи чепöсйисны бөрвыв.

Степан Фёдорович вöлі ловъя, сöмын тіравмöныс пов-
збöма. Сьöкыд нопйис изъялöма морттö да некыдз оз
лэдз чеччыны. Да и оз лысыт сійö ёнасö вийсьыны, кад
улö дзумгысбöмысь полöмысла, ки и кок паськыда таджгö-
дöма... Бузöдчигтырйи отсалісны утка кыйысьлы легзъысь
кок йылас сувтны. Ставöн сулик-ва кötасисны да кыза
эжсисны сім нүйтөн.

А юр весьтаныс, зэв вылын сöдз енэжас, шывкъяліс-
гöграліс сыръя борда Кöзяин да, буракö, ас ногыс сера-
ліс.

Ювеналий Иванович



Сөстөм лымийөн шоныда кышасьом вөр дзырыда югъялө лыдтөм эзысь киньясөн. Ывла вылын февраль, и шонди луннад зэв нин уна югыдыс. Миян ыджыд МАЗным, гораа мургигтыр, төвзё ягө керла. Линейка кодь веськыд туйыс шөрипөв юковтөма вөрсө, и ми тувөдампырам сэтчө каналө моз.

Но шофёр виччысьтөг бергөдыштіс ва больяс кодь йөгьяса руль гөгыльсө, и ми кежим шуйгавыв. А сэсса, ыджыдкодь кытшов вөчөм бөрын, выльысь петім веськыд трасса вылө.

— Код юрөн кө вөчөмаөсь таті туйсө-а! — шуи ме шофёрлы. — Мый мор вылас колө тайө кытшолыс?

Шофёрлөн еджгов синкымьяса, чангыла ныра гөгрөс чужөмыс югдіс гажа нюмысь.

— О-о, тайө чукылыс миян историческөй, — шуис сійө.

— Кыдз «историческөй»? — шай-паймуні ме.

— Сылөн весиг ним эм — «Дозмөр чукыль».

Меным, дерт, окота лои төдмавны, кызди да мыйла лои татшөм нимыс, и ме куті юасыны.

— Тайо туйсо выль делянкао пискөдiм кольом тулысын, — любопырысь висьтавлiс водитель. — Ягыс тагi кос, да ёнджыкасö бульдозерөн и шылёдалiм — тöлык кыскасьом вылö. Буретш ме и вöчи, сæки бульдозер вылын на вöли уджала да... Сiйö луннас буретш вöлим мастерыскöд, Ювеналий Иванэчкöд. Воим татчöдз, и нюкос дорысь сера дозмөр жбыр лэбзис. Готсьö зэв ёна. Ювеналий Иванэч, дерт, пырысь-пыр жö гөгөрвоис, мыйын делöйс — сiйö миян вöрад профессор кодь... Тани, шуö, тöдöмысь, поз сылөн. Сувтöдiмö бульдозерös, петiм. Видзöдам, поз и эм неылын! Веськыда муас, гуранторйын, пыдöсас нитш сöмын вольсыштöма. Виживат квайт кольк куйлöны, руд чутöсьöсь. И вед колö жö туй шөрö веськавны!.. Мый керны! Вештыны позсö ылöджык бокö? — вермас мамыс не аддзыны бөртинас. Да кöть, шуам, и аддзас, вөрöдöматö вермас на и эновтны.

— А мый дыр думайтнысö! — шуи ме сэсся мастеры. — Пажын кад жö тай матысмö, вай пуам найос да и закусидам.

Шуи тадзтö и не рад лои шуöмыслы. Ювеналий Иванэч сэтшöма скöрмис, тököтьö оз нöшав менö. Ме пö тэнсьыд, живодёрлысь, вөрзёдан кö, сылiдзиртö песовта!..

Думайтiм, думайтiм да и вöчим Дозмөр чукультö.

— И пöжсис сæни дозмöрыс? Эз эновт позсö? — менö ёна чуймöдiс шофёрлөн висьтыс. Дозмөр поз вöсна вöчны вөр кыскан туй вылын кытшов! Он быдлаысь аддзыв татшöмтö...

— Пöжсис. Мый нö не пöжсьыны! Гожöмнас сæни эгö уджалö. Кынмалöм бöрын сöмын пондiм кыскасьны. Ювеналий Иванэч шуö вöли — вит пи пö лоöма. Квайтöд колькыс, буракö, тыртöм вöлöма.

Водитель чöv усис. Стеклö кодь туй юж вылö видзöдысь руд синьясыс сылөн гажмисны. Но тшöтш быттö и вильышмисны. Та вöсна меным кажитчис: сiйö эз на ставсö помöдз висьтав.

— Ноко, уна-ö тэнад часi вылын? — юалис сэсся сiйö.

— Дас вит минуттөм — дас кык.

— Сідзкө, вай ёнджыка кочегаритлам — колө удитны
ыны ягө пажын кад кежлө.

— Ме вөсна кө, нинөмла-а: кынөмөй оз на сюмав, —
шуи ме.

Водитель нинөм эз вочавидз, сөмын ниоммунис да, кок-
нас педаль вылө личкыштөмөн, содтис газ.

...Тi, дерт, төданныд, кутшөмджыкөн овлө вөр лэдзан
мастерскөй участоклөн базаыс. Йөз тані оз овны, лун
сьөмөснас сөмын волөны шонтысьны да пажнайтны пө-
лөзьяс вылын сулалысь керкаясө. Дерт, и мастерскөй эм,
мед, мыйкө кө лоө тракторьяскөд либө пилаяскөд, посө-
локө лэччөдлытөг позис дзоньтавны найөс. Неыджыд
электростанция сетө би.

Сідз жө и тані. Но век жө меным синмө пырысь-пыр
шыбитчис, кутшөм лөсьыда да пелька вөлі меститөма
ставсө. Мукөдлаас лясйөдласны кызэсюрө, вужинь-ве-
жиньөн керка и мастерскөй, и жугалөм трактортө сэтчө
жө зутшкасны, и сiмөм бөчкаястө. А тані — синмыд не-
кыччө оз крукась. Оти визьын — йөзлөн сөян-шонтысян-
иньяс, весигтө торья «гөрд пельөс»; мөд визьын — ма-
стерскөйяс, коймөдын — тракторьяс. Любө и видзөдны...

— Тайө и эм Ювеналий Иванэчлөн овмөсыс, — шуис
водитель, кор ми воим участокө. Сийө петис жө кабинаысь,
веськөдыштіс коссө да, кушин сайын сулалысь кондаяс
вылө чатрасигтыр, шуис: — Но, талун тай абу на воөма...

— Коді абу воөма? — эг гөгөрво ме.

— Бөртиджык төдмалан! — серөктіс шофёр, а сөсся и
шуис: — Мен колө сөвтчыны мунны, тэ кызкө-мыйкө
ачыд нин тані.

Ме атгьөалі бур мортөс.

Мастерөс ме аддзи сөстөм, краситөм джоджа контор-
каысь. Сийө пукаліс (но и дивө!) полируйтөм пызан са-
йын да тшөтайтчис. Тайө вөлі ар ветымына мужичөй,
шөркодь тушаа, пистиөсь чужөма да паськыдкодь ныра.
Веськыда кө шуны, ме чайті аддзыны сийөс төдчанаджык

мортон, вөр-ва видзсы багатыр кодьон. А тайо со — сідз-тадз вөлөма. Сөмын, гашкө, негырысь лөз сингысы кызкө зэв нин збыльсь видзөдоны тэ вылө, быттьо мортис вемөдзид косьо йиджтысьны видзөдласнас.

Ми төдмасим да сёрнитыштим вөр лэдзан удж йыльсь. Мастер сёрнитис тэрмасьтөг, быд юалөм вылө вочавидзис мөвпалыштөмөн. И лосьыд кывйөн. Сийо бура төдис участокысь йөзөс, техника и быд лыдпас. «Тыдалө, көзьяин!» — не өтчид мөвпыштли ме сийос кывзигөн.

Сылөн вөлі мода — сёрнитигас веськыд кырымнас шлөчнитны-кусынътавны шуйга кисыс чуньяссө. А найо помөдзсө сідз нин оз вөлі веськавны. Буракө, киас коркө дзенгылөма пуля — кимөдзис тай вурьса-а, — и чуньясы кыздсюрө бурдомны... Кор ме, стрөка сюрис да, юалі та йыльсь, мастер шпыньмулөмөн дженьыдика шуис: «Немеч колис пас нэм кежлө».

Ми өтлаын муним пажнайтны. Банийөм чужөма мича ныв быдсяма сөянсө лөсьөдома вөр лэдзысьяслы, весигтө гуляш и блин. Татшөм сөйөм бөрад, дерт, кокниа пөрласясны пуясыд...

Вөр лэдзысьяс, көдзыдысь да төлысь дубитчөм чужөмъясаөсь, сөйигмозныс гажаа варовитисны. Мыйөн сөмын ми пырим столовойо, кодкө вильыша шуис:

— Ювеналий Иванэч, талун миян Розочкалөн блиныс сотчөма... Тэ эськө он төд, мыйла?

Тайо вөлөм менө вайысь шофёр. Сылөн, буракө, сөвтчысьөма нин да тшөтш со воөма пажнайтны.

— Н-но?! Гашкө, Петырыс эз оқышт да сийөн скөралө.

Кухня «өшиньын» тыдалысь банийөм чужөма Роза нөшта на гөрдөдис. Вөр лэдзысьяс сералісны. Меным кажитчис, мый найо велалөмаөсь нин кывны мастерсянь татшөм сяма гажа сёрнисө да быд здукө дасьөсь кывзыны.

Столовойысь петигөн ме бара на казьтышти варов шофёрөс да чатөртчылі кондаяс вылө. И мый жө ті чайтаньыд? — өти туган йылын пукаліс съөд дозмөр. Ас төд-

лытөг ме лажынтчышти, мед не повзбодны — омөлик
көтө да өд вөралысь жө — и шөпниті ёртөйлы: — Дозмөр
со!

А сійө сөмын серөктыштіс.

— Эн пов, оз пышйы. Сійө мян ас морт, пөшти быд
лун воывлө.

— Воывлө?!

— Да... Медводдзаысьсө ёна көдздыяс дырйи воис.
Кынөм сюмалөмыс, буракө, веніс полөмсө. Н-но, сәсся
видзөд, дзикөдз велаліс.

— Ті нө верданныд али мый сійөс?!

— Дерт, кийсьтө ог жө. Но, буракө, сөян колясьяс
дінө сибөдчывлө. Войтырыс сөяннад нежитөны вөрса гө-
стятө...

Ме синмөс вештывтөг дзорги туган йылын пукалысь
кузь голая ыджыд лөбач вылө. Сійө сьода лөсталіс шон-
ді водзын да кажитчис сьөд изйысь лөсйөма кодбөн.

— Гашкө, тайө Дозмөр чукыльсьыд? — юалі сәсся ме.

Ювеналий Иванович бара серөктыштіс:

— Н-но, төдан нин?.. Гашкө, и сәтысь.

— Гашкө, вирыс кутшөмкө ногөн висьталіс, мый йөз
өтчыд вөчлісны нин сылы буртор, и сійө выльысь сибөд-
чис на дінө?

— Н-но, тайө нин философия, — Ювеналий Иванович
нюмъяліс. Чужөмыс сылөн кызкө зэв ёна шоналіс, синья-
ясыс меліаммисны, писти серыс быттьө шыляліс, и мор-
тыд меным кутіс кажитчыны мичаөн.

Гортө воөм бөрын ме частө казътывлі Ювеналий Ива-
нович йылысь. Мөвпыштча, и пыр жө төд вылө усьө сы-
лөн пистиөсь чужөмыс, торйөн нин пытшкөсөдзыд йидж-
тысьысь лөз синьясыс. Частө да азыма куритчөмыс син
водзын сулалө и, весиг тшөтш сьода-гөрда ыджыд мунд-
штукыс. Ме унаысь висьтавлывлі ёртъяслы вөр-ва вөсна
сылөн ыджыд төждысьөм йылысь.

Отчыд, газет лыддигөн, казялі: Ювеналий Иванович-

лөн участокыс босьтöма первой премия вөр лэдзсыяслөн ставсоюзса ордйсыöмын. Зэв долыд лои меным таысь, быттьöкö аслым тшöтш сетисны премиясö.

А сэсся карын чукöртчис вөр лэдзсысь мастерьяслөн слёт. Дерт, корисны сэтчö медбурьяссö. Ювеналий Иванович веськалöма жö слёт вылад. И весигтö выступитис аслас удж йылысь докладөн. Ме кывзi жö сийöс. Сылөн сёрниын шөр визьнас вöли — «не сöмын керавны вөрнымöс, но тшöтш и видзны сийöс». Ювеналий Иванович волнуйтчис — öд сы мында йöз кывзö! — но мöвпсö ассыис пöся висьталiс. Буракö, ёна нин шонтöма сийöс сьölöмнас. А, кызди тöдса, пöсь кывйид йöзылды мөрчöджык.

Ми паныдасим мастеркöд важ тöдсаяс моз. Дыр ветлöдлим кар кузя, Ювеналий Ивановичöс шензьöдис карлөн быдмöмыс да паськалöмыс. А рытнас и пукалыштiм на öтлаын. Кызкö тöдлытöг мяян сёрниным бара на кижис вөр-валань.

— Быттьö окота кö эм, ме верма висьтавны тэныд, кутшöма пöткаяс радейтöны öта-мöднысö.

— Радейтöны? Кызд нö ог кöсий! — нинöм нин шуны, кызди ме нимкодьми.

— Толькö тэ менö эн торкав. Н-но, окота кö кывзы, абу кö — эн. Толькö эн торкав.

Ме кöсийси. И Ювеналий Иванович висьталiс меным со мый.

— Оз уна сюрны сэтшöм йöз, кодьяс эськö эз колльöдлыны шоналöм синьясөн дзодзöг кельöбьяс. Торйөн нин тулысын... Чатöртан юртö — кузьысь-кузь кельöб, кыпыда гогзигтыр, вылитi шывгö-кывтö. И öд дивö! — кельöбыслөн ёсь йылыс, компас стрелка моз, чурвидзö веськыда войвылö. Гырысь лэбачьяс шывгöны тэрмасьтöг, бордьяснас öтмоза шевкйöдлöмөн, ньöти оз дзугны стройнысö. Быттьö велалöм салдатьяс.

Н-но, видзöдан на вылö, и сэтшöм лöсьид лöö сьölöм вылад. Сысысь, мый му выланым эмöсь и тайöгырысь да мича лэбачьясыс.

Дзодзөгүд ээв сүөс да вөй лэбач и йөзаинтө оз ээв радейт. И, төдөмысь, буретш та вөсна эз кут пөжсьыны миян сикт гөгөрьясын. Көть эськө и водзтi, кор эз на вөв матын леспромхоз, өткымынөн кольччылісны лөньджык тыясө гожом кежлө, быдтылісны челядьпиянсө.

Н-но вот, коркө май шөрын кымын ме мөдөдчи Ёкыша тыө вуграсьны. Менам сәні ветки пыж эм...

Пукала пыжын, видзөда таб вылө. Луныс шондіа, лөньсьыс-лөнь, татшөм лөньыс овлө только вөр пытшкө дзевсьөм вадьясын, кытчө и төвруыс омөля сидзө. Ном ни лөдз абу на. Ты веркөсыс стеклө кодь югьялө. Гыбалө-ворсө чери. Гөрд бока ёкышъяс чеччалөны пыж нырын. Ме ог төд, ёна-ө лөсьыд райын, но, чайта, таысь лөсьыдджыкыс өдвакө вермас лоны...

Н-но, пукала тадзи и друг юр весьтын кыла дзодзөглысь гогзьөм. Чатөртi юрөс — дзодзөг и эм!.. Быдөн любө лои: мися, абу кедзөвтөмаөсь Ёкыша тысө — а сийө миян вель ыджыд — кольччөмаөсь пөжсьыны.

Недыр мысти выльысь на тыдовтчис дзодзөгыс, бара на шыасьлө-дзуртышталө. Быттьө нораа корсьө-чуксалө кодөскө. Н-но, мый нө, мися, тайө? Позсө али мый воштөма? Али водзджык на позтысьнысө...

Сәсся и юрө друг кучкис: гашкө, ассьыс пөвсө воштіс да?

Некымын лун мысти сиктсаяскөд сёрниө воим. И өти мужик, Онтип Гриньө, ошйысис: Ёкыша тыысь пө дзодзөгөс лыйи. Энь али ай, мися? Эньыс пө веськалөма. Кынөмас пө унакодь кольк вөлі.

Мися, эськө, мисьтөм бугыльөс, асьтө тәнө пезьдыны! А мый нө! Тулысын лыйлыны энь пөткаөс... Гашкө, сийө поз вылас нин пукаліс да... Тайө жө медлөктор! Вредительство тайө! Көть нин, шуам, айсө лыйис... А он кө төд, кодi эньыс да кодi айыс, немторла пищальсө киад босьтны. Яй кө колө, мун да ньөб лавкаысь мөс кокъяс.

Н-но вот, видча тадзи, а аслым сәтшөм жаль дзодзөгыс, мый мися, өні лоө сыкөд, коньөркөд? Кысь сийө ад-

дзас выль мусуксё, од став кельёбыс нин войвылө муніс...

Мыйён сөмын прөст кад лонштис, ме пырысь-пыр жө бара муні Ёкыша ты дорө. И мый жө тэ чайтан? Шонді лэччан дор бара казялі дзодзөгтө: сійө лэбис вад весътөд да нораа гогзис-дзуртис. Дерт, сійө век на корсис-чуксалис ассьыс пөдругасө...

Но аддзан өмөй, кор сійөс Гриньё важөн нин жаритис!

И-но вот... Дзодзөгьд сэсса гожөмбыд оліс Ёкыша тыад. Муяс вылысь некымынысь аддзывлөмаөсь и. Көнкө, өзимөн чөсмасьыштны лэблывліс... Гриньё кык пөрйө на лыйлөма сылы, но абу веськалөма. Арьявылыс нин, ельдөг вотигөн, ме бара на кывлі коньөр лэбачлысь гогзьём-лөвтөмсө...

А сэсса кынмавын кутис. Йи сувтөм бөрын ме муні Ёкыша тыө төвся кыснанөн ёкыш лэптавын. Понді матыстчыны аслам важ коляс дінө. Видзөда, стеклө кодь югыд йи вылын мыйкө рудвидзө. Сьөлөмөй юковтис морөсын: абу-ө дзодзөгьд?!

Сійө и вөлөма. Абу нин ловья... Пасьмунөма морөснас чорыд йи вылө... Гашкө, войнас вердчис көнкө муяс вылын. А сэсса ывлаас друг ёна кынмис, тыын медбөрья рыс йисяліс... Коньөр, чайтис, мый сәні ва на, и швач пуксис...

Гашкө, медбөрья здукөдзыс век на надейтчис, мый вот-вот воас сы дінө мусаыс. Сьөлөмыс некыдз эз лэпты мунны сытөг шоныд муө...

Ме пондылі нуны сійөс гортө, но друг зэв шог лон. Мыйлакө дум вылө уси аслам гөтырөй... Сійө кувсис вит во сайын, кынөмас ракысь...

И ме дзеби дзодзөгсө тыбердса джуджыд керөсө, пашкыр ниа улө. Оні быд пөрйө, кор воывла Ёкыша тыө, век нин сулышта тәні. Сьөлөмөй сәки нөйтчыштө морөсын, быттө медмуса другөй куйлө ниа улас.

Тэрыб кок



Тэрыб Кок асывбыд нин ризъяліс-котраліс югыд шондён серөдөм, войся зэрөн сөстөммөдөм вөрын. Сійө то кыккокийв лыйыштіс-кайліс джуджыд керөсьясө, то нёв моз шутөвтліс-төвзыліс яла нитшка гулыд ягъясөд. А сэссия, мудзыштөм бөрын, дзум пыравліс посныдык вөра расъясө, чөсмасьліс небыдык пожөм йывъясөн да том пипуяслөн томиник корйөн. Пөсялөм мыш вылас сәки зэр моз гылаліс лысва, и сәтшөм любө вөлі кывны тайө ыркыдсө.

Сылөн топыд вир-яйыс туөма том вынөн, кызди тувсов кыз — зараваөн. И окота вөлі помтөг лэбавны чөсқыд сынөдөн тырөм ягъясөд да нюръясөд.

Кор яр шонді кыпөдчис вылөкодь нин да пондісны дөзмөдчыны көин кодь горш лөдзьяс, Тэрыб Кок лэбыштіс-петіс ю дорө. Бөръя кадө сійө унаысь воывлис тайө джуджыд кыркөтшас. Тані юладорсянь пөльтысь төвру разөдіс-вөтліс быдсяма өвадсө, меліа ыркөдіс сылысь пөсялөм вир-яйсө. А нөшта сылы зэв любө вөлі видзөдны шонді югөръясөн ворсөдчысь ваө, көні тшөтш тыдаліс сійө ачыс.

Кутшом винелон да мичаон лон нин сийо! Тшала чатортчома горба ныра юрыс. А моросыс мый пасьта! И кызко зев лосыда вочасон восняммо том пожом коды гогрос гырко. Кокьясыс кузьось, енось, на вылын сулагон сийо быттьо оз и кыв аслас тушаыслысь сьоктасо.

Сомын тай юрсо оз на мичмодны сюръяс! Но нином, регид и сюръяс лооны. Од сылы аросысь нин унджык. А Ыджыд Сюра Бать висьтавліс, мый йоралы сюр заводито петны, кор сылы лоо аросон-джынийон. Гашко и батыслон моз жо лооны вужля коды паськыдось да уна вожаось. Сэки Тэрыб Кок ношта на вына лоо, сэки сийо став вөр пасьталаас некодысь оз кут повны — некутшом Кузь Гонанысь. Оні нин ёнасо оз пов-а, коть эсько став оружиеыс сылон — чорыд кок гыжыйс сомын и эм...

Ыджыд Сюра Бать йывсьыс думыштіс да, пыр и нормыштіс сьолөмыс. Кызко зев гогорвотома янсалисны сэки найо. Быттьо кутшомко тодтом вын иободис-нуис кытчөко батысо. Дзикодз выло...

Сэки вөлі на төв, лымыйс эз на вөв уна усьома. Пукалис шондіа лун, и вөрыс гогор дзирдалис лыдтом-тшөттөм би киньясон. Найо куимон вердчисны Ыджыд Вөр дорса кушины, узянінсяньыс неылын. Сийо буретш вөлі чегө вомас кодзыдысла чорзьом поноль йыв, кызди Ыджыд Вөр пөлонын югнитіс чардби да лөкысь йиркнитіс гым. Ёна повзьомысла сийо кыккокийв чепөсийс бокыв, мамыс бөрся. А юрас вирдыштіс шензяна мөвп: «Мыйла но чардало да гымало төлын?..» Дыр найо котортисны-пышйисны Мелі Мамыскөд Паськыд Кушин вомон. А Ыджыд Сюра Батыс кольччис. Тэрыб Коклы дивө вөлі, мыйла батыс — сэтшөм пельк да ён — некыз оз вермы вөтодны найос. Кор водзын мунысь мамыс сувтіс, Тэрыб Кок юалис та йылысь. И гым йысьыс юалис. Мелі Мам эз пырысь-пыр вочавидз, сы вөсна мый сылон дзугыльмом синъясысь гөгыльтчисны гырысь синва войтъяс.

Медбөрын мамыс висьталіс Тэрыб Коклы, мый тайо

эз вöв гым, а Кык Кокалөн сьöласьöм. Мый тайö сьöла-сьöмнас Кык Кока виис Ыджыд Сюра Батьсö, да найö сэссия некор нин оз аддзвыны сийöс.

«Кыдзи виис? Кутшöм Кык Кока? Ме некодöс эг аддзвы да?» — чуймöмөн юасис Тэрыб Кок шогö усьöм Мелі Мамыслысь.

И мамыс дыр висьтавліс пиыслы кык кокаяс йылысь. Наысь пö медьёна колö повны вöрад, сы вöсна мый найö медмудерöсь да и, биён сьöласьöмнысла, медвынаöсь. «Пельнад ёнджыка кывзысьны колö, пиö, — велöдіс мамыс. — Миян, йöраяслөн, синмыд да нырысыд абуджык мукöд вöрсалөн моз сюсьöсь. Сідзкö, медьёна колö надейтчыны пельяс вылад».

Та бöрын Тэрыб Коклөн кутіс лöгыс петны Кык Кокаяс вылö. Сийö кутіс и повны наысь, кöть эськö ньöтчид на эз аддзвы, кутшöмöсь найö.

А тулысладорыс, кор лымйыс лои морöсöдз да из кодь топыд, чарöмыс вирöдз дойдаліс кокъяс, на вылö уськөдчисны Кузь Гöнаяс. Дерт, эськö и öтка Кузь Гöнасыд найö оз повны, но Кузь Гöнаясыс вöліны унаöн, и быдöнлөн синьясыс сотчисны тшыг биён.

«Но, пиöй, кутам тышкасьны! — кызд вермис збодержыка бакöстіс Мелі Мамыс да пырысь-пыр жö сетыштіс бöр кокнас медматысса вöтчысьлы. Биа из кодь гыжйөн шковгöмысь Кузь Гöналөн юр чашкаыс пасьмуні кольк кыш моз. Тэрыб Коклөн öзйис жö сьöлöмыс, — öд сийö чужис повтöм рöдын! — мамсыс на ярджыка сийö уськөдчис Кузь Гöнаяс вылö. Öтиöс таяліс воддза кокнас, мöдлысь сюрса лысö чегис бöр гыжнас. «Эк, сюрьяс кö эськö вöліны!» — гажтöма думыштіс сийö кутшöмкö здукö.

Но Кузь Гöнаяс вöліны унаöн — öти усьöм местаö волісны кыкөн. Найö торйöдісны эня-пияöс öта-мöд дінсьыныс да кытшалісны торйөн-торйөн. Тэрыб Коклы öти Кузь Гöна чеччыштліс нин голяс да лэчыд пиньяснас варснитіс-нетшыштіс яйсö. Мöд — кулыштіс зад кучик-

сö. Но Тэрыб Кок эз кöсий сетчыны: сийö чужьясис, люкасис сюртöм юрнас, и сы гөгöрын туплясис нин Кузь Гöнаяслөн нель шой. Но Тэрыб Коклөн и аслас нин бырисны вынъясыс, туша пасьталасьыс визувтис вир.

«Прöщайтлы, Тэрыб Кок...» — кылö, джөмдаланаа бакöстыштис Мелі Мамыс, кодöс вöлі дзикöдз нин личкöма-öсь Кузь Гöнаяс. Тэрыб Коклөн ыджыд дойөн вөрзис сьöлöмыс. Медбөръя вынъяссö чукöртöмөн сийö уськöдчис Мелі Мамыслы отсөг вылö, но сэки куим-ö-нель Кузь Гöна личкисны сийöс асьсö.

«Буракö, пом...» — шогпырысь думыштис Тэрыб Кок и лöсьöдчис кувны.

Но сэки друг гора вөр-васö косяліс-поткөдіс гымыштöм шы, и ньылöмөн да вирөн ойдöм синъяснас Тэрыб Кок казяліс, кызди пожöмьяс сайын сьавкнитис-югнитис.

«Кык Кока сьöласьö биөн!» — гөгөрвоис Тэрыб Кок, и дум вылас уси татшöм жö гымысь вошöм Ыджыд Сюра Батьыс.

Гөгөр лои шы ни тöv. Эз кут кывны весиг Кузь Гöнаяслөн эргöмыс. Тэрыб Кок восьтис син пövсö — Кузь Гöнаяслөн дукуыс эз вöv. Тэрыб Кок кыпöдыштис юрсö, видзöдліс гөгөр. Кузь Гöнаяс некөн эз тыдавын. Неылын куйліс сöмын Мелі Мамыс, сийö эз нин вөр. И сэки сийö казяліс, кызди пожöм чукөр сайысь сылань локтö... Кык Кока.

Тэрыб Кок ёна повзьöмысла ымöстыштис, кунис синьяссö. Юрыс сьлөн бөр лёткысис-усис лым вылö. «Час, Кык Кока выльысь сьöлыштас биөн, и ме ог ло... Воддза сьöлыштöмнас тай бырöдіс Кузь Гöнаясöс...» — шога мөвпаліс коньөр Тэрыб Кок.

Сэссия сылысь, куньса синмалысь, быттö нюлыштисны голясö. Мамыс моз жö меліа. Ёна чуймöм Тэрыб Кок восьтис синьяссö — мамыс эз тыдав. Тайö, вөлöмкö, Кык Кока малалö сийöс. И дивö! — сьлөн лапаыс вöлі мамыслөн кыв кодь жö небыд да шоньд.

«Мыйла нө Кык Кокасыс сэтшөма полісны Ыджыд Сюра Бать и Мелі Мам? Со кутшөм небыд да шоныд сылөн лапайс да?» — Тэрыб Кок вөлі дзыкөдз чуйmöма. Но век жө полөмыс сылөн бырыштіс.

А Кык Кока, мыйкө ас ногыс шуалігтыр, вель дыр малаліс курччалөм-парсалөм Тэрыб Кокөс. Сэссия и пондіс мавтны доймөминьяссө кутшөмкө ваөн. Сэки Тэрыб Коклөн пемдыліс син водзыс лөк дойысь. «Со тай вөлөм кызди Кык Кокаыд көсийө помавны менö...» — бара мөвпыштіс шоппырысь. Но недыр мысти лои выль дивө: Тэрыб Коклөн ранаясыс вочасөн дугдісны висьны, лои зэв лөсьыд и сійө виччысьтөг унмовсис.

Садьмис сійө, кор морөссө пондіс зэв ёна шонтыны. Орччөн сыкөд ыпъяліс Жар Би. Быттьө гожөмын, кор повзьөдчана гымалөм бөрын өзйылө вөр. «Тайө Кык Кокаыд тай быд дивөсө вермө вөчны!» — шензис Тэрыб Кок, а аслыс сэтшөм лөсьыд вөлі кывны бисянь локтысь шоныдсө.

Кык Кока сулаліс орччөн. Сылөн чужөмө вөлі сука быдмөма яла нитш, код пытшянь меліа видзөдісны енэж кодь лөз синьяс. Тэрыб Кок аттьөалана нюммуніс тайө синьясыслы.

Кык Кока мыйкө бара шуис гөгөрвотөма да матыстіс Тэрыб Коклы ныр улас ичөтик ва гөпт. Тэрыб Кок мудзис нин шензьөмысь да весиг эз и думыштылы, кызди позьө васө матыстны дінад, а не аслыд матыстчыны сы дінө. Сійө өдийө тьупкис-суйис чущсө да пондіс азыма чурскөдчыны.

Сэссия Кык Кока суйис сылы вомас мыйкө небыдөс да чөскыдөс, кодөс сөйис и ачыс. Тайө сөянсьыс Тэрыб Кок быттьө кыліс гожөмлысь, шонділысь да ловзьясь мулысь көрсө. Сійө вөлі мам йөв кодь жө чөскыд и пырысьпыр жө бөр содтіс вынсө.

...Тадзи Тэрыб Кок төдмасис Кык Кокакөд. И вочасөн дугдіс сыысь повны. И весиг ас кежас нимтіс сійөс Кык Кока Мамөн. Кузь Гөнаясөн начкөм Мелі Мамыс

пыдди. Видзод, коньорлы дзор тошка пöльыд мам кодьон кажитчис. Но да од сійö эз тод йозлысь оласногсö.

Аскинас Тэрыб Кок вöтчис нин выль мам бöрся, кодi шливöдис-исковтiс чарöм вывти тövзъысь кор моз, ньöти вöйласьтöг. Дырөн-регыдөн найö воисны Кык Кокаяслөн оланiнö. И танi — вот и дивö! — ньöти повтöг жövвъялисны Тэрыб Кок кодь жö йöраяс. Да мый сэн жövвъялисны! Ыджыд Сюраясöс танi вöли доддялöмаöсь да кыскöны груз. А Йöра Мамъясöс Кык Кокаяс лысьтiсны.

Кор нин Тэрыб Кок тöдмасис ас коддьöмъясыскöд, найö ошйысисны, мый налы зэв лöсьыда овсьö танi. Кык Кокаяс вердöны найöс, дорйöны Кузь Гöнаясысь. А кужисны кö найö сёрнитны йöз кывйөн, то висьталiсны эськö: тэ пö веськалiн йöра видзан фермаö.

* * *

Бара воис гажа тулыс. Пондiсны варовитны-бузгыны Печораö тэрмасъысь шоръяс. Югыд шондi азыма нюлiс пармалысь лымсö. Тэрыб Коклы, кодлы неважөн тыри арöс, лöсьыда кутiс овсьыны выль местаын. Кынöм вöли пöt. Другыд мыйта колö дiнад. Кузь Гöнаясысь повны нинöм. Тэрыб Кок ёнакодь быдмис, шылялiс, кутiс кывны ас пытшсьыс пыр унджык и унджык вын. Некод сийöс эз кут и гуляйтöмысь. Кор окота лолiс, сийö тövзъылис парма ягъясö да бурпöt ризъявлiс кузь тöv бöрын ловзыны заводитöм вөрöд. А рытьявылыс волiс бөр мусмём гортас.

Тэрыб Кок вöли мелi сьölöма и регыдөн велалiс йöз дiнö. Но медся ёна кутiс радейтны сийöс мездысь Кык Кока Мамлысь внуксö — Ваняös, кодös ас кыв вылас нимтiс Дженьыд Кокөн. Зонкалы вöли ар вит-ö-квaйт, сийö частö гөститöдлiс Тэрыб Кокös еджыд изйөн, кодi вöли юмовсьыс-юмов. Таысь чöскыдджыксö йöрапи эз на тöдлы. Тэрыб Коклы лои окота вöчны мыйкö зэв бурös Ванялы. Окота лои ислöдлыштны сийöс ас вылас. Но мö-

дыс вöлі ичöt на и, дерт, эз на вермы чеччыштны сы вы-
лö. Öтчыд Тэрыб Кок лэдзчысис Ваня водзö пидзöс вы-
лас, и Дженьыд Кок, шудаа сералігтыр, кавшасис сы вы-
лö. Аслыс Тэрыб Коклы вöлі, гашкö, зонкаысь на ним-
кодь. Сійö дыр ислöдліс ичöt другсö. Небыд воськолөн
и рöдтышталöмөн зілис, мед эськö не уськöдны сійöс.
Вочасөн татшöм исласьöмыс кутіс долины быд лун.

Кадыс долыда котöртіс водзö. Тэрыб Кок вöлі шуда.
Быдтор сылы тырмис. Сöмын со сюръясыс эз на петны.

Öтчыд, пармаöд котралігөн, Тэрыб Кок ылöкодь му-
ніс гортсыс. И петіс Печоралөн гажа кыр йылö. Тасянь
сылы зэв нимкодь вöлі видзöдны мöдлапöлын лöзалысь
помтöм вөрö. А нöшта нимкодьджык вöлі видзöдны ваö,
көні тыдаліс сылөн быдмöм-вынсялöм тушаыс. Тадзи
нимкодьясьöм бöрын Тэрыб Кок котöртліс галькиа кöса-
лань да бузгысьліс-пырліс юлөн синва кодь сöстöм ваö.
Ыркыд ваыс босьтліс сылысь став мудзсö, и олöмыс ка-
житчис нöшта нин мусаөн.

Öти лунö тадзи купайтчигөн Тэрыб Коклөн сюсь
пельясыс кылісны таргöм шы. «Буракö, Кык Кока воö», —
долыда мөвпыштіс сійö, сы вöсна мый ёна нин кутіс ра-
дейтны йöзöс. И збыль — чукуль сайысь мыччысис пы-
жа, сійö шылъыда исковтіс ва паныд. Тэрыб Кокöс казя-
лöм бöрын пыжа веськöдчис сылань. Берегö петісны кы-
көн да матыстчисны на вылö повтöг видзöдысь йöрапи-
лань. Налөн чургöдöм лапаясын вöлі юмовтор. Тэрыб
Кок велалöмөн нюлыштіс сійöс ки пыдöсьяс вылысь да
меліа ниртчыштіс юрнас йöз дінö.

Та бöрын Тэрыб Кокöс нöшта на некымынысь чöсмöд-
лісны ю вывті исковтысь пыжаяс. И сійö, кампет радей-
тысь кага моз, дзикöдз велаліс тайö гажаинас.

«А Ыджыд Сюра Бать да Мелі Мам эз и видлыны
татшöм чöскыдторъяссö, — мөвпаліс öні сійö. И жалъöс
лоины бать-мамыс. — Эськö эз кö найö повны Кык Кока-
ысысь, гашкö, и öні на ловъяöсь вöліны».

Сылысь татшöм думъяссö торкис моторлөн вөр-васö

косялысь горыс. Дерт, бара катö кутшöмкö пыжа. Нимкодьмöм сьölөмөн Тэрыб Кок чепöсийс алькөс кöсалань. Гальки вывті котöртигөн сьлөн чорыд гыжъя кокъяс улысь весиг сьавкйисны би киньяс.

Дерт жö, пыжа бара веськөдчис сьлань. Од йöз сэтшöма радейтöны сійöс. Век на быдөн мелиавліс да чöсмöдліс.

Тайö пöрийö Кык Кока вöлі öтнас. Дерт жö, киас сьлөн эм чöскыдтор. Мыйкö шуалö гөгөрвотöма. И мыйлакö тэрыба видзöдывлө öтарö-мөдарö. Оз-ö пов сійö Тэрыб Кокысь? Тэрыб Кок мелиа букöстыштіс да ньöжйöник мөдөдчис паныд. Босьтіс вомас чургөдөм нянь шөрөм, юрсö лэдзыштөмөн кутіс азыма няклявны.

Друг син водзас сьлөн быттö югнитіс. Сэсся кымöсас мыйкö зөв чорыда шковгис. Синьяссьыс сьавкнитіс би, и пырысь-пыр жö кусі луныюгыдыс, быри выныс тэрыб кокъяссьыс. И сійö лябис-усис чорыд гальки вылө. Кусысь вежöрыс медбөрьяысь думыштіс: «Талун ме эг на и удит ислöдлыны Дженьыд Кокöс...»

А звермөм чужöма Кык Кока нöшта куимысь кучкис чер тышкөн усьöм Тэрыб Коклы кымöсас, кытчö сідзи и эз удитны быдмыны сюрьяс.

Кодзувкоткар

ВИСЬТ



— Но, Катшыс, но зонмө, тэа-меа бара на пондiм во-
одчыны асланым гажа дачалань. Кыдзи и пыр, курит-
чыштам тани, бур кывйөн чолөмасям Биа-серьякөд да и
водзө мөдөдчам. Шойччыштөм бөрад час-мөдөн бура
мыськовтам асланым чомйөдз... Көнкө вед тэнад, коть и
кывтөм пемөс тэ, косьмө жө нин лолыд со этайө гажсьыс?

Тадзи сёрнитис аслас понйыскөд ыджыд тушаа, кузь
гөленя котia морт. Ачыс сэк кості, любөпырысь варови-
тигмозыс, сувтөдіс кыз кырся ниа динө двустволкасө, мын-
төдіс мыш сайсьыс сьөкыд нопсө. Сэсся льясыс ратш-
мунтөдз веськөдчис, ыджыда лолыштис да, веськыд кисө
водзлань шыбитөмөн, бур төдсалы моз горөдіс:

— Видза олан, Биа-серья! Лэдзлы жө бара миянөс
ас ордад, сө муса юй!

Понйыс вөралысьлөн — еджыд морөса ыджыд рөда
сьөд лайка — сулаліс орччөн да, буракө, ас ногөныс, морт-
лы гөгөрвотөма, тшөтш вөлі шызьөма — сийө төлка синь-
ясөн видзөдіс жө на водзө вощьөм помтөм эрдъяс выло
да долыдпырысь легөдіс ыджыда чикыльтөм бөжнас.

Найо муртса на петісны шочиник пожом сора кузь козя вёрысь да öні сулалісны джуджыд щелля рöчын. Улыи, кок увсяньыс доза пыдын, визула сяльöдчис ыркалём-сьöктаммём ваа нейджыд ю; ва веркөсöдыс, уна рёма чери сьём моз, кывтісны гылалём корьяс. А юыслөн паськыдкодь ковтысыс вöлі лайковмунёма катыдлань и кывтыдлань синмыд судэмөн ылöдз, да кузяла и пасьтала вöлі сійөс серöдёма зарни арлөн югыда öзйысь рөмьясөн, сэтшөм лышкыда серöдёма... И көть кымрасис да зэрышталіс ывлаыс, быдладорсянь öвтіс вöльнөйлунөн, помтём-дортём вöльнөйлунөн!.. А сэссия, содтöд ылө. улöдз öшйём кыз кымөрьяс костöд, быттё яндысигтырйи, быйкнитіс арся шонді, сьякнитіс мелі югөрьяссö зэрысь и лысваысь көтасьём вөр-ва ылө, и дас пөв, сё пөв югыдджык лои, быд вижөдём и гөрдөдём кор жар биён ыпнитіс-өзйис, быд лысва войт шонді киньён дзирдыштіс, и Биа-серьялөн помтём эрдьясыс водзö на паськалісны...

— Төдан, Катшыс, төдан, зонмө, меным мукөд дырйиыс жаль овлө, мый ме эг чуж тайö му вылас лэбачөн, шуам, варышөн. Мый, он эскы? Мый бөжнад легөдан? А вот чепөсийыны эськө öні тасянь вывланьö да и шывьявны-лэбны. Тэрмасьтөг лэбны став тайö мичлуныс весьтöд... Лэччылі тай ме карад видзөдлыны, кыззи Женяыд пырис да овмөдчис техникумас. Самолётөн лэччылі... И төдан, эг и вешйыв самолёт öшинь дорсьыс — кыззи сатшкыси, сідзи эг и вешйыв. Но сэтшөм жö нин любө видзөдны вылісяньыд арся вөр вылад! Сора вөра ю ковтысьясыс со тадзи жö сярвидзёны-ломалёны, дзик берег дорьяссö быттё венеч лентаясөн дорөсалёма, сы вöсна мый сәні сукджыка пипу-кыддзыс быдмө... А мыйта ю-шорыс! И быдөн аслас туйөд мунө... Ичөтджык кө, чукыльён-мукульён визувтө, петля ылө петля, мукөдлатыс весиг быттё гөрддзасьлём петляяс. А ыджыдджык кө ю — солиднөя шлывгө, ыджыд змей моз, телевизор пыр неважөн петкөдлісны, вывті ёнасö куснясьтөг...

И енмыс сэтшөм лөсьыда быдлаті гөгрөстөма да шыльө-
дөма, ю и ты, нюр и мыльк... И став тайё мичлунсө ми-
яны сетөма — ов да нимкодясь... Бурджыка ов өта-мө-
дыдкөд, эн юксы да пурсьы...

Сёрни сертиыс төдчис, мый Онё вөлі неуна гажакодь.
Сійө пуксис кызкодь пу краж вылө, кытысь ачыс жө
кульліс сямөдсө воддзаыссьө, гожөм помнас татчө волі-
гөн.

— Ок, кутшөм мичаа вижөдөма кражыс!.. Бур и ку-
зовьяс да чуманьяс ми керим тэкөд, Катшыс. Кувтөдз
тырмасны. Меным уна оз ков, өти кызтө көть и пөрөді..
Бур кучик кодь нюдз да ён сямөда кызд веськаліс... Че-
лядьлы на миян бөрын коляс, вотчыны ветлыны и йөв
да мый да видэны... Тэнад тө эськө, тыдалө, матын нин
нэм помыд да. Чожа пөрысьмыны пондін, дзор сіяс со
содөны и содөны.

Онё кыкнан кинас малалө сы дінө меліа ниртчысь
Катшысөс, сылөн нюкырмунө сьөлөмыс пөрысьмөм-шы-
лялөм понсө аддзөм-кылөмысь.

— Кулан да, кызди нө ме тэтөгыс понда овны, а?
Вердін-керин тэ менө. Вөрын медбур друг пыддиыс век
вөлін... Челядьөс вед тэ жө кышөдін и көмөдін... Вит пи
быдтөма лои, бура ли лёка. Ме өмөй өтнам верми эськө
тэтөг? Вөралысь мортыд? Да өмөлик понйөн кө? Тшыг
нисьө пөт ковмис эськө виньгыртны налы... А кымынысь
мездылін тэ менө, ошкысь ни көинысь эн повзьяв... И
мыйла енмыс тиянөс, пон рөдөс, сэтшөм дженьыд немаөн
лөсьөдлөма? Гашкө, уна котралөмысла регыдөн сотчан-
ныд? Али мыйкө тшөтш зэв унатор юрад кутанныд?..
Ог весиг и лысьт думыштны, кызди ме тэтөгыс понда
вөравны... Мый нө немтор он шу? Көнкө вед кызкө ду-
мыштчылан жө ас ногыд? Шуам, жаль жө вед лоө коль-
ны Биа-серья дорсьыд озыр прөмыса вөрьястө?..

— А төдан-ө тэ, Катшыс, мыйла сідзи нимтылөма-
ось — Биа-серья? Он төд? Немтор тэ, зонмө, он төд ас-
лад пон юрад, сёрнитны он вермы да... А аддзан, кызди

ниаясыс ӱэйӱны? Вижовгӱрд биӱн... Некӱн сӱссия матӱгӱгӱрын ниаясыс абуӱс, сӱмын тани... Но вот, буракӱ, локтӱс коркӱ татчӱ ме кодь жӱ вӱралысь. Гашкӱ, буретш тайӱ жӱ чурксяныыс видзӱдлӱс да и чуймис. Мичлунсьыс шемӱсмис. Да и нимтӱс юсӱ Биа-серьяӱн. А лӱссыда и нимтӱма, молодечӱ.. Коми вӱралысьясыд абу йӱйӱс, зонмӱ Катшыс! Сӱмын тай этшаджыкӱн ми пондӱм кольны. Водзтӱ ставӱн вӱравлӱмаӱс, а ӱни быдса сиктын ме ӱтнам коли. Старикъяс пӱрысьмысны. А менам тшӱтшъяяс, нелямын-нелямын сизим арӱсаяс, ставныс сетчисны техника дӱнӱ. ӱнджыкасӱ оз вӱравны, а куштӱны ягъяссӱ. Кысь пӱ сӱссия и зверь-пӱткаыслы лоны...

— Али ставсӱ тайӱс тӱ гӱгӱрвоан жӱ, Катшыс? Сӱмын висътавынӱс ӱн куж?.. А гашкӱ и, тӱ мейс на унджык гӱгӱрвоан... Вед тӱ мӱд ногӱн кылан и аддзан мирсӱ, миян дорысь ӱсӱджыка...

— Мый нӱ исалан усьӱм коръяссӱ? Кутшӱм дук тӱ наысь кылан?.. Видзӱд со, усьӱ и усьӱ корйыс. Но, видзӱд, усьтӱдзыс кутшӱма мичмӱдчӱма быдӱн, кысь-мый и сӱтшӱм рӱмъясыс петӱны... Гожӱмнас быттьӱ став рӱмыс ӱткодьджык — веж. А ӱни со, видзӱд, кутшӱм сӱмын и абу... Кутшӱм мичаа да лышкыда кусӱны коръя пуясыс... Да вед, шу, Катшыс?.. Дивӱ... Мед эськӱ и миянлы, тӱа-меалы, татшӱм жӱ мичаа да лышкыда кусны... Кор миян кадыс воас... А, Катшыс?.. Мыйта корйыс усьӱ... Тулысын чужис, а ӱни кусӱ... Дзыкӱдз кусӱм вылӱ усьӱ... ӱти гожӱм сӱмын и олӱс... И тайӱ сылӱн быдса олӱм, быдса нӱм... Тулыснас сӱтшӱм небыдикӱс мыччысьӱны коръясыс, кага ки кодьӱс. А ӱни, видзӱд, вижӱдӱмаӱс, чорыд сӱнъясыс лыбӱмаӱс, пӱрысь мортлӱн кияс вылын моз...

— Кыдзкӱ быттьӱ и гӱгӱрвотӱм ставыс тайӱ, Катшыс. Быттьӱ и жальӱс коръясыс... Но сӱдзи нин тай енмыс лӱсьӱдлӱма, али кодӱ эм сӱнӱ, вылӱас... Тӱвнад муйс пыдӱдз кымӱ, пуыслы некысь кыскыны васӱ, мед юктавын та мында корсӱ. И со — шыбитӱ найӱс. Сӱссия

тайӧ коръясыс сисъмӧны, вынсӧдӧны мусӧ, мед налӧн чужтысьлы, пуыслы, вынаджык муыс лон, мед выль коръяс сийӧ вермис лэдзны... Дивӧнад он тырмы... Мый ыжда удж вӧчсьӧ, Катшыс! Некодӧн тшӧктытӧг лӧня керсьӧ...

— И коллыс таво уна артмӧма, зонмӧ! Урыд эм!.. Ылӧдз-ӧ на воим трасса дінсяньыд, а куимӧс нин увтін тэ... А ур кӧ эм, и тулан эм... Ставыс, зонмӧ, йитчӧма ӧта-мӧдыскӧд... Вӧралыштам на ми тэа-меа!

— Ой, мыйкӧ тай нӧ шогӧдны пондӧс менӧ, Катшыс... Мыйла нӧ эськӧ? Этшаник и юыштӧ да? Ой, восӧдӧ...

Онӧ мыйкӧ дыра гуниктӧс на, восӧдӧмсӧ зӧлис кутны. Но эз вермы, ковмис копыртчывны ниа бокӧ.

— Эзв тай делӧ лонс, Катшыс... Но, зонмӧ... Юрӧй мыйкӧ бергӧдчӧ и... Эг-ӧ висьмы... Эз-ӧ мыйкӧ неладнӧ сӧйсьы менам? Онӧ эськӧ, зонмӧ, водка гулькнитыштны гоз-мӧдысь, мед сотыштӧс прӧстмӧм гырк пытшкӧсӧс. Но — кысь, кык доз босьтӧлі да абу нин. Ӧтисӧ ковмис механиккӧд юны, а мӧдсӧ шофӧрыслы сетӧ, кодӧ тай трасса кузяыс катӧдӧс тэа-меаӧс. Радпырысь на и сетӧ — вед дас верст гургӧдӧс миянӧс, та сьӧкта ноптӧ видлы кыскыны... Да и ӧнӧ, зонмӧ, сэтшӧм нин тай олӧмыс мӧдӧдчис — он кӧ мавтышт, он и мун. Шофӧрӧс кӧть кодӧс... Кодӧ вина доз виччысьӧ тэсянь, а кодӧ — дозмӧр либӧ шапка вылӧ ур... Но нинӧм — вӧр керкаад миян эм на спирт. Косьтӧм чӧд эм и... Чӧдья ляз сорӧн юа спиртсӧ да, ӧдийӧ бӧр бурдас омӧлик кынӧмӧй... Мыйысь нӧ эськӧ сийӧ бара торксис? Механикыс кос чериӧн вердӧс да сыысь али мый?.. Гашкӧ, сисьтӧм бӧрас нин пуктыліс косьтыны сирпиянсӧ?.. Чӧскыдпырысь на и сӧйи... Шома сур сорнад... Но, Катшыс, бара нин восӧдӧ!.. Вай, зонмӧ, джагӧник мӧдӧдчылам, керкаӧдзыд кызкӧ колӧ воӧдчыны рытӧдзис...

Шойччанӧнысь вӧрзис быттӧ мӧд морт — шӧрипӧв кусыньтчӧма сьӧкыд ноп улас, вежыньтчӧм чужӧма, нылӧдӧм кымӧсас лясӧм юрсиа, сьӧкыда кашкӧ, вуктӧдлӧмысла ӧтырышъя сьӧласьӧ...

Сэтшөм сьöкыд Оньöлы лои мунны. Но сийö тәрмасьö, тәрмасьö, усьö да чеччö да водзö мунö Биа-серья весьтöд чукльöдлысь ордымöд. Сылы некыдз оз ков сетчыны висьöмыслы, сылы колö воодчыны аслас керкапывсянöдз. Шоныдйнöдз. Неыджыд аптечка сылөн сәни эм и — тöндзия волігөн катöдліс, аспирин и фталазол, стрептоцид и... Быдторсö сәки, пиыс отсөгөн, водзвыв лосьöдіс-заптис кузь ар пом кежлö... Пес кералісны. Ком кыйисны да косьтисны. Весиг чöд вотисны да косьтисны. Гыркыс Оньöлөн, война дырйи быдмигад, слабкодь, да косьтöм чөдйыс бура отсавлö...

А вöрыс пемыдджык лоис, көть и абу на сёр. «Лун тöлыс вочасөн рытлань бергöдчö», — казяліс Оньö. Ёнмис и ёнмис тöлыс. Пыр азымджыка пызйысь зэрыс öтарö гырысьмис да кöдзалис.

Тöлыс нин чаййö-косялö вөр-пусö. Ырыштчас-пöльыштас, лёкысь сыныштас кыддза-пипуа чукöрысь лыдтöм кор да и нөбөдö-гартö. Быд ув куснясьö-пессьö, быд кор шпорöдчö, быд лыс дзенкакылö. Дзуртöны пуяс. Сьöкыд гыясөн клёнöдчö ю, көть и векныд, небось тай гыалö... Шустöма краждöдчöны шочиника усьысь пуяс. Дерт, пöрысьджыкъясыс, кодъяс ловъя вывсьыныс нин пондисны косьмыны, нярмис вуж-сöныс...

Сылөн, Оньöлөн, талун со нярмис жö быдлаті, восöдігад тай регыд пыдзыртчö выныд... Но та йылысь оз ков думайтны... Ок, кыдзи муралö тöлыс, кыдзи чаййö-песö көтасьöм пармасö... Кутшөм вын колö пуыслы, мед не шедны-мынны мусьыс... Ставсö кодкө артыштöма бура: колана мында вуж, колана кызта и... Колана пыднаöдз суйöма быд вуж... И шыльыд лыскö озджык кутчысь тöлыс, шливснитö... А корья пуяс со ар кежлас, кор медьёна пöльтöны тövьясыс, кушалöны... Тулыснас кушöсь на и, кор лёк тövьясыс тадзи жö вермасьöны... А зэрыс тай пыр кöдзыдджык и кöдзыдджык лоö... И вöрыс зэв öдйö пемдö, торйөн нин рытив-войла дорыс. Кымөрьясыс сыладорсянь, сьöд бурыся ужъяс моз, тövзьöны-скачитö-

ны, — казяло Ўньо. — Мыйта татшом ужеё вётлас ярмом океан... А сэсся, буракё, Войпель вувзьясыс... Зэр пыддыд сійо вермас шлякаён пөвсыштны... Вермас и кам кынтыны... Ой, кызкё колё воёдчыны керкаөдз!.. Верст нельо-вит колис... Тшак ва, ён кокөн кө... А сълён, мудз төдлытөм Ўньолөн, талун дзикөдз рушмисны кокъясыс... Восөдөмсыйс... Да юр дурмөмсыйс... Немысь-немтор нин абу кынөмас, а век өтарө лёкысь гугөдө... Ёна тай мыйкө-кертсьома... Отравиччөма... Лёк черинад... Тшыкөдоны сөмын добрасө... Кутшөмкө ва тай кыськө век пыдзыртчыштө-а... Уджалысь кынөмыс, буракё, засө яй-сөнсьыс кыскө... Тадзинад вед став ваыс вир-яйсьыс вермас пыдзыртчыны... Мый нө сэки лөб? — повзьо Ўньо.

Зэрөмысла кизьөрмөм му эжа сөйин сійо вильдө да усьо. Эбөстөммөмтө сьокыд нопйыс жамкнитө вывсяньыс, личкө. Ўньо оз вермы чеччыны, борсьо-тривкйысьо коньөр моз... Сэки гөгөрвоысь Катшысыс уськөдчө көзьяныслы отсөг вылө, боквыв пурө-нетшкө нопсө... Одва и мынтөдчө Ўньо тайө чөссьыс... «Нопнад ме ог вермы воөдчыны керкаөдз! — гөгөрвоө сійо. — Колө кольыны татчө нопсө...»

Ўньо суйө зептас гоз-мөд сукар тор — өд код төдас на, мый вермас лоны, кызкө-мыйкө ошөдө нөпсө коз увйө.

— Нинөм, Катшыс, аски волам... Оні мянлы колө өдйөджык воөдчыны керкаөдз... Шоныдінөдз... Лекарство юны...

Сійо горша юис шорысь чибльөг тыр ва. Но мыйкө мында муныштөм бөрын выльысь ставсө восөдис мортыдыльсь...

— Зонмө, Катшыс, немтор оз кутчысь гыркө... Но — беда... Вирөдз, тыдалө, йиджөма лёк заразаыс... Кывлі ме — чери пытшкын да тшак пытшкын пө кутшөмкө яд вермө артмыны, кужтөг кө дасьтан найөс... Буракё, зонмө, Катшыс, сы шөрө ме и веськалі... Но нинөм, Катшыс... Огө на жө дзикөдз сетчөй ми тайө висьөмыслы...

Абу на лямбөм старикъяс ми, нелямын сизим арöснад...
Водзö, зонмö...

Оньюлөн, буракö, жар кыптис. И пыр восöдис сийöс.
Усиг-чеччигтыр öдва довгис сийö. Асьсö ышöдöм могысь
öтарö пыр мыйкö киргис-сöрис...

А гөгөр муралис төв. Көдзыд зэр сора төв. Быттьö
мыйыськö ёна скöрмöма вöли вөр-ваыс. Сэтшöма скöрмö-
ма. Быттьö мыйыськö, нöшта на ыджыд лекторйысь, кöс-
йис öлөдны вöралысьсöс. Мыйкö висьтавны кöсийс, но эз
куж мортлы гөгөрвоанасö шуи...

Биа-серья бокса керка ягö Онью каттысыс-каийс нин
нель кокөн. Öдва ловъя. Ковмис кö мунны нöшта верст
джын, сийö эськö эз нин вермы.

Ёна и гажа яг тани, Биа-серья нöрыс йылын. Яла
нитшка. Пожöмъясы!..

— Но, зонмö, Катшыс, воөдчим...

Катшыс долыдырысь чепöсийс водзö.

— Котöрт, зонмö, котöрт... Гажыд вед, көнкö, ёна жö
нин бырис... — Катшыс друг увтыштис, кызкö гөгөрвотö-
ма увтыштис. — Кодкö эм али мый керка динас?.. Гашкö,
кодкö, ылалөм морт, узьмөдчис?.. Но мед, мед... Тöрам...
Татшöм керкаад унаөн тöрам... Но чöвлы, чöвлы, көнi нö
керкаыс?.. Ог тай нö аддзы... Эг-ö тшöтш и тамышмы ви-
сьöмысла?..

Пожöм динö вынтөг лясмунөмөн сулалö Онью, видзö-
дö, но оз аддзы муса керкасö. Синьяссö тильö Онью —
нбылөмысь да зэр ваысь косöдö — да бара видзөдö, но
некызди оз мыччысь керкаыс.

Абу керкаыс!

Онью уськөдчö котöртны нораа тьякйөдлысь Катшыс-
ыс динö, кысь-мый и выныс шедö висьöмысла унежитчөм
вир-сöнас. Котөрөн воö... Но гажа керка местаын куш
сöмын пöим чукөр рудөдö...

Быттьö абу и вöвлöма сылөн керка-пывсяныс. Шоныд
позйыс сылөн. Кытчö сийö сэтшöма тэрмасис. Весиг ноп-
сö колис. Кодi сылы, воигчöжыс, му выв райөн кажитчис.

Көні сылөн сёян и кос пес мыйта колө вөлі. Лекарство и весиг спирт. Абу вед урөс вөралысь сійө, Оньө, төдө, мый колө кузь да көдзыд арбыд кежлад. Ставсө водзвыв дасьтис, писө отсөг вылө вайөдліс.

Оні со ставыс тайө сотчөма. Кодкө сотөма керкасө!

Сулалө Оньө. Неқыдз на оз эскыссы сылы, но некыдз! Нюкыртчөмөн сулалө сійө пөим весьтас. Немтор оз вермы шуны, синваыс сөмын доршасьө вөралысьлөн. Коркө, зэв нин важөн, тадзи жө сулавліс мамыс гу весьтын — зэв томөн кувсис мамыс, война кадся сьөкыд олөм чишкаліс сійөс.

— Көнкө, лөсьыда и ыпйис, — шуис сөсся матөвоөм Оньө. — Сэтшөм мича да сирөд пожөм керьясысь вед тшуплі ме сійөс... Мыйта жарыс, көнкө, вөліс, ставыс сідз вошис... Вот эськөн көть неуна өні меным... Шонтысьыштны да косьтысьыштны... Дзыкөдз көтаси... Көдзалөма нин пөимыс... Гашкө, киссьөм гор улас эмышт на кутшөмкө жар?..

Оньө нюкыртчөмөн собыштіс вылісяньыс көтасьөм но уліас пурсьялысь пөим пытшкөд, матыстчис кыдзислөрө пузувтчөм из чукөр дінө. Көдзыдөсь нин изьясыс. И на улын некутшөм жар абу. Вежон сайө сөмын и эз вола-а. Буракө, сылөн лэччөм бөрын пыр жө и сотөмаөсь.

— Кодлөн нө кыис лыбис татшөмтор вылас? — шензьө Оньө. — Да вед и аптечкаыд сотчис. Мый нө ме өні кута вөчны, этатшөма висьми да? Ноптө со эновті и...

И друг повзис сійө, сэтшөма повзис! Повзьөмысла ли мый ли Оньөөс пондіс восөдны воддза дорсьыс на ёнджыка. Сідзи и нетшкысьө гырк пытшкөсыс голя розьөдыс. Тімбыльтчис Оньө ва нитш вылө, пондіс туплясьны и тривкйысьны кувмөн ранитчөм ош моз. И понйысла, буракө, голя помөдзыс жө гажтөм лои — пуксис да пондіс көин моз омлявны зэр сора төлысла воча. Сөсся Катшыс матыстчис гатшөн пласьтвидзысь көзяиныс дінө да пондіс нювны сылысь чужөмсө.

Онъо быттё неуна сайкалыштис таысь. «Колё эськё лэчывны берег дорё да ваас юрёс суйлыны, — кельыда вуджортис вежорас. — Унджык юны васё колё... пожъ-явны гыркёс...» Но сэк жё Онъо тёдис, мый выныс оні оз тырмы тайёс вёчнысё, мый вермас пёдны ваас.

— Би! Медводз колё пестыны би! Дась югыднас колё чукёртыштны пес... А то войнас ньёмда...

Нель кокөн моз кысьясигтырйи сійё пондис ёктыны косджык увьяс. Оти сайын чирсийс да сюялис вомас шочиник пув розъяс — мед коть нин шоманас сувтёдыштны восёдёмсё... Увьясыс сылы эз на и ёнасё сюравны, сы вёсна мый гумла кодь сёстём вёлі ягыс. Да и керка гёгёрсё сылён, бур кёзяинлён, важён нин вёлі бура весалёма. И сулалысь пожомысь он небось чуктёд кос увтё — сись кодь шыльыдось найё, туганас сёмын шапкаасёмаось увьяснас. Со кор сійё матькыштис налён мичлун вылё...

Но кызкё-мыйкё Онъо ёктыштис мыйтакё пес вемёдзыс кётасёом, кок улын нельсмунысь ялаа яг вылысь. Кульыштис сямёд берегдорса медматыс кыддзысь. Лёсьёдис коз улё тёв сай, паськёдис кётасёом куртка пёлаяссё, пытшкёс зепсыс судзёдис истёг, тиралысь чуньяснас перйис истёг тув. Варттёдзыс первой видзёдліс сы вылё. Тувйис вёлі арся турун сі кодь вёсньыдик да омёлик, и помас сир чутыс муртса тёдчыштис. Татшёмтортё казялёмысь Онъёлён ыркмунис сёлёмыс. Сійё тэрыба восьтис кёрёбсё да видзёдліс мукёд тувьясыс вылё. Ставныс найё вёліны сэтшём жё коньёр кодьось. «Татшём истёгнад он и вермы перйыны битё, — мёвпыштис повзьёмён, — эштём ва дырйид... Гёз-мёдысь чирснитис. Истёгыс ёдвакывмён чушнитис. сэсся, би петавтёг, бёр ланьтис. Мёд тув — сідзи жё. Кёймёд... Пыр ёнджыка Онъёлён тиралисны чуньясыс. И вынтём лёглуи кыптис. Кутшём истёг вёчоны... — А водзті, помнитё сійё, войнаёдз на, истёг тувьясыс вёліны кызось, ёнёсь, сирыс на вылын — пув тусь кодь, вартан да, ыпнитас сэтшём яр би... — А оні

нө мый — тыпу!.. Отияс керка сотоны.. Мөдъяс — со кушом истогон йөзөс помалоны.. Тыпу!»

Быдса көрөб варталис Онью, но раз-мөд-коймөдысь сомын и петавлис ловья биыс. Но и сийо, вывти жеб да, эз вермы кутчысыны котасьом суюмод диню, коть эськю и водзвыв вöсньыда вöли кильюма сийос.

Медбөрья истогнас гирснитом бöрын сийо омльыштити-матькыштити, ляскөбтити тыртөм көрөбсө, чеччыштити кок йылас да, коляс вынсө жалиттөг, помтөм логлунон кутис майкны-талявны көрөбсө медмустөм дзодзулос моз.

Сылон нөшта на вöли оти татшөм жө көрөб — мөд зептын, вөрө сийо некор эз петавлы истөг запастөг, мед коть и керка-пывсянас мунигон, кони сылон век жө эм.. Но тайо истогыс выло Оньюлон воши став надея.

А ёна нин рөмдис. Колис тәрмасыны бинас. Мыйкө колис вöчны.

Висысь и кынмысь, дзикөдз эбөстөммөм, логлунон ымралысь сьолөма, сийо муртса эз бөррдзы ыджыд гөлөсөн төла зэрөн муралысь, вемөдзыс котасьом парма шөрын.

Но эз бөррдзы, гашкө и яндысис Катшыссыс.

— Онью, мый нө тэ, зонмө.. Онью, өвсы.. — мөд мортос моз пондис такөдны асьсө. — Зырымбедь али мый тэ, мед тадзи лябмыны.. Вай лючкиджык мыйкө думыштылы..

Сийо пуксис козлон кыз вуж выло, мыджсис мышнас чорыд кырсь диню да кызкө-мыйкө мырдысьон пондис лөньодны асьсө. А кор сөсся сайкалыштити пикө воөмсыс, медводз ясыдмис мөвп:

«Керка дорын би меным не пестыны. Чер абу... Сотчөма.. Да коть и вöли — вөдитчынысө сийон выной эськю эз тырмы..

Сидзкө нө, мый? Мый нө вöчнысө?.. Зэрыс тайо регыдөн оз коб.. Сөсся, буракө, кынтас, төлыс вочасөн войлань бергөдчө..

Колө би!.. Би колө!

Колө кыссыны яг помөдзыс, шор дорөдз... Сэни увъяджык пожөмьясыс... Кос увьяс чегъявлыны... Да и яг вывсыс өттор-мөдтор сюрасджык... Сэтыс эг на новлыв ме пессө...

А ог кө вермы öзтынысө и сэни? Сэки мый?..

Өткодь гегдынысө сэн көть тан...

Чөвлы-чөвлы!.. Да өд сэни эм зэв ыджыд кодзувкоткар... Да!.. Гырысь козьяс улын... Кодзувкотьясыд тай абу жө йөйөсь — кужоны бөрийны аслыныс местасө: мед, кор колө, и шондi пөжис, но сэк жө и зэр эджык веськав...»

Онью кыссис яг помөдз. Матыстчис кодзувкоткар дiнө. Рөмыдас сийө сулалiс көр видзысьлөн чум кодь.

«Ковмас, тыдалө, пузувтны налысь карсө... Пытшкөс ыс сэни кос... Биыд пырысь-пыр чажнитас... Менам керкаын моз... Дерт, уна ловья лов пөжасяс... Гашкө, миллөн... Тайө мича ягсө видзысьяс... Гашкө, налөн нөмөвөйся олөм-уджалөмысь и лоис татшөм мича вөрыс... Пожөмьяссө чужөмсяныс дөзбөритiсны найө... Эз лэдзны жөритны быдсяма лельөыслы...

Но меным некытчө воштысьнысө... Некытчө!..»

Падмыштөмөн сулалыштiс Онью. Немся кодзувкот эз тыдав. А неважөн на, кос дырйи, помтөг визьялiсны да тiрьялiсны найө тани. Онью малыштiс лыскөсь-розбөсь карыслысь боксө — сийө вөли зумыд, чорыдкодь и быттьө овтөм. «Эз-ө эновтны найө важ позсө?» — весиг мөвпыштiс Онью асьсө такөданаа.

Но сийө төдiс: эз эновтны, а кузя зэрөмсьыс, а гашкө и локтан кодзудьяс кылөмысь дзевсисны найө асланыс пыдi жырьясө.

«Сөмын карыслөн косыс да шоныдыс вермас мездыны менө!» — öнi дикөдз нин дугдiс падъявны Онью.

Дерт шуам, мөдджык кадө кө кодкө мөд сылөн син водзын пузувтiс тайө карсө, — сэки Онью, буракө, вермис эськө лыйны татшөм пакөститчысьсө.

Но öнi сылөн эз вöв мöд петан туй. Сийö эз на кöсийн нинöм кертöг водны да гегдыны гут моз...

Онью пондiс чегъявланы пожöмъяслысь улыс кос увьяс да шыблавны кар дiнö. Пöшти быд чегигөн сийö жнiпкысльiс му бердö увийскöд öтлаын, но кызкö-мыйкö бөр чеччылис да став сьöктанас öшöдчылис выль чорыд увийö. Сэссия и тöлка Катшысыс, буракö, гөгөрвоис сылысь зiльöмсö, матыстчис да кутiс ниртчыны — вай пö метшöтш отсышта... Тагысь Оньюлөн бара на чепöсийлис синваыс. Мыччис сийö Катшыслы кызкодь ув. Мöдыс курччис лэчид пиньяснас да и пондiс нуны.

«Но, Катшыс! — весиг ачыс шемöсмис Онью, кöть эськö и понийс не этшаысь нин мездывлiс сийöс. — Кодлыкö кö висьгалан, оз и эскыны... Со тэныд и кывтöм пемöс...»

Первойсö Онью кöсийс пузувтны кодзувкоткарсö, мыйтакö перйыштны сэтысь кос жуг-жагсö, куш сöмын би öзтöм вылö. Но дыр-ö тырмас сылөн пескыс? Увторьясыд? Кузь арся войнад. Зэра войнад... Нинöм он вöч, ковмас дзоньнас öзтыны карсö. Сэссия и сийöс, грекыд вылö, тэчöмаöсь кыз пөрöм пожöм бокö, абу на дзикöдз сiсьмöма сийö. Öзтан кö карсö, пожöмыс войбыд пондас шлонгыны...

Отитор сöмын бурöдыштiс лөктор вылö ырыштчöм вöралысь Оньюöс: бисö öзтöм бöрын унджык кодзувкотыс, гашкö, удитас пышйыны...

«Сöмын вермасны-ö найö, горттöг кольöмаясыд, кынтавтöдз лöсьöдны аслыныс выль оланiн? Али вöзйысясны патераö кытчöкö асланыс вокьяс дiнö?...»

Онью тэрмасьтöг бура лöсьöдчис би перйиг кeжлö. Сюмöд дасьтiс. Сирöд чаг вöлалiс пуртөн смольö мырысь. Думыштiс да шуис видлыны öзтыны бисö лөк истöгтöгыс. Патроничасьыс судзöдiс вит патрон, перьялис наысь дрöбсö. Пороксö öтилаö чукöртiс. Пузувтiс кодзувкоткар — сирöд көрөн и косөн оньыштiс сэтысянь. Кос лыс көрөн. И кутшöмкö шуксьöм-ноксьöм кылис пыдiсянь-

ыс. Но вөралысь öнi эз нин думайт татшöмторъяс йыв-
сьыд...

Сылы колiс Би. Сöмын Би!

Сирöд косiнас Öнью бура тэчис сямöд-чагсö, содтöд
вылö порокөн киськалiс. Мед нин öддзас да оз кус. Сэс-
ся и лыиис сэтчö дрöбтöм зарадөн.

Взрыв моз ыпнитiс сукмём нин рöмыдас яр би. Пон-
дiс третшкöдчёмөн нялыны. Вөралысь радпырысь горö-
дiс. Пондiс шыблавны сэтчö кос увъяс. Сэтшöм гажа ло-
ис. Мед олас Би!

Но и казялiс Öнью, кыдзи кыськö друг сявгысисны
кодзувкотъяс, гырысьсöсь, пемыдгöрдовöсь, да и пондiсны
люзгыны öтар и мöдар. Жальöсь найö вöлины Öньюлы.
А нöшта жальджыкöсь вöлины найö, кодъяс, коз пупытш-
са ёдмём сир моз, тричкöдчисны жар быын. Но мый сi-
йö вермис вöчны!..

Сэссия Öнью лэччылiс шор дорö да мырдысьөн юис
пöшти чуман тыр ва. Чуманъяссö сылөн водзвыв дасьтö-
ма быд шор дорö, мед век вöлины дасьöсь... Оз пыр, а
юö кöдзалём нин нюр дука васö, юö и юö. Сэссия выль-
ысь гумовтiс чуман тыр да бөр довгис долыда пессьысь
билань. Муртса удитiс воны, кыдзи сiйöс бара восöдiс.
Ставсö бөр восöдiс, немтор оз öшйы кынёмас... Но и мед.
Мед пожъясьсö гыркыс...

Водiс Öнью ныв лапъяс вылö. Руасьö ва паськöмыс.
Ок и бур, мый сiйö шедöдiс Би...

Век на зэрышталö ывлаыс — шливгыштас-коблас, сэс-
ся бара. Тöv муралö. Козъяс улын сiйö, и ёнасö оз кötöd
вылiсянныс. Неуна сöмын войталö, кузя зэрöмысла тук-
тöмаöсь козъясыс да. Но век нин сайöd. Бур местаö тэч-
лöмаöсь карсö кодзувкотъясыс. Катшыс орччөн куйлö,
немтор оз шу. Шонтысьö жö би дорын. Кынём сямалём
вылас оз норась. Гөгөрвоö. Аддзылiс öd, кыдзи нопсö
колисны. Нопнад эськö эз вермы воöдчыны Öнью. Он öd
тöd, он думайт, мый татшöмтор вермас лоны...

Онӧ судзӧдіс зэпсыс сукар торъяс, шӧрипельӧ юкис да джынсӧ сетіс Катшыслы. Коляссӧ бӧр суйис питшӧгас — аслыс ньӧти эз ков сӧйнысӧ... А Катшыс чӧскыд-пырысь калскӧдіс-сӧйис. Сылӧн кынӧмыс оз вись, некор оз вись. Винаӧн да сись чериӧн оз жугӧд сийӧ кынӧмсӧ. Пиньясыс со сакар кодъ еджыдӧсь и, а кузь кывийс би кодъ гӧрд да сӧстӧм.

Ок, шоныд. Ок, лӧсьыд!.. Мый вермас лоны донджыкыс Биысь, татшӧм зэра да кӧдзыд войнад сьӧд вӧр шӧрын? Да ньӧшта висьмӧм-укшалъмӧмаыдлы?.. Одвакӧ Онӧ дорысь ёнджыка радліс сийӧ мортыс, коді медпервойӧн му вылас шедӧдіс бисӧ.

Катшыс мышкас моз сылы водіс. Сийӧ оз кынмы, мышсяныс шонтӧ кӧзьяинсӧ, гӧгӧрвоӧ сылысь висьӧмсӧ. Ёна жӧ тӧлка пон.

Шома пув тусьяс нямялыштіс Онӧ, пес чукӧртигӧн ӧктыштавліс. Шомыс бур ногӧн сотыштіс ваӧн пожъ-ялӧм гырксӧ. Лӧньыштлис быттӧ вӧсӧдӧмсыс... Ыджыд би жайгӧ шоныдӧн, кынмӧм вемӧдзыс йиджӧ. Ок, лӧсьыд! Немтор сӧсся оз ков Онӧлы. И дзикӧдз сетчӧ сийӧ би шоныдлӧн мелі сывъяслы, оз и тӧдлы, кызди унмовсӧ.

Сӧсся веськалӧ сийӧ аслас керка-пывсян дінӧ. Ок, лӧсьыд и керка! Нӧль во сайын на тшупліс шылъыд пожӧм керъясысь, чача кодъ... Керъясыс со абу на воймӧмаӧсь, сир сорнас сӧмын на и удитӧмаӧсь неуна банйыштын ортсысяныс, бура гогналӧмаясыд...

Кӧкъямыс кер судта — сувтсӧн позьӧ веськӧдчыны пытшкас. Йирк вылас — дас вит йыв кер. Сӧсся — кык кыз чурка вылын сигӧр кер. Тадзинад крут пӧката вевтыс лоис, зэрыс и слӧтыс бура исковтӧ вевт-вывтіыс, тулысын ульдӧм лым и. Любуйтчан-нимкодьянтор артмис сылӧн! Быдысь воигӧн томдырся невеста-гӧтырыскӧд быттӧ аддзысьлӧ, сӧтшӧм любӧ да долыд овлӧ.

И керка пытшкӧсыс ыджыд да лӧсьыд. Полок вылас наросьнӧ пипу пӧвъяс лӧсйис — шоналасны да, аслыспӧлӧс свежӧй кӧр сетӧны найӧ. Горъяс медбур изъяссӧ

корсяліс да ваяліс. Сёян да зарадитчан пызан. Косьты-сян тувъяс. Ставыс эм, мый колө...

Ёна и шоныд артмис, майбыр! Ёна жö лөсьыд лечитны кöтасьöм-кынмалöм бöрын ёнтысь костö да юкальсь кокъястö. Водзвыв ваялас небыд ныв лыс, бура вольсала полök вылö. Сэссия жара ломтас кыз да пипу пескөн.

Онялö кос жарыс!

Сэссия и пöрччысяс Оньö куш пасьтöг да водас небзьöм-пöсялöм лыс вылас. Шоны-ыд! Ньылöмыд шорөн петö-визувтö. Но абу сьökыд тэныд. Пöсь сынöдыс кос, ловтö ворсöдö, мудзöмтö и висьöмтö вöтлö. Куйлö тадзи Оньö войбыд, райын моз. И быттö выльысь чужöма кодьөн лолö.

А аскинас шойччан лун вöчас аслыс. Оз тэрмась. Шоныдсьыс абу окота петны — войбыдөн этша и кöдзалö керка-пывсяныс. Куйлö чöла, лун пуксьöмсö кывзö-видзöдö. Со öдзöсын тыдовтчö лöz кодзув — идзас сi төрмөн розь сэтчö кольöма, вуг дiнас. Сiдзкö, югдыны заводитiс, югыдыс сэтi писькöдчö. А со нин и нейджыд öшиньыс югыдлözөн лoис. Йиркын дзирдыштiсны жарысла сöдзтысьöм сир войтъяс.

Бур, мый сiйö эз дышöдчы да лэптiс татшöм керка-пывсянсö. Воысь-во сiйö пыр ёнджыка кутас қовны. Öд нэм джынлань пондiс матыстчыны Оньö. Ёнджыка нин мудзны кутiс. Коскыс пыр частöджык лыйыштавлö и. Чöс туйясыс вочасөн быттö нюжалöны... Бур, мый эм сылөн татшöм шоныд позйыс!

Код тöдас, мыйысь садьмис Оньö. То ли кöдзыдысь, то ли бара восöдны кöсийöмысь, то ли чужöмсö гөгөрвотöма гильöдöмысь. Восьтiс синсö, пожöм туганъяс костысь казяліс югыд кодзув. «Но, сiдзкö и збыль войтöвтöма...» Зэр эз кыв. Тöv лөньюма и. Но сы пыдди ёна кöдздöдöма. Мыйыськö ёна гиляліс чужöмыс. Сiйö малыштiс, и ки пыдöсыс вильснитiс чужöм вывсьыс. Оньö повзьöмөн пуксис и казяліс шемöсмöданатöр — сы вывтi билань вуджöны кодзувкотъяс. Зэв уна кодзувкот! И бокитыс му-

нөны... Пемыдгөрд гы моз... Тэрыба мунөны... Биө пырөны... Вєськыда биө ыльгысьөны...

Войнас, көдздөдїс да, найө, буракө, пондїсны кынмыны позтөгыд. Мукөд каръясас, гашкө, эз лэдэны найөс, не ас йөзтө. А гашкө и, налөн абу сэтшөм модаыс, мед йөз гортө пырны. И со — чепөсьйөмаөсь бөр асланыс карлань, быдладорсянь скач люзыгөны. Весиг сы вывтї, Оньө вывтї, люзыгөны. Оз курччасьны, оз сотны асланыс кудзөн. Сөмын люзыгөны-котөртөны. И вєськыда биө пырөны. И третшкөны-сотчөны. Оньө первойсө чайтїс, мый чиш-касьөм яй дук пондас пөдтыны таысь. Но эз. Төлыс сы вєсьттї нуө тшынсө, и некутшөм яй дук оз кыв. Сотчысь сирлөн мырдыс бытгыө сөмын кылө.

А сэсся Оньөлы не наөдз лои, сы вөсна мый бара пондїс гугөдны гырксө. И мышкыс сылөн изөймитөма-кынмөма... Оньө кыссьыштө джынвийө сотчөм, но бур жарөн ымралысь кар дїнө, муртса дзоньнас оз пыр сэтчө кодзувкотъяскөд өтлаын... Сылы колө сөмын шоныд! Шоныд!.. Сэсся немтор оз ков... Оз кө ло шоныдыс, сылөн пырысь-пыр жө кусас дөбелькиөдз бонзьөм лолыс...

И өд вєськалө Оньө шоныдїнө. Зэ-эв шоныдїнө! И пырысь-пыр жө петө сы пытшкысь лөк висьөмыс. Бөр сэтшөм нимкодь лоө овны!

Но друг кыськө сы водзын лоө старик. Гөгйөдзыс тошка старик. Кузь беддя. Зымкнитө старикыс бедьнас Оньө водзын да лөкысь горөдө:

— Тэ нө, изьверг, мый вөчин ловъя ловъясыскөд?! Ме жө быд ловъя лолөс чужтї му вылас сы могысь, мед сийө керис кутшөмкө да кутшөмкө удж. Быдөнлы сетї ассьыс уджалан сям. А тэ менсьым өтпырйысьсөн миллион лолөс жаритін. Кылан он, изьверг, ловъя вывсьыныс пөжалін! Миллионөс! Быдса миллионөс! — гожся гым моз горөдїс старик, и садьтөг повзьөм Оньө чеччыштїс узянїнсьыс. Гөгөрвотөма видзөдлїс паськыда шлонгысь кодзувкоткар вылө. Но өнї сәні немся ловъя лов нин эз вөв. Гөгөрыс сөмын сярвидзисны биас вөтөдз кулөмаяс.

Мед не аддзыны найӧс, Ӧньӧ, кезниталігтырйи, кӧтіа кок-нас вешталіс найӧс биӧ. Сэсся шонтыштіс мышсӧ да бӧр водіс Катшыс дінӧ.

— Кодӧс нӧ эськӧ ме аддзылі, зонмӧ Катшыс? — вӧтсьыс век на сайкавтӧг шыасис понмыс дінӧ. — Эстшӧм ыджыд тошка да скӧр старик. Енмыс али мый сэтшӧм?.. А гашкӧ, тайӧ Сьмертыс нин воліс ме дорӧ да?.. А, Катшыс?.. Немтор эг и слӧймы вочасӧ шуны, сэтшӧма повзи да... А коліс эськӧ мыйкӧ шуны... Мися, эг тешитчӧм могысь ме ӧзты кодзувкоткарсӧ... Керкаӧс сотӧмаӧсь... Висьми со... Мед эськӧ сійӧ, збыльысь кӧ быттӧ Сьмертыс и эм, бурджык корсьліс керка сотысь пеж йӧзсӧ... Да найӧс мыйкӧкертіс... Ой, кӧдзыд, Катшыс!.. Ой, кырма... Вирӧй йизьӧ...

Асьсӧ выныштӧдӧмӧн, пиньяснас зяткакыліг да лӧвтігтыр, Ӧньӧ пондіс чукӧртны бисӧ паськыда ӧгралысь колода дінӧ. Бур на, мый карнысӧ кодзувкотьясыс вӧчлӧмаӧсь буретш сы дінӧ!.. Жуг-жагыс ӧдійӧ и ыпнитіс, пывсян жарӧн моз дзенӧбтіс Ӧньӧӧс, шоналіс сійӧ и пырысь-пыр жӧ бара вӧйтчис шемӧсмӧдана вӧтӧ... А стӧчджыка кӧ шуны — вемӧссӧ, збыль вӧлӧмасӧ выльысь кутіс аддзыны вугралігсорыс.

Быттӧ сійӧ том на, кызь нель арӧса, армияын служитӧм бӧрын петӧ Германияысь. Польшаын тыртчисны да вежисны самӧкур вылӧ штамповка-часіяс. Топыдакодъ юисны, и Ӧньӧ висьмис, сэтшӧма кватитіс кынӧмсӧ. Мытӧн муно и восӧдӧ. Ӧнія моз жӧ восӧдӧ... И мыйлакӧ ӧтнассӧ... Кутшӧма эз лэчитны ӧртъясыс — сола винанад и быдторӧн, но немтор оз отсав. Сылӧ и кусӧ Ӧньӧ!.. Лосис муны санвагонӧ, яндзим кӧть абу. Ӧтносӧн сэтчӧ веськаліс быдса эшелонысь... Сәні эськӧ и кутісны юктавны лекарствоӧн, но торксьӧм гыркыс некыдзи нин оз вермы сувтны... Садьсӧ воштіс сэсся салдат, оз и помнит, кыдзи чечӧдӧмаӧсь поездысь госпитальӧ... Сизим сутки чӧж некутшӧм сәян эз суйлы сәки вомас Ӧньӧ, куш сӧмын лекарствояс кыдзкӧ-мыйкӧ нъылаліс. Кӧть и бӧр

нин сәсся воис саяс, но оз ков вөлі сёяныс — эм көть абу... Мед не лэдзны кувны — глюкоза сылы пондiсны суйны. Весътас, кокшаяс йылын, цилиндръяс сулалёны, задъясас кыз емъяс сатшкөмаосъ да и качайтёны глюкозасо... Лядвейяс пырыс вердёны сийос!

Сәсся мичаник сестра пондiс воливны Оньё дiно кизьёриник риса рокөн. Со тай быттё бара на воис сийё, пуксис крөватъ вылө, мелiалө шоньд кинас Оньольяс кымөссө. И сёрнитө сэтшөм мелiа, кевмысяна моз:

«Андрей, да хоть у меня-то ложечку каши откушай...» И Оньё кывзысьё мича нылыдысь — паньыштө роксө да мырдысьөн кылөдө... Пузчужөм кага моз выльысь велөдчис сёйнысө Оньё!

Кызь өти лун да вой куйлис сийё тадзи. Сәсся тай кызкө-мыйкө бөр жө сувтiс кок йылас том мортыд. Но гортас воис мөдар югыдысь петөма кодъ на омөлик. Повзьөм чоя-вокаыс өдва и төдiсны ассъыныс ыджыд вокнысө...

Тайё казътылөм-вөтыс тошка старикысь не омөльдзыка повзьөдiс Оньёос. Сийё восьтiс синъяссө, ырмунис-лэптiс юрсө.

— Оні нө сiдзи жө али мый ме висъми, зонмө Катшыс? Сiдзи кө вед — прөпадътыны меным лоө... Лекарствотөгыд... Ывла вылад... Со кутшөма кодздөдөма... А гортын кутасны думайтны, мый лючки да бура вөрала ме... Нинөм тай нө оз тыдав, Катшыс, гөгөрсъыным... Эстшөм ру лэдзөма... Еджыд вурун пытшкынөсь быттё тэа-меа... Сэтшөма кодздөдөма... Ы-ы-ы!.. Но дивө!.. Кысь нө татшөм руыс?.. — Оньё лөсьөдыштiс би, вешталiс пөймөн эжсьөм жар вылө кодзувкоткар колясьяс да ув помъяс. Би гажаа ыпнитiс, югдөдыштiс гөгөр, но кыз ру пырыс ылөдзсө эз вермыны писькөдчыны югөръясыс. Оньөлөн видзөдласыс уси ва тыра чуман вылө. Копыртчис, көсийс видлыны чунь помъяснас васө, но гыж улас зяткакылис йи, гашкө, чунь кызта йи! — Бура тай уджалөма Войпельыд, Катшыс!.. Нс кысь татшөм ру-

ыс, көтө сө пуртөн вундав... Аа, гөгөрвои... Муыс, шу, вед шонид на: шонидыс мусяньыс кайо, а кодзыдыс вылісянь личкө... Со тэныд и ва ру...

Ондрейос бара пондїс восодны. Мед кызкө личкыны восомсө, сийо пазодїс чуманысь йисо да юис кодзыд ва.

— Ой, лекось тай мян делоясыс, зонмө Катшыс... Лек висьом тай мянөс тшаннитис, коркө менам вөліс нин татшөмыс... Чуть эг кув сэки... Врачьяс мездисны... Кызы сайо во сысянь оли... Челядь чужисны да быдмисны... Вит пи... Мыйта вөралі... Куш сөмын ошсө тэа-меа сизимос кыйим... А мыйта тулансө да урсө... Мыйта йозлы мича шапка да воротник шедөдїм...

— Онї сәссия кувны али мый ковмас, зонмө Катшыс?.. Лек йоз понда... Коді нө эськө керканымөс сотис?.. Гашкө, нарошнө сотисны да?.. Төдөмөн?.. Мед выжывитны тайо гажа ягьяссыс?.. Бурөн пө вед Пильө Оньюид оз жө нин сет найос пөрөдны-а... Аслас вөралөмыс вөсна... А, Катшыс?.. Вермас лоны татшөмыс?..

— Ой, сәтшөм кодзыд лон асьядорыс... Карыс со дзикөдз нин сотчис... Не кө сийо, ме эськө, буракө, эг нин сөрнит тәкөд, Катшыс, важөн турдї... Пөрөм пожөмыс бура лөсяліс и... Оти войтө кызкө-мыйкө тай вуджим... А водзөсө мый лоо?.. Мөд вой кежлад вед ме ог вермы чукөртны пессө... Кысь нин эськө гортө ләччыны да...

Онью вынтөма куйлө би дорын, сөрнитө тадзи, мед нин сөмын личөдыштны матө воөм ловсө да малалө-шыльөдө поныслысь топыд гөнсө.

— Мый нө вөчны, Катшыс?.. Вай жө, зонмө, тэ гортөдз котөртлы... Мөд петан туйыс абу... Кызкө колө юөртны гортсаяслы... Гөгөрвоан?.. Рытөдзыс кызкө колө вайөдны йөзөс... А то кула ме... Збыль, зонмө... Луннас, гашкө, кызкө-мыйкө ола на... Шондї, буракө, петас, русө личкас... А мөд войнас нөшта на кодздөдны вермас... Вай мыйкө босьт менсьым да котөрт гортө... Мый нө эськө тәд сетнысө?.. Патронташөс? Сьөкыдджык сийо... Беретөс? Юрөй кынмө... Вай, зонмө, табак көшельос босьт...

Куритчынысö тай ог жö вермы... Отнад кө кошельнас воан гортö, гөгөрвоасны, мый неладнö мыйкö лоис...

Онö тiралысь киясөн гугöдiс вышивайтöм бана табак кошель носöвик вылö, шыртыштiс носöвик помнас табак ёкмыльсö, суйис зептас. Сэссия перйис коссыйс, гач волыссьыс, тасма, пуртөн розьöдiс кошельсö. Думыш-тiс да, кисьтiс кошель вылас чумалысь ва, бура пыдзыр-тiс. «Мед тэнö, зонмö Катшыс, эз несйöдлы...» Сэссия и тасманас шыртыштiс кошельсö понлы голя вылас.

— Онi сэссия котöрт, зонмö... — йötкыштiсмоз нель кока другсö. — Котöрт, котöрт... Лэччы гортö...

Катшыс никсыштiс на көзяиныс вылö видзöдiгмоз. Увтыштiс. Сэссия öдийö чепöсйис би дорысь да пырысь-пыр жö вошис топыд ру пытшкын.

— Гөгөрвоис вед Катшысыс... — би лöсьöдiгмоз сёр-нитö Онö. — Тöлка и пон... Мед көть эз жö мыйкö ло туй вылас... А друг да трасса вылас мыйкö лоас?? Машина улö сюрö... Либö кутшöмкö лёк морт тешитчöм могьсь лыйö... Кодкö керка сотысь коддьöмыс...

— Ок-ок-ок!.. Мый нö тайö вöчсьö олöмас?.. Кыдз нö тадзсö позьö?.. Кыдзи нö позьö вöралысь мортлысь керка сотны? Став надеясö и гажсö сылысь тшынвыв лэдзны?.. Гашкö и, кодкö нистiс-узис, а сэссия, пасибö шуöм пыдди, мунiгас истöгөн чуткис?.. Мед некодлы нин сэссия, сыысь кындзи, бурсö оз вермы вöчны керкаыс... Кыдзи нö кыис лыбис сылөн та вылö?.. Водзтi тай нö велöдчы-тöмджыкөсь и быдтор вöлины йöзыс, а некор татшöмыс эз вöвалы... Мыйла нö öнi татшöма пакöститчыны пондiсны?..

Мед көть Катшысыс воис жö нин гортöдз. Мед көть воис жö нин!.. Мед воис... Вугыртiгмоз думыштö дзи-көдз эбöстöммöм, шоналыштöм Онö.

Дозмөр койт*

ӨТИ АКТА ПЬЕСА



ВОРСЫСЬЯС

Смолев Артемий Иванович—вöрын мастер, ветымынысь унджык арöса.

Анастасия Степановна—сылөн гöтыр, ар ветымына, участокын пусьö.

Гуляев Владимир—пөрöдчысь бригадир, 25 арöса.

Жмутько Павел—бригадир жö, 32 арöса.

Феня—сылөн гöтыр.

Лудыков Афанасий—бригадир, 35 арöса.

Мыров Василий Васильевич—лесничöй, 40 арöса.

Дронов Герман Андреевич—лесопунктса начальник, 30 арöса.

Том нывбаба—увйысысь.

Вöчсьö войвывса вöрын, ылі лесопунктын, öнiя кадö.

* Тайö пьесасысь авторлы сетöма мөдöд премия Всесоюзной конкурсе вылын, кодöс нуöдiсны 1973—1974 воясын ВЦСПС да СССР-са писательяслөн Союз.

Вөр участкаын мастерлөн кабинет. Паныда стенин ошалё синмад шыбитчана плакат: «Март — ударной тóлысь, Тыртам кварталной план 110 процент вылò!» Сы улын — ыджыдкодь карта-план, кодос быд ногыс визийодлòма татчòс вөрьясса юясон да визиркаясон... Неуна бокинджык — мод жырийò одзòс.

Мастер чечò пызан сайысь да мовпалгтыр видзòдò карта вылò.

Смолев (*кыкысь дорвыв азыма нённыштò тшынасьысь сигарета мундштуксò*). Нда-а... Вывтíджык одйò тай ми воодчим татчòдз...

Сийò шызьòма, тэрыба ветлòдлò жырийò отарò-модарò. Вылысь матыстчò карта динò.

А-а, мый лоанаыс — ло! Абу первойысь... Ексонпедь...

Ызи-базí пырò Володя Гуляев, ной спецовкаа, вижовгòрд каскасò кутò киас.

Гуляев (*зымкнитò кокбòрляснас*). Полковник ёрт! Тэнад корòм серти отставкаын ефрейтор Владимир Гуляев воис!

Смолев (*нюмыртчылò*). Мый тэ менò полковникон век ыджòдлан... Кòсьян кò тòдны, старшинаысь вылòджык ме сідзи и эг кыпòдчыв. Ранитисны менò нелямын коймòд воын, и та вылын военной карьерайò эштис...

Гуляев. Зэв нин ёна тэ мунан миян командир полка вылò, Артём Иваныч. Кульòмаòсь и ляскòмаòсь быттё!

Смолев. Вай эн сòр... Бурджык висьтав, кòнòсь мукòд бригадирьясыс? Ме жò ставнытò корлì.

Гуляев. Компот на йирòны, пырысь-пыр локтасны. А мый лоиссò, Артём Иваныч?

Смолев. Тòдмалан, кор ставон воасны. (*Крукасяна видзòдò Гуляев вылò*). Тэ нò мый сідзи восьсòн шальялан? Кынмыны да висьмыны окота лои?

Гуляев. Ме абу карса мамзель, мед висьмыны!.. Вөр тырыс шонди, Артём Иваныч! Кузь төвлөн көзөдыс тулысыс бара на мыччөдлө нырсө. Көдзыд, а кылө нин тулыслөн көрыс!

Смолев. А миянлы нө мый вывтисө радлыны тулыс воомыдлы? Миянлы кымын дырджык кутчыяс төвсә туй, сымын бурджык.

Гуляев. Мед лешакыс нөбөдө тәнсыд төвсә туйтө! И мед өдийөджык воас тулыс! Югыд войяса да нывъяслөн пось вом дорьяса!

Смолев. Тэнад, лёк кырлөн, век сөмын өтитор дум вылад...

Гуляев. А мый нө — вирөй ворсө на да!

Смолев. Висьталін эськө бурджык, кутшөмджык талун пажыныс? А то меным, аслым, век на некор вөли ветлыны... Пөтин-ө көть?

Гуляев. Так точно, полковник ёрт! Сыт, но не пьян... Да, чуть тай нө эг вунөд, ме жө пыри тә динө, висьтавын зэ-эв бур юөр...

Смолев. Гашкө, бара нин выль нылөс көсьян йөйтөдлыны?

Гуляев. Эн төд, полковник, көть эськө и татшөмторыд... (Чөскыда чупнитө вом дорьяснас.) Ме шуа, кор выль любовь гөрддзась... Мечта!.. Но — виччысьлам югыд войясөдз... Льөм дзоридзлөн кольмөдыс көрөдз... Сэки посьджыка радейтсьө...

Смолев. Ок и бызгун жө эськө да, коркө со вежсьылан он-а? Висьтав нин, висьтав, мый көсийн юөртны.

Гуляев. Зэ-эв жө буртор!.. Мися, талунъя лунсянь ми кутам мутшкыны свежөй яй. Сидзкө, мед лешакъясыс нөбалөны консерва-банкаа сёяннымөс, кодыс лөоны гастритьяс да кынөмад быдпөлөс розьясыс! Степановна-ыд тэнад сидзи көсий жаритны да пражитны!..

Смолев. Да тә нө лючкисө висьталан он сәсся коркө? Ызгө сәни юыввса косьт моз...

Гуляев. Висьтала! Чорыд ныра сизьяс сөмын на котшкөдісны-юөртісны, мый трасса вылын, тасянь вит верст сайын, шофёр Криволапов таялөма машинанас... Кодос эськө тэ чайтін?

Смолев (*чошкөдчис*). Ёксөнпедь, кодос таялөма?!

Гуляев. Кувтөдзис таялөма пывсян ыджа йөраос...

Смолев (*ляпмунө чуймөмысла*). Йөраос? Кыдз нө сійос позьө таявны?

Гуляев. А сідз жө. Мый вермөма, өддзөдөма МАЗ-сө. А мөдыс, йөй юрнад, кыськө друг чечыштөма водзас...

Смолев (*ырсмунө-чеччө*). Да, ёксөнпедь, кыз нө сійө чечыштиссө? Та джуджда лым дырйиыс? Абу өд көч, а — йөра! Гашкө, кызь пудья! И чарөмыс со абу на, лымйыс оз кут сійос, му дінөдзис вөйталө, морөсөдзис... Видлы чечыштны...

Гуляев. Но, гашкө, и кызкө мөд ног вөлі, ме ог төд...

Смолев (*шызьөмөн восьлалігтыр*). Мый вөчөны пежъясыд, мый вөчөны! Да өд сійө, көнкө, нарошнө таяліс... Дерт, нарошнө!.. Йөраыс, гашкө, зэв нин дыр келіс челикөдыс, кувмөн мудзис. А сэссия, виччысьтөг, веськаліс чорыд туй вылө... И пондіс руныгыны ньөжйөникөн, юж вывтис... Төвнад өд сылөн, коньөрлөн, выныс лёка этша... Сөяныс оз тырмы, ставыс кыз лымйөн личкөма... Куш сөмын кын пипу кырсь да поноль йывъяс... И сюртө чегысь көдзыдъяс топөдөны, котравны тшөктөны... А сэссия кыськө эсію сюра бесыс вувзьысис, Криволаповыс... Абу сьөкыд гөгөрвоны, мый сәні вөлі... Кутшөм панласьөм вөлі... Туйыс джуджыд вор кодь, доръясыс крут стен моз кыптөны... Котөртигас, коньөр, некыз оз вермы чечыштны бөкө... И бөрвыв чепөсийны оз позь... Мышсяныс төдтөм лёк зверь вөтчө... Сөмын водзө колө, кызд вермас өдийөджык — водзө... Медбөрья вынъясысь водзө...

Но верман өмөй пышыйыны гөгөрвотөма эргысь зверысь?
Сылөн жө көрт сьөлөм — оз мудз, лолыс оз тыр ни...

Гуляев (*кватитө сигарет*). Но и Артём Иваныч!
Но и полковник! Но тэ и чертитин... Будь проклят... Ме-
нө весиг дрөж босьтліс... Эг чайтлы ме...

Смолев. «Эг чайтлы, эг чайтлы!» Да тэ өмөй
мыйкө буртор йылысь верман чайтны? Либө эсийө злө-
дейсы!.. Сийө өмөй думыштас мөд ловья лов йылысь?
Кор юр вемыс пыдди, жальлун пыддиыс, куш сөмын
горшлунөн тырөма сись лолыс!.. Абу менам сийө уджа-
лысьыс, а то эськө ме сылы, живодёрлы, петкөдлі пуж!
Но энлив на, всё равно ме ог көдзөдчы таысь, всё равно
мыйкөкерта! Ексөнпедь!.. Но көнөсь нө мукөд бригадирь-
ясыс? Мый сы дыра оз локны?

Гуляев (*видзөдө өшиньө*). Да со нин чотіктөны...

Пырёны нөшта кык бригадир, спецовкааось жө, пөтөса
сейөм бөрын чужөмьясыс лөньөсь, дөвөльөсь. Пуксялөны.

Жмутько. Оні эськө, пажын бөрад, нёровтчышт-
ны кытчөкө, а тэ, Артём Иваныч, бисов сын, ыджыд сёр-
ни вылө коран миянөс. А чөскыда пуө-пөжалө тэнад Сте-
пановнаыд, кужөмыд гөтрасьнытө.

Лудыков. Артём Иванэч, йөра йывсьыс кывлін?
Мед көть миянөс эз жө пайкөдны.

Смолев. А тэ нө тшыг али мый? Гашкө тэ тшыг-
лы кулан?

Лудыков (*весьөпөрис, дзөрө, барьялө отарө-
мөдарө*). Мыйла кула, ог эськө да... Рушку дзенавтөдз на
тай пажнайті... Но йөра яйыд эськө эз жө лишной вөв...
Көрыс чөскыд сылөн, абу порсь яйыдлөн кодь... А Кри-
волаповыс, шуоны, куш пө толькө шоперьяслы көсийө юк-
лыны... А вөрыс өд отувья...

Гуляев (*аддзө, мый татшөм сёрнисьыд мастерныс
водзө на ырзьө*). Артём Иваныч, но висьтав нин, ку-
тшөм-сэтшөм сёрни тэнад эм. Мыйөн нин бара көсьян
шензьөдны мирсө?

Смолев (чорыд видзёдласён кытшовтөдө бригадиръясөс). Войтыр, аскомысь ми вуджам выль дялянкаө, сідзкө, пөрөдчөмнытө сигөртөй.

Бригадиръяс чур-чермунисны татшөмторсыд, медьёна — Жмутько.

Жмутько. Кыдзи — вуджам?.. Сөмын на воөдчим бурджык вөрөдзис, и — вуджам... Ог гөгөрво ме...

Гуляев (гажаа). Ме сідзи и чайтi: мися, полковникыд бара на мыйкө кок йывсыд чергөданаөс думыштас!..

Лудыков чөв олө на, виччысьө, мый водзө лоө.

Смолев (чеччигмоз). Төданныд мый, войтыр... Тайө мича вөрас дозмөр койт чукөрмывлө быд тулыс, вель ыджыд койт. (Петкөдлө карта вылысь). Со танi, көдж кодь тшуподас... Ме гоз-мөдысь вөвлi, аддзылi, кыдзи танi найө пируйтөны... Тi, көнкө, некор на эн аддзылөй?..

Гуляев (пөся). Ме эг аддзыв...

Смолев. Быттө кино видзөдан, цвөтнөйөс, сө ей бог! Съөд чукчыис лэччас му вылө, паськөдас уна рөма бөжсө... Да юрсө чатөртас, да бордьяссө шевкнитас... Сэтшөм мича... Сэтшөм тшап... Эз эськө ков пазөдны татшөмторсө... А то өд найө водзөсө вермасны и не рөдмыны сэссия... Ми кө нырам-путкыльтам налысь свадьбуйтанiнсө... Гашкө, миянөдз найө кымын сюрс во нин гажөдчылисны татөн... Мед и миян бөрын на гажөдчөны пөттөдзныс, тшөтш жө өд ловья ловьяс... Да и вөрас быттө гажаджык да кыпыдджык, кор дозмөръясыд эмось... Огө нин кутөй сёрнитны сы йылысь, мый найө сетөны медчөскыд яйсө...

Гуляев (шензьөмөн). Оз жө кө сюрс вояс найө чукөртчывны танi-а? Артём Иваныч?

Смолев. А мый нө озыс... Дозмөрыд пө, шуөны, му вылас медся важ лэбачьясысь өти. Сийө пө каменнөй векин на овлөма. Сідзкө, не сюрсъяс, а уна сө сюрс во

нин колис... Ме тайö кöдж йывсыс сёрнитлі нин лесник-кöд, Василий Васильевич Мыровкöд. Сійö эськö сэки веськыдасö немтор на эз шу, но, ме чайта, оз ло паныд. А сэсса öд, ёна нин кö ковмас, позьö на и вылöджык шыöдчывны... Мед кольö ягторыс... Неыджыд заповедник пыдди... Дозмөръяслы рöдмöдчанін пыдди... Буретш та йылысь ме и кöсий сёрнитыштны тиянкöд.

Лудыков (ловзыштис). А ыджыд-ö эськö койтыс тани?

Смолев. Ме чайта, куш сöмын энъыс сё сайö воыв-лö. А чукчыс гашкö и сысы на унджык.

Лудыков (быдсөн шутёвтыштö). Видзö-öд!.. Со кöни добраыс... Не öти йöра мында лоас... Яйыс пöткайд-лөн чöскыдджык и...

Жмутько (ызиймөн). Мый нö тi нинöм абусö больганныд, бисовы сыны! Койт... Дозмөръяс... Да эмось кöть абусь найö меным!.. Вöрыс али мый оз тырмы налы? Али мöд места оз вермыны аддзыны? Ей богу — челядь кодьось тийö! Тöлысь помасьö, стахановскöй тöлысь. Колö рöбитны мый вынысь, план тыртны, а найö — вуджамö... Да öд вуджиг-керигад куим лун вошö, пока то да сё...

Гуляев. Торйөн нин тэнад Фенечкаыд пондас чирзыны, Павло. Тöда ме сийös: лэдзас кö гыжъяссö — тигр. Мича баба куа тигр... Бура сапыштас!

Лудыков. Эн-ö нин тэ йöз бабаяс бöрся понды вöтлысьны?

Гуляев. Чö-öv, Афанасий, мый тэ! Ме садьтöг пола Фенясыс... Но сы пыдди сийö, гашкö, пöся радейтны кужö? Сидз абу, Павло?

Жмутько. Да мун сэтысь!..

Смолев. Владимир, тани делö йылысь сёрнитöны...

Гуляев. И ме сы йылысь жö, сöмын ме мöдарсянъыс матыстча... Сидзкö тэ, Артём Иваныч, шуан, мый налөн, дозмөръясылөн, тшöтш любовь? Койт вылас?

Смолев (öвтыштчö моз). А мыйла эськö и абу?..

Гуляев. Кылан, Павло? А друг да налөн радейтчөмыс кусас-кисяс мян вöсна? Тайö жö зэв лектор... Тэ ас сертийд думышты, Павло: шуам, тэ сөмын на пондін ассыд Фенечкатö шамравны, и тэнö друг торкисны... А?

Жмутько. Да мун, мися, сэтысь! Ме збыльысь сёрнита, а сійö тшөкөлдывайтö... Мый оз ковсö откодялö...

Смолев (вензысьяс вылö сьорсьөн-бёрсьөн видзөдлөм бöрын). Мукод дырйис, Павел, колö, буракö, и откодявны. Мед не чорзыны да бакшасыны.

Жмутько. А ме нö мый — бакшаси? Лёка ме тэныд уджала, да? Дөзмин тэ меысь, да?

Смолев. Мый тэ, Павел! Тэ кодь зиль мортыс шоч сюрас... Ош моз муркөдчан... Эг өд весьшөрö индöй тэнö бригадирö, отнадтö сезонникъяс пөвстысь... Но өд, Павел, мортыд олö оз сөмын куш уджнас... Мортыдлы колö паськыдджыка видзөдны да аддыны ас гөгөрсьыс...

Жмутько. Ме көсья лөня да бура рөбитны сезон помөдз... Ставсö босьтны договор серти дай бөр гортö мунны...

Смолев. Сэсса тэ местаö мөд локтас... Тэ кодь жö... Лөня да бура рөбитысь... Миян вөр-ва вылö көдзыд синъясөн видзөдысь... И, медбöрын, ми тані ставсö пузутам... Сэтшөма пузутам!..

Гуляев. Но и полковник! Кужан жö тэ мортыдлысь ловсö нетшкыны!.. (Ертъясыслы). Ті кө эськө кывлінныд, кызди сійö тані серпасалис йөра талялөмсö!.. Ме бөртиджык висьтала тэныд, Павло...

Жмутько (бара на ыззьö). Артём Иваныч, да некод оз лэдз тэныд кольөдны вөр дисö! Некод!.. Торйөннин начальникным... Немтор и надейтчыны!.. Работникъяс паныд сувтасны и!.. Мыйла нö весьшөрөсö кикимеритчыны?.. Торйөннин — ударнöй төлысь дырйи... Тэ, Артём Иваныч, ачид тані мыйкө не сідзиджык гөгөрвоан!..

Өдзөссö чорыда швачкөбтөмөн петö.

Гуляев. Но, полковник, бур койташ, тыдалö, лоö!

Сьолөмөй кылө! Видзөдыштам көть! Да гажөдчыштам!
(*Ызвьөмөн петө*).

Лудыков (*лөсьөдчө жө мунны, но педзө на кок йылас*). Ёна жө мастер большынысө Володяыс. Лыддьөма быдсикас книгасыыс... Ог сөмын гөгөрво, кызди найө ёртасыёны Павлоыскөд, дзик разной йөз да... Пөрөдчөмнас ёнакодь венласьёны и...

Смолев. Гашкө, буретш тайөторыйыс и матыстө найөс да?

Лудыков. Одвакө... А койт йывсьыд кө сёрнитны, Артём Иванэч, то ме — тэ дор жө. Мися, кольны колө сийөс.

Смолев (*шоныда*). Аттьө тэныд, Афанасий!

Лудыков. Толькө тэ менө тшөтш нуөдлы тулыснас вөравнытө. Кор найө пондасны койтны... Мукөдсө, ме думысь, оз ков нуөдны, кужтөгид толькө повзьөдласны. А ми тэкөд, кыкөныд, додь тыр шлөчйөдлам.

Смолев (*ёна скөрмөмөн*). Ме тэд сета — шлөчйөдлам! Ёксөнпедь! Тэ нө мый, мисьтөм лов, — пукалин тани и думайтин, мый ме аслым вылө кольөда койтсө? Медым отнамлы гусьёникөн начкысьны тани? Сидзи али мый?

Лудыков (*бөрыньтчө скөрмөм мастерысь*). А мый нө... Зверь-пөткасө вөрас сы вылө и лөсьөдлөмаөсь, мед эськө начкавны найөс... Сиён да капканөн кыйны...

Смолев. Ме, ёксөнпедь, көсьян кө төдны, некор ог кыйсьывлы тулыснад! Кылан? Некор!.. Арын вөрала, а тулысын — ог! И батьясным тэа-меалөн эз вөравлыны тулыснад, ни пөлясным... Найө көть эськө и вөлины пемьд дядьояс, бура төдісны, мый тулысын выль ловъяс гөрддзасыёны, олөмыс паськалө... Оти лов чужтө уна мукөдөс... И оз позь ордны олөмыслысь тайө вужсө...

Лудыков. Ёна тай... Пищала кө ме, ог понды видзөдны тулыс ли ар. Медтыкө кодкө веськавлас-а...

Смолев (*водзө на зырөдө бригадир вылө*). А ме тэныд веськыда шуа: пыран кө тэ либө кузь кырыма

другъясид тайо койт вылас пищальон, то ме кыйодча да
гырысь солон пезьда оти местао, ачид тодан, кытчo.

Лудыков. Выживмома и эм ко мортыс-а! (Мунo).

Неыджыд кост бoрын пыро Анастасия Степановна,
мастерлон готырыс. Пальтосо кышалoма веськыда еджыд халат
вылас.

Анастасия Степановна (тождысьомон). Орта,
мый но те бара паномыд? Йоэыс шызьомаoсь, тeно быд
ногыс видoны да дивитoны... Столовoйын бабаяс ме выло
уськодчисны...

Смолев (чукрасьo). Сидзко, лыбис нин звoныс...
Одйo...

Анастасия Ст. Да мыйла но ставыслы паныдон
мунан, Орта?

Смолев. Некодлы ме паныдон ог мун... Ме, ексон-
педь, бурджык ногон косья вoчны... Дозмор койт сeни,
гогорвоан? Зeв ыджыд!.. Со и косья ме кольыштны вoр
дисo, медым не рoзoритны...

Анастасия Ст. Мед и кералин эськo, колантор
тай! Дозморьясыд, пoдикo, выль яг на аддзасны, вoрыс
паськыд... Мыйла но тeныд oтнадлы колo на понда вий-
сьыны? Кор ставыс паныд сулалoны... Мыйтаысь нин
чишкавлисны тeно татшoмторьяссьыс, а век на некыдзи
он велав... Бара oд штрафуйтасны, мыйон кутан мынтысь-
нысo? Нывьясыдлы мый дыра нин косьысям выль паль-
тояс ньoбны... Дзикoдз ротыисисны важьясыс кыкнан-
ныслон. Коньoрьяслы, конкo, яндзим нин ветлодлыны
институтас...

Смолев. Но те, ексонпедь, oтиoс мoдкoд эн дзуг.
Гурийв вoсьo oдзoс, и котoрон пыро ызьoм Фeня Жмутькo.

Фeня. Мый но тайo кутис артмыны, Артeм Ива-
ныч? Ми Павлокoд уджавны татчo воим кык тысяча
верст сайсянь, и мянос жo и комодоны! Вербуйтигон
мыйсo сомын эз косьыны да вoзйыны... Уна деньга пo на-

жөвитад!.. Сезонной норма кө тыртад, вөр сетамой хата выло... А тадзинад омой тыртан? Кор, понъясос моз, оти местаысь модо век отаро вөтлоны? Да медлек вөрсө век отаро тшөктөны пөрөдны?..

Смолев (дозмөмсө кутөмөн). Оз позь пөрөдны сийө коджсө, Феня. Бурджыка кө видзөдлыны, государственной синмөн кө видзөдлыны... Тэ отитор гөгөрво, Феня: оз позь ставсө кушөдз шырызыны... Оз позь вөр местаө тыртөм степъяс кольны... Степъясыд өд тиян, Украинаад, сідз нин тырмөны... Вөлі ме сәні, Донбассын... Пасьталаыс кушинъяс, сьөд терриконъяс сөмын чурвидзөны... Весиг сынөдыс курыд вөртөгыд и сәтшөм чорыд — сідзи и сатшыкысө ловгоршад.

Феня. Да дугды тэ мойднытө, Артём Иванович! Висьталісны — дозмөръяс вөсна пө колян, мед сәсся аслыд сәні вөравны...

Смолев (оз нин вермы кутны скөрмөмсө). Но и мый — көть и дозмөръяс вөсна! Ексөнпедь! Ог ме көсийы — мед вөрыс дзикөдз выло куліс! Мед миян бөрын сийө дөбелькиөдз тыртөммис да куліс! Мед эз кыв сәні (веськыд кинас, шлөчйөдлөмөн, кусньөдлө ранитчөм шуйга ки вывсьыс чуньяссө) ни пөткалөн ләбөмыс, ни зверлөн горөдөмыс, ни немтор... Тиянлы өд, Павлоыдкөд, мый! Веськодь тиянлы — норма тыртанныд, вөр босьтанныд «хата» выланыд, а кодкө, гашкө, и орден на босьтас, — сәсся сымда и аддзылім ми тиянөс!.. А миянлы жө тані водзө на овны колө... Чужанінным тані миян... И пөляс миян тані овлісны, и пөляслөн на пөлясыс, и код төдас на коді ещө... Вөр-батюшкосө енмыс, гашкө, и сетліс миянлы тиянлөн садъяс пыдди? Тиян сәні, Украинаад, өшинь уланныд — яблөг и виноград, быд пөлөс витаминьыс... А миян куш сөмын пув да тшак... Да сийө жө дозмөръясыс, тиян утка-дзодзөг пыдди. А вөрыс кө дөбелькиөдз бырас, сәки и тайө оз ло... Вөртөгыд немьсы-немтор оз ло... Тайөс жө колө гөгөрвоны, Феня...

Феня. А миянөс омой нө оз ков гөгөрвоны? Ми

гортын челядьос колим, пöрыськөд... Мед вөр выль хата вылө чуктөдны, важыс дзикөдз нин пöлыньтчис... А тадзинад өмөй чуктөдан? Тадзинад өмөй тыртан сезонной норматө?.. Степановна, көть эськө тэ ли мый ли өлөдін асныра бистө ассыд, дзикөдз сийө ышмыны куті!

Анастасия Ст. А ме сылы, чайтан, ог та йылысь жө төлкуйт?.. Мыйла нө увтөм пу йылас каттысьнысө? Усян да өд жаялан... Кыдзкө-мыйкө олыштін нин эськө пенсияөдзыд, зыктөг да шумтөг. Эз нин дыр коль — кык воыд... А то өд и чөвтны вермасны, начальникыд важөн нин бугжылясьө, быттө тэ йики сылөн синмын... А кытчө нө мунан сэки татшөм кырымнад? Татшөм коколюканад? Ни черөн керасьны лючки он вермы, ни багырөн кыскыны...

Смолев. Но, тырмас сэсся, а то пондिसны көкны, өтиыс и мөдыс...

Анастасия Ст. Да өд чөвтасны кө мастерсьыд, шылльө-мылльө удж вылө индасны, пенсиятө ковмас квайтымын арөсөдз виччысьны. Мый дыра на ковмас мучитчыны омөлик здоровйөнад... Он и эштыв шойччынытө!

Смолев (чорыда). А ми вот видзөдлам на — кызди менө чөвтасны! Тэ нө мый, ёксөнпедь, чайтан, мый вөрваыс Дронов коддьөмьяслөн асланыс али мый? Абу сідз, вокө... Вөрваыс аслас став дивөясөн өтувья миян, став йөзлөн, и сы вөсна ме Дроновьяссыд не этшаджык кыз кута... Көть и чинөй лёка ичөт... Гөгөрво тэ — прав ме, и аслам шуөмысь ог көдзөдчы. Ог сетчы!

Феня (шензьөмөн). Збыльысь кө йөймөма и эм-а, пöрысь бисыд... (Петө).

Анастасия Ст. Ок, Ортя, Ортя, кор со тэ вежсьылан-а! Кок пöлыд гортйын нин, а век на сорстөм пектук кодь... Мунам инө көть, вердышта ме тэнө...

Смолев (небзьө). Важөн эськө сідзи... А то талун, сьөлөмөй кылө, ёна на ковмас вензьыны, тшыг кынөм вылад верман и гатшнөвтчыны...

Сійö жö жырын, рыгыавы. Рöмид, мастер öзтö би, пöрчö
ыж ку пасьсö. Сійö воис делеякаяс кытшовтаниньсь.

Смолев (*ызвьöма и скöр*). Но и йöз! Öд кызди
мыйкöкертисны! Хы, ёксөнпедь! Быттьö вир сөнсö ородö-
ны налысь, медкыз сөнсö... А эсийö тырлы-бырлыыс-
лы — Гуляевыслы — теш, сöмын и ызьялö да гöрдлö...
Тьпу!

Пырö лесник, неуна гажакодь.

Мыров. Чолöм начальствоы! Позьö оз шонты-
свыштны кортöм гöстьяслы?

Смолев (*эскытöма видзöдö, но шуö тöдчöдана ме-
лелунöн*). Пыр, пыр, Василий Васильич...

Мыров пуксьö, пöрчö шапкасö, зэв збыльсь шуö.

Мыров. Артём Иванович, меным кывсис...

Смолев (*шензьöмөн*). Тэöдз нин кывсис?.. А, пом-
нитан, ме тэныд водзвыв нин висьтавлі, Василий?

Мыров (*ичöтик жебиник кинас небыдика лапкöдö
пидзöссö*). Но öд сэки ме тэныд нинöм сэтшöм-татшöмсö
эг шу.

Смолев. А öні?

Мыров. Ог ошкы, Артём Иванович, ог ошкы.

Смолев. Ме тэныд висьтавлі, мый сәні дозмöр койт,
зэв ыджыд?

Мыров. Помнита, эг на вунöд. Но, буракö, ковмас
кравны сійöс.

Смолев. А ме надейтчи тэ вылö: мися, кытчö колö
шыödчылас Василийыс, и кольöдасны коджсö... Сидз нин
пöткаыс бырны кутіс вöрьяссьыным, а тані медбöрря
койтьяссö налысь кисьтам-пазöдам...

Мыров. Менötö, шуам, татшöмторыд оз ёнасö дой-
дав. Ачуд тöдан: абу вöралысь ме, киö некор ог босьтлы
ружйötö.

Смолев. А, буракө, колө эськө тэныд вөравнысө, Василий. Лесникыды кызкө быттьө абу и лөсьыд пишальтөгид ветлөдлыны, медъёна сійө йитчөма вöрыскөд. Сэссия өд, кывлі ме, батыд пö тэнад, пöлыд и зэв бур кыйсьысьясөн вöвлөмаось.

Мыров (дöзытөг нюмъялө). Но и мед, ен ськөд, вöліны кө... Шуоны, мый водзті пö став коми йöзыс вöралысьясөн вöлөмаось, весигтö нывбабаяс. Но өд сэки и кадыс мөдкодьджыкөн вöлі... А öні ми и вöравтөгис вермам кынөмпöt перйыны и пасьтасьны. Сэссия өд, сідз кө нин шуны, батый эз удит менö вöравнысө велөдны, усис война вылын. Ачым кызкө эг жö велав дай...

Смолев. Сідзкө либө тэ он дорйышт менö?

Мыров. Ог лысьт, Артём Иванович.

Смолев (пöся). Ёксөнпедь, да өд вöрыс сәні сьöла-лы кокыштмөн, а, Василий!..

Мыров. Öтарсянь кө видзөдны — дерт, сідзи и эм, став пармаыскөд кө öткодьявны. А мөдарсянь кө видзөдны, недорубысь кө штраф оформитны, — то не öти сюрс каяс... Зептыд тэнад ёна личавны вермас...

Смолев. Чöвлы на тэ, чöвлы, Василий, штрафнад! Татшөмтортö быдла боксянь колө муртавны да донъявны... Тэрмасьтөг... Тані менам, пызан йöрын, öттор-мөдтор эмышт неуна... Гашкө, небзьöдыштам ловнымöс?.. (Судзөдö джынъялөм коньяк доз, нянь да лук.)

Мыров (долыдмө). Коньяксьыд ог öткажитчы, но, Артём Иванович, бара на шуа — татшөмторын дорйыны тэно ог лысьт. Көть эськө и кыла жö мөгтö...

Смолев (кисьталө стöканъясө). Ладнö, ю! (Юöны.)

Мыров (закуситтөг). Ог лысьт, сы вöсна мый — пола... Куснялас менö Дроновыд, тиян начальниккыд, додь вож заветкаө вöчас... А ме ог на көсйы лоны заветканад, мый сэссия керан... Öтчыд менсьым чегъявлісны нин сюръясөс, öні — тырмас, служитыштны на көсья. Семьяс вердны, челядьс быдтыны, найö өд менам зэв на посныдыкось... Да и тэныд ог сөветуйт ыръянитны, Артём

Иванович. Кымөсад йөгъяс сөмын најөвитан, а гашкө, и нөшта на мыйкө...

Смолев (ышловзё). А ме нин тшөкті йөзыслы сигөртчыны пөрөдчөмнас...

Мыров (важ жар вылас төдчымөн гажмө). Да сълышт тэ дозмөръяс вылад, Артём Иванович! Сълышт и зыртышт катаникнад... Мый нө тэнад мускыд висёо на понда? Этша өмөй быдторыс нырсёо да пазөдсёо вөрын?.. Со и йөратө машинаөн талялөмаөсь... Регыд сөсся, гашкө, и вөрыс дзикөдз оз коль... Непөштө дозмөр. Да йөра... Но и мед! Миянлы нө кутшөм делө? Ми — дзоляник йөз. Мед, ёна кө колө, вылын думайтөны та йылысь! Мед думыштөны и тшөктөны миянлы, кызди колө... Миянлы өд мый? Миянлы — юин-сөйин пөттөдзыд и рөмидзты...

Смолев (шога). А берегдорса вөръястө шырзыны со лэдзин. Ва видзан вөръяссө ставсө куштисны... Лөктор өд артмө, Василий...

Мыров. Сидзи эськө да... Но — тшөктисны... Ме эськө и, веськыда кө шуны, нявөстли жө паныдсө, но кыс нин! Тиян начальникыдлөн, Герман Андреичлөн, сәни, вылас (петкөдлө чуньнас), зэ-эв топыд йитөдъяс эмөсь. Мый колөсө и оз ковсө сийө вермас вөчны...

Смолев. А оз өд позь вөлі берегъяссө кушөдны... Юным косьмө өни, берегыс лөкысь буждө. Тэныд медьёна эськө коліс дорйыны да видзны тайө вөръяссө, сы могысь и тэнө пуктөма... Лесник өд...

Мыров. Төда, Артём Иванович, ставсө төда... Но — ньөрийөн пө чер тышкөс он небзёод, немтор и босьтчыны...

Нөшта юыштөны, Мыров кодзэ, кежыштө татшөм сөрнисьяс.

Мыров. Сы пыдди, Артём Иванович, странаным ас кадө босьтис миянсянь содтөд вөр. Зэв колана вөр, кодөс заграницаө вузалөмысь најөвитам уна зарни... И ті, заготовительяс, паськыда нималінныд да горалінныд сәки — газетъясын и радио пыр... Передовикъяс! Водзмөст-

чысьяс! Чуть ли не кык планён колскөдінныд! А мый нө — кыскыны керсө оз ков, сөмын дернитышт ва дорө... Премия и почёт... Герман Андреевич, ен ськөд, медаль курыштис... Мый нөшта колө?.. Оз тай весьшөрө шулыны, Артём Иванович, мый олөмас пө омөлыс буртөгыс некор оз овалы...

Смолев. Нда... А сөвествыд нө тэнө некор оз йирлы татшөм олөм-керөмсьыд?

Мыров. Кыдз тэд шуны... (Сэся бытгьө шмонитөм сорөн.) Коркө кө сійө и заводитлас чипсыштавны, сөвествыс, то ме мырдысьөн сюртча думайтны вөчөмаыслөн баныс йылысь, а не гугыс йылысь... А быдторлөн тай век бан и гуг овлө... Баныс — мича, а гугыс — мисьтөм к зывөк... Баныс — югыд горнича, а гугыс — ортсыасянин... Шуам, ме думайта ог сы йылысь, мый берегдорса вөр пөрөдөм вөсна вермас косьмыны ю, а сы йылысь, мый вевтыртсьө план и государство босьтө содтөд вөр... Да и нинөмла быд пустякысь вийсьынысө, Артём Иванович. Сидз нин дженьыд мортыдлөн олөмыс. Да и, ен ськөд, мый дон сулалө өтка мортыслөн каньгөм-вийсьөмыс ыджыд да помтөм олөм водзас? Нинөм дон оз сулав! Сійө, позьө шуны, — парма шөрын пысталөн коньөреник чипөстөм кодь и эм... И то на нөшта төла дырйи...

Смолев. Пелька, пелька тэ тшөкөлдывайтан, эг чайтлы ме, ёксөнпедь... Ог весиг и куж, мый вочасө шуны... Но век жө... Шуам, став йөзыс кө пондасны тадзи жө овны, сэки нө сэся мый лоө, Василий? А? Ути, ыджыда думыштчывтөг, тшөктас керавки заповедной вөрьяс... Мөд, сьөлөмнас сыркмунытөг жө, тшөктас лэдзны ваө уна сюрс тонна быдсяма пещсө... Коймөд — нөшта мыйкө вөчас... Сэки өд зэв лектор вермас лоны... Юрси сувтантор вермас лоны! Сэки өд немьсь-немтор оз коль мян бөрын олысь йөзыслы... Вөр ни ю... Немтор! Ни чери, ни пөтка... Кыдзи нө пондасны казьтывны мян нөс водзө лобысь йөзыс?.. Кутшөм кывъясөн?..

Мыров. Но тэ вывтіджык нин сьөднас мавтан, Ар-

тём Иванович. Миян государственноуна вочо вөр-вато видзём могысь. Лёсялана постановлениеяс петавлоны.

Смолев. Да, петавлоны, огу шу, мый оз. Но од тайо бур постановлениеяссо ти вокусы жо и оз портны оломо, быд ногыс мудеритомон кочалоны... Босьтам коть сийо жо кылдчомто. Кымынысь нин вөлі ыджыда шуома, мый миян юяс кузя, кодъяс корко вөліны сэтшом чериаось, коло дугодны рази-пелион кер кылөдом... Сы вөсна мый куло юыс, подо... А дугодисны омой? Од та кодь умникъясыс, Василий, кодъяс оти лунон сомын олоны, век нин аддзасны мыйко да мыйко, мед сомын кокныдджыка да унджык курыштны... Кыв тодтом да дорйысьтом вөр-ваыслысь курыштны... Сы вөсна мый веськодь налы ставыс, дзык веськодь!.. И та со сэтшом жо вөломыд...

Мыров (помало стокансыс, логасьтог видзөдо пемдом чужома мастер выло). Вайо ого кутой вензыны, Артём Иванович. (Шапкаасьо.) Ме сэссия моді, Артём Иванович. Эн вунод, мый ме водзвыв олоді тэнө. (Пето.)

Смолев дыр видзөдо ошиньо.

Смолев. Мый но они вочнысо, ексонпедь?.. Лесхозо звонитлыны? Рыгнас аслым ветлыны сэтчо? А, гашко, райкомодз воодчывны?.. Оз омой но кызко бур ногон позь вочны?.. Этатшомторсо?.. А со нин и начальник локто... Дерт, тодмаліс жо нин... Мыровкод со вочаасис, сёрнитоны... Они кутчысь, Артём...

Пыро Дронов.

Дронов (нарошино кыпыда). Привет, Артём Иванович! Эн, конко, виччысь мено татшом сёроннас? А ме со босьти да и гонити-вои... Вай ошйысь, кыззи та тани...

Смолев (юасяна видзөдо начальник выло). А мый, уджалам ньожйоникон... Буретш лосьодчам вуджны...

Дронов (голоссыс кыпыдлуныс джомдо). Сидзко,

тайо — збыль? Чорт возьми, ковтом кадө артмө тайо вужомыс! Сэтшөм ковтом кадө!

Смолев (лөня). Нинөм он вөч...

Дронов. А, гашкө, кызкө-мыйкө нөрөвитлыны на март помөдзыс?

Смолев. Аски шуим нин пөрөдчыны выль деянкаын... Мартнад бура уджалім да өдийө куштім таті. Сэссия и вөрыс этшаджык вөлөма таксация сертиыс...

Дронов. Хы!.. (Зымөдө-ветлөдлө, куртка зепъясас кияссө сюялөмөн.) А вот меным лесничөй паныдасис, Мыров, и төдан мый крапкөбтис? Смолевыдлөн пө вөрыс лун вит-ө-квайт кежлө на тырмас... Сөрө али мый?

Смолев (шөйөвошөма). Кызд тэд шуны...

Дронов (петкөдлө карта вылын). Со этайо нөрысыс, шуө, вөрзөдтөм на.

Смолев. Сідзи и эм эськө да...

Дронов (ныр пырыс ыджыда лолыштө). Мыровыс эз жө өд лөсьөдлы, кор шуис, мый сийө нөрыссө тэ колян... дозмөр койт вөсна?

Смолев (ёна шызьөма). Сідзи и эм эськө да, веськыда кө шуны...

Дронов. Но и но, чорт возьми!..

Смолев. Да, ёксөнпедь, кутшөм нө сәні вөр! Зыксьөм доныс оз сулав... Мый ті ставөн кыккөкйив сувтінныд?! Доддявлытөм чаньяс моз...

Дронов. Ог төд, ог төд... Мыров тай зэв стрөга өлөдіс менө-а: шуас, колянныд кө пө, то пырысь-пыр жө штрапуйта недорубысь. И не өти тысяча пө ковмас перйыны зепсыныд... А менам, Артём Иваныч, гусьоникөн висьтала, сымда деньгаыс абу. Гашкө, тэнад эм, чулки пытшкө дзебөма?

Смолев (скөрмө вочасөн). Чулки пытшкөд нө уна-ө төрас? Менам, ёксөнпедь, вольпась эжөдъясө сьөмсө төбөма, и ёнджыкасө сө чөлкөвөйяс...

Дронов. Но, тырмас сэссия больгыны!.. Став йөзсө шызьөдөмыд аслад партизанитөмөн. Машинаысь петіг-

кості куимён удитісны норасны. Сідзкё, дона Артём Иваныч, кытчөдз абу на сёр, вай бөр дугөдчыв аслад кывйысь. А то дзикөдз скөрмөдан йөзсө, и мат лоө.

Смолев. Веськыд кывсө, Герман Андреич, оз сымогысь шулыны, мед пырысь-пыр жө энотчыны сыысь. Тайө меным фронт вылын на вирөдз йиджис... А өнія кыв шуөмыс менам, поэё шуны, кырымалөма вирөн...

Дронов (*повзёодана ногөн*). Сідзкё нө мый, — все равно кутан вуджны?

Смолев. Да, кута.

Дронов. А плантө кө орөдан? Мукөдторсьыс өтар?..

Смолев. Ог жө кө-а... Туйсө выль дялянкаас ме водзвыв нин писькөді.

Дронов (*ярскөба*). Ог жө кө, ог жө кө!.. Кор ме зэв бура төда — орөдан! Онитө вуджигөн...

Смолев. Но и мый — көть и ог тырт өтчыдысьтө, ёксөнпеды! Сы пыдди мөд планыс — морт ногаыс — лоө тыртөма. И тані колө на нөшта артавны, кодсьыс унджык лоө бурыс да пөльзаыс... Сы вөсна мый сәні не сөмын дозмөр койт, но тшөтш и медся бур көйдыса пожөмъяс... Найө вөрыслы дас пөв унджык көдзасны көйдыссө Мыровлөн йөз сертиыд...

Дронов (*зывөкаmoz*). Абу тай дыш, старик мортлы, тадзи щөтьтө лэптавны... Нинөм абусьыс нервьястө ротыны.

Смолев. Тияны, ме төда, ставыс тайө — «нинөм абу»... (*Бара шлөчйөдлө чуньяссө да лыддьөдлө.*) Дозмөр койт пазөдны. Либө йөраөс туй вылын таявны. Либө ва видзысь берегдорса вөрьяс керавны, пьянник-лесниккөд өтвылысь... Ставыс тайө тияны — «нинөм абу...» А меным вот и мөд кодьжык ставыс тайө! Меным мөд ногджык ставыс тайө инмө!.. Таысь менам, ёксөнпедь, пөсялө вирөй... Зэв ёна пөсялө!.. Бытьтө электричество ме пыр мунө, ыджыд вына ток...

Дронов (*нерөмөnmоз*). Эз-ө нин замкнит өні?

Смолев. А мый — замкнитіс! Би киньяс трачмуніс-

ны... Лолос сотоны-чишкалоны... Со элаті. (Веськыд кинас инмодчылө сьолөм динас.)

Дронов (зымкнитө пызанө кулакнас). Тырмас, тырмас сэсся няргынытө!.. Ловсө сылысь сотоны... Би киньяс... Дозмөрьяс вөсна сійө вийсьө, жалитысь петөма... Чорт возьми, а йөз йывсьыс нө тэ вунөдин?! Мый тэ вөсна премияыс налөн шутөвтас? Төлысья премия... А гашкө, и кварталной! Али тэ чайтан, мый 200—300 шайтыс туй вылын туплясьө? А, гашкө, тэнад урөс дозмөрьясыд какаласны найөс?.. Сідз нин йөзыс некыдзи оз өшйыны мяянын, вооны-мунөны, быттө зимовйөын... То налы удждон ичөт, то школа абу, то пывсяныд важмөма, жарыс оз өшйы... Ударной төлысь, быд боксянь жмитөны, дурпоп моз пессян, инад он өшйив, өдва-өдва лыдтөм розьяс тупьялан... А тэ — дозмөрьясөс колө дорйыны... Да мед көть өні жө ставныс найө ньөмдөны!.. Оти-төт!.. Ог көсий, медым на вөсна сьылідзирөс менсьым песовтісны... Кылан? Ог көсий!

Смолев. Эн пов, оз песовтны — кыз и ён сійө тэнад...

Дронов. А, чайтан, ёна меным любө, кор сьылідзирөс песөны?.. Кодкө понда?.. Чорт возьми, некор оз ло тадзисө!.. Ме тані командуйта параднас и ог лэдз, мед менам син водзын дзугисны трудовай да технологической дисциплина... Тэныд ковмас иөрөдны сійө дісө! Нюрөдзыс!.. Позьө на и нюр дорсө паськыдакодь босьтны, сэн көть и ляпкыдджыкөсь пожөмьясыс, но зэв жө на шыльыдөсь. Дась туйөдыд кокниа позяс кыскыны.

Смолев (зелалөмысла тіралыштысь гөлөсөн). А ме ог сет керавнысө! Салдатлөн кыв... А понданныд кө мырдысьөн сюйсьыны, то ме босьта пищальөс да мыйкөкерта, лыйлыны понда... (Петкөдлө кисө.) Лыйсьынытө ме кужа, көть эськө и киөс шыгыртіс фашистлөн пуля...

Дронов (видзөдө шемөсмөмөн). Да тэ нө мый — дзикөдз выжывмин? Тэ нө ачыл көть гөгөрвоан-ө, мый сөран?!

Смолев (звирк чеччыштö, сійö дзыкöдз этшсьыс петöма). И пищальöй менам бур!.. Позьö шуны — вывтi бур! Сё воськов сайысь чукчиöс гырысь дрöбйөн уськөдö... А пуляён кө — куймсё сайысь!.. Любöй зверöс... Да чöвлы, аслыд ме тэд петкөдла сійöс!.. Чöвлы, чöвлы...

Дронов (гöгрöсмöм сингьясөн видзөдö, видзөдö мастер вылö). Мый нö тэкөд лои?.. Дугды тэ ружйöнад ворснытö!..

Смолев котөрөн пырö мөд жырийö. И сэки контораö вувзьысьöны уна йöз. Ставныс горзöны.

Гуляев (начальниклы, кодi абу на палялöма Смолевкөд лэчыд сёрниысь). Герман Андреич, чолөм! Тi тай танöсь жö? А көни Артём Иванычыс? Мездöй мянöс, ен могуьсөн! А то ловйөн сёясны этайö шевааясы!..

Дронов. Мый нö лоис? Мыйся базар?

Гуляев. Кутшöм нин сән базар, Герман Андреич. Быдса война! Мыйөн сöмын ме босьтi пилаöс, мед аски асывсяныыс нуны сійöс выль делянкаö, ме вылö джын войскайö уськөдчис. Ог пö сетöй нуны инструментсö!

Томны вбаба. Кытчöдз огö помалöй, некытчö ми огö мунöй татысь! Нэм чöжнас öтчыд воөдчим мича вөрöдзыс и — со тэныд, энөвтны пö колö... Да тi көть эськөн мянöс жалитыштiнныд, увйысьысьясö! Дiтшкөдан, дiтшкөдан лы кодь чорыд увьяс, дiнсяныыс петöм увьяс, син водзыд пемдывлö, сойясыд лёталöны... Колö жö көть öтчыд бур вöрас морт моз уджалыштны. Помавтöдзыс некытчö огö мунöй!..

Феня да Павел Жмутько лёкысь вензёны öта-мөдныскөд.

Феня. Да тэнад нö аслад юрыд эм али абу? Йöй бис! Тэ нö татчö уджавны воин али мыйла? Челядьöс колимö... Отнаннысö!.. Да кутшöм нö хата лоас тадзитö шландайтигад?.. Кутшöм грöшгьяс лоöны?.. А сiдзи кө тэ пондан керны, ме аски жö шутёвта гортö!.. Отнам!..

Мод жыр өдзөсын тыдовтчо Смолев, чола сулалө сәні, некод на
оз казяв сийөс.

Жмутько (*дзико́дз шойёвошөма*). Да лөнбышталы
тэ, Феня, лөнбышталы! Мый нө сән чирзан, катша моз...
Да удитам на ми норматө тыртны... И вөрыд лоас хата
вылө... Мый нө тэ сідзи уськөдан асьтө йёз водзас?.. Ни-
нөм гөгөрвотөмөсь али мый ми? Ми өд гөгөрвоам жө и
мичлунсө и зверь-пөткасө... Вөръяссө и садъяссө... Мый
йёзлы коланаось найө...

Феня. Гортө шутөвта!.. Шутөвта... Тэ он кывзысь
меньсым! Тэ бызгун Гуляевлысь кывзысян!

Гуляев (*Фенялы*). Фенечка, та вылө ме тэд верма
сідзи шуны, мый лы пытшкад вемыд гудыртчас. Но ог
шу... Көсьян кө төдны, ме талун тэнад Павлолы висьта-
лі медмича кывъяссө... Таөдз менам некор на сэтшөмъ-
ясыс эз артмывалыны... Сэтшөм кывъяс ме шуи, Фенечка,
мый весиг ачым кыз синваөн бөрддзи... Павло, мися, до-
на хохолөй тэ менам, вай жө ми водзө кежлө на колям
дозмөр шудсө! Мися, та понда ме дась аслам бекъясөн
пөжны дозмөр колькъяссө. Мед некор бырлытөг олісны
да рөдмисны тайө молодеच्याсыс, эз кө кусны-бырны на-
йө помтөм нәмъяс чөж — каменнөй вексянь ядернөйөдз!

Феня (*начальниклы*). Герман Андреич, да мый нө
найө бызгөны? Тшөктөй кольччыны налы, йөй бисьясыс-
лы! Мастерлы тшөктөй, Артём Ивановичлы!.. Мый нө
сийө тадзи ышмө!.. Да көні нө сийө ачыс?

Дронов (*казялө өдзөсысь мастерөс*). Со тай нө су-
лалө! Герой! Көн нө ружийөйд? Мый нө тэ сідз сулалан?
Лый!.. Лыйлы ставнымөс!.. Тэ жө лыйлыны и көсийн...

Смолев (*зэв ёна шызьёма, пөся видзөдө Гуляев
вылө да Жмутько вылө*). Оні нинөмла нин... Кызкө-мый-
кө пицхальтөгыс нин... Ексөнпедь!

Содержание

Арся сыланкыв	5
Ювеналий Иванович	109
Тэрыб кок	117
Кодзувкоткар	125
Дозмөр койт	146

Иван Григорьевич Торопов.

ОСЕННЯЯ ПЕСНЯ.

Повести и рассказы. На коми языке.

Редактор Т. Чукичева. Художественный редактор А. Мошев. Технический редактор А. Вишнева. Корректор Э. Греггер.

Сдано в набор 14/I-1976 г. Подписано к печати 13/IV-1976 г. Формат 70×108¹/₃₂. Бумага № 1. Усл. печ. л. 7,35 (уч.-изд. л. 7,88). Ц01803. Заказ № 1334. Тираж 3500. Цена 38 коп. Коми книжное издательство. Сыктывкар, Дом печати.

г. Сыктывкар, Республиканская типография Управления по делам издательства, полиграфии и книжной торговли Совета Министров Коми АССР.

38 коп.

КОМИ КНИЖНОЙ ИЗДАТЕЛЬСТВО · 1976